

DAGITI ESTORIA ITI  
DOKTRINA KEN KATULAGAN



# Dagiti Estoria iti Doktrina ken Katulagan

Impablaak ti  
Ti Simbaan ni Jesucristo dagiti Santo iti Ud-udina nga Aldaw  
Siudad ti Salt Lake, Utah

© 1995, 2001 ti Intellectual Reserve, Inc.

Nailatang Amin a Karbengan

Naimaldit iti Estados Unidos ti America

Pannakaanamongna iti Ingles: 6/95

Pannakaanamongna a maipatarus: 6/95

Pannakaipatarus ti *Doctrine and Covenants Stories*  
Ilokano

# Dagiti Linaonna

Paset	Paulo	Panid
	Sakbay ti Doktrina ken Katulagan	1
1	Ni Joseph Smith ken ti Kaamaanna (1805–1820)	6
2	Ti Umuna a Parmata ni Joseph Smith (1820)	9
3.	Ni Anghel Moroni ken dagiti Balitok a Pinanid (1823–1827)	13
4	Ni Martin Harris ken dagiti Napukaw a Panid (1824–1828)	17
5	Da Joseph Smith ken Oliver Cowdery (Pebrero–Abril 1829)	22
6	Naited kada Joseph ken Oliver ti Kinasaserdote (Mayo 1829)	26
7	Nakita dagiti Saksi dagiti Balitok a Pinanid (1829–1830)	31
8	Panagsagana para iti Simbaan ni Jesucristo (Marso–Abril 1830)	34
9	Ti Pudno a Simbaan ni Jesucristo (6 Abril 1830)	40
10	Ti Umuna a Milagro iti Simbaan (Abril 1830)	43
11	Adu Pay a Tao ti Nagkameng iti Simbaan (Abril–Hunio 1830)	46
12	Ti Mision ni Samuel Smith (Hunio 1830)	48
13	Da Joseph ken Emma (Hulio 1830)	51
14	Ti Propeta ken dagiti Paltiing para iti Simbahan (Septiembre 1830)	56
15	Maysa a Mision kadagiti Lamanite (Septiembre 1830)	58
16	Nasursuro da Joseph Smith ken Sidney Rigdon ti Maipapan iti Zion (1830)	61
17	Dagiti Immuna nga Obispo ti Simbaan (Pebrero 1831)	64
18	Ti Linteg ti Simbaan (4 Pebrero 1831)	67
19	Ti Maikadua a Yaay ni Jesucristo (Pebrero–Marso 1831)	70
20	Dagiti Sagut ti Espiritu Santo (8 Marso 1831)	77
21	Napan ti Propeta Idiy Missouri (Mayo–Hunio 1831)	81
22	Dagiti Santo iti Missouri (Hulio–Agosto 1831)	84
23	Ti Doktrina ken Katulagan (Agosto–Nobiembre 1831)	90
24	Nasken nga Isuro dagiti Nagannak dagiti Annakda (Nobiembre 1831)	93
25	Nagmision da Joseph Smith ken Sidney Rigdon (Disiembre 1831–Enero 1832)	96
26	Dagiti Tallo a Pagarian ti Langit (16 Pebrero 1832)	97
27	Ti Trabaho ni Propeta Joseph Smith (Marso 1832)	104
28	Napan Manen ni Propeta Joseph iti Missouri (Marso–Mayo 1832)	108
29	Ti Paltiing Maipapan iti Kinasaserdote (Septiembre 1832)	113
30	Ti Paltiing Maipapan iti Gubat (25 Disiembre 1832)	117
31	Ti Nainsiriban a Balikas (Pebrero 1833)	119
32	Ti Simbaan ni Jesucristo iti Kirtland (Marso–Hunio 1833)	123
33	Ti Paltiing Maipapan ken ni Jesucristo (Mayo 1833)	126

34	Binallaagan ti Dios dagiti Tao iti Zion (Hulio–Agosto 1833)	128
35	Pimmanaw dagiti Santo iti Jackson County, Missouri (Septiembre–Disiembre 1833)	132
36	Kampo ti Zion (Pebrero–Hunio 1834)	135
37	Dagiti Dadaulo ti Kinasaserdote (Pebrero 1835)	140
38	Ti Perlas a Kapatgan	145
39	Naidaton ti Templo ti Kirtland (Enero–Marso 1836)	151
40	Dagiti Parmata iti Templo ti Kirtland (Abril 1836)	155
41	Riribuk iti Kirtland (1837)	158
42	Far West, Missouri (Enero–Hulio 1836)	161
43	Ninaganan ni Jesucristo ti Simbaanna (Abril 1838)	164
44	Apagkapullo (Hulio 1838)	165
45	Dagiti Bunggoy a Mangrribuk iti Missouri (1833)	167
46	Ni Joseph iti Pagbaludan ti Liberty (Marso 1839)	173
47	Dimmawat ni Joseph Smith iti Tulong iti Presidente (Marso–Nobiembre 1839)	176
48	Dagiti Misionario kadagiti Sabali a Lugar (Hunio 1837–Oktubre 1841)	180
49	Dagiti Santo iti Nauvoo (Enero–Hulio 1841)	183
50	Dagiti Immuna nga Endowment (Mayo 1842)	185
51	Ti Gimong ti Kaasi (Marso 1842)	186
52	Riribuk iti Nauvoo (Mayo–Agosto 1842)	191
53	Ti Dios ken dagiti Anghel (Pebrero–Abril 1843)	194
54	Ti Paltiing Maipapan ti Panagasawa (Hulio 1843)	198
55	Ad-adu pay a Riribuk kadagiti Santo (1843–1844)	199
56	Napapatay ti Propeta (Hunio 1844)	201
57	Ti Baro a Dadaulo ti Simbaan (Hulio–Agosto 1844)	206
58	Pimmanaw dagiti Immuna a Santo iti Nauvoo (Septiembre 1845–Pebrero 1846)	209
59	Nalpas ti Templo ti Nauvoo (Oktubre 1845–Septiembre 1846)	212
60	Intuloy dagiti Nagkauna a Kameng ti Simbaan ti Nagdaliasat (Marso 1846–Hunio 1846)	215
61	Ti Batalion ti Mormon (Hunio 1846–Hulio 1847)	218
62	Napan dagiti Nagkauna a Kameng iti Tanap ti Salt Lake (Hunio 1846–Hulio 1847)	224
63	Dagiti Santo iti Rocky Mountains (Hulio 1847)	230
64	Ti Simbaan ni Jesucristo Ita	236
	Dagiti Balikas nga Ammuen	238
	Dagiti Luglugar nga Ammuen	243
	Dagiti Tattao nga Ammuen	245

# Dagiti Mapa ken Tsart

No Sadino ti Namunganayan ti Simbaan	45
Ti Ohio ken Missouri	89
Kalpasan ti Nauvoo	190
Ti Simbaan iti Laud	223
Dagiti Pasamak iti Pakasaritaan ti Simbaan	234

# Dagiti Nagadawan

Sumagmamano kadagiti impormasion iti daytoy a pagbasaan ket naggapu kadagiti nadakamat iti baba para iti tunggal paset.

- Smith, Hyrum M., and Sjodahl, Janne M. *Doctrine and Covenants Commentary*, Rev. ed. Salt Lake City: Deseret Book Co., 1972.
- Smith, Joseph Fielding, *Essentials in Church History*. Classics in Mormon History Series, Salt Lake City: Deseret Book Co., 1979.
- Smith, Joseph. *History of The Church of Jesus Christ of Latter-day Saints*. 7 vols. 2nd ed. rev. Edited by B. H. Roberts. Salt Lake City: The Church of Jesus Christ of Latter-day Saints, 1932–51.
- Smith, Lucy Mack. *History of Joseph Smith*. 1945. Reprint. Salt Lake City: Bookcraft, 1954.
- Relief Society. *History of Relief Society, 1842–1966*. Salt Lake City: General Board of Relief Society, 1967.
- McConkie, Bruce R. *Mormon Doctrine*, 2d ed. Salt Lake City: Bookcraft, 1966.

# Sakbay ti Doktrina ken Katulagan



Nagnaedtayo idiy langit sakbay nga immaytayo ditoy daga. Inikkannatayo ti Nailangitan nga Amatayo ti plano ti pannakaisalakan. Tulongannatayo ti plano ti pannakaisalakan a makapagsagana nga agbiag manen iti langit. No tungpalentayo ti plano, makapagindegtayo iti sidong ti Nailangitan nga Ama kalpasan ti panagungartayo.




Nagindeg ni Jesus a kaduatayo idiy langit. Kayatna a tungpalen ti plano ti Nailangitan nga Ama. Kinuna ni Jesus nga umayto ditoy daga ket agbalin a Mangisalakantayo. Aramidennanto ti aramid ti Nailangitan nga Ama.



Nagindeg met ni Satanas a kaduatayo idiy langit. Ngem nadangkes daytoy. Saanna a tungpalen ti plano ti Nailangitan nga Ama. Pinapanaw ti Nailangitan nga Ama ni Satanas idiy langit. Kayat a dadaelen ni Satanas ti plano ti pannakaisalakan. Kayatna a maisardeng ti aramid ti Nailangitan nga Ama.





Inaramid ni Jesus ti daga. Immay nagnaed ditoy dagiti annak ti Nailangitan nga Ama. Nangibaon ni Jesus kadagiti propeta a mangisuro kadakuada nga agbalin a nalinteg. Sumagmamano kadagiti tao ti nagtungpal kadagiti propeta.



Saan a dumngeg kadagiti propeta dagiti dadduma a tao iti daga. Tinungpal dagitoy a tao ni Satanas. Nagbalinda a nadangkes.



Isalaysay ti Daan a Tulag ti maipanggep kadagiti tao a nagnaed idiy Palestina iti nabayagen a panawen. Ammo dagitoy a tao ti maipapan ken ni Jesus. Addaan dagiti nalinteg a tao iti ebangeliona. Addaan dagiti nalinteg a lallaki iti kinasaserdote. Insuro dagiti propeta kadagiti tao nga umayto ni Jesus iti daga. Isunto ti agbalin a Mangisalakanda.



Isalaysay ti Libro ni Mormon ti maipapan kadagiti tao a nagnaed iti America iti nabayagen a panawen. Ammoda ti maipapan ken ni Jesus. Addaanda iti ebangeliona. Addaan dagiti nalinteg a lallaki iti kinasaserdote. Insuro dagiti propeta dagiti tao iti America a ninto Jesus ti Mangisalakanda. Sarungkarannanto ida kalpasan ti panagungarna.



Immay nagnaed ditoy daga ni Jesucristo. Isalaysay ti Baro a Tulag ti maipapan iti biagna ditoy daga. Insuro ni Jesus ti ebangheliona kadagiti tao. Insurona ida nga agtungpal kadagiti bilin ti Nailangitan nga Ama.




Nangpili ni Jesus iti sangapulo-ket-dua a lallaki nga agbalin nga Apostol. Intedna kadakuada ti kinasaserdote. Inrugina ti Simbaanna. Adu a tattao ti nangipateg ken ni Jesus. Nalintegda ken nagtungpalda kadagiti pannursurona.




Saan a kinayat ni Satanas a tungpalen dagiti tao ni Jesus. Sinulisog ni Satanas dagiti tao, ket nagbalinda a nadakes. Saanda a namati ken ni Jesus. Kinagurada ni Jesus. Pinatayda isuna.



Nagungar ni Jesus kalpasan ti tallo nga adlaw. Nakisarita kadagiti Apostolna. Imbagana kadakuada nga isuroda ti ebanghelio iti amin a tao. Sinarungaran met ni Jesus dagiti nalinteg a tao iti America. Kalpasanna, napan iti langit tapno agindeg iti sidong ti Amana.



Dagiti Apostol ti dadaulo ti Simbaan ni Jesucristo. Napanda kadagiti adu a pagilian. Insuroda kadagiti tao ti ebanghelio. Adu a tattao ti namati ken ni Jesucristo ket nabuniaganda. Inted dagiti Apostol kadagiti nalinteg a lallaki ti kinasaserdote. Adu dagiti kameng ti pudno a Simbaan ni Jesucristo.



Kayat a dadaelen idi ni Satanas ti Simbaan ni Jesucristo. Sinulisogna dagiti tao, ket nagtungpalda kenkuana. Adu a tao ti nagsardeng a namati ken ni Jesus. Pinatay dagiti nadangkes a tao dagiti nalinteg a kameng ti Simbaan. Pinatayda dagiti Apostol. Awanen dagiti dadaulo iti Simbaan. Awanen ti asino man ditoy daga ti mangted iti kinasaserdote kadagiti lallaki.



Sumagmamano a tattao ti nangbalbaliw kadagiti pannursuro ti Simbaan ni Jesucristo. Binaliwanda dagiti bilin ti Dios. Awanen daydi pudno a Simbaan nga inrug a binangon ni Jesus. Nangrug a nangbangon dagiti tao iti bukodda a simbaan. Ngem awan kadagitoy a simbaan ti pudno a Simbaan.



Naglabas ti ginasgasut a tawen. Adun ti agduduma a simbaan ditoy daga. Ngem awan kadagitoy ti pudno a Simbaan ni Jesucristo. Namati dagiti kameng ti simbaan ken ni Jesucristo. Ngem awanan iti pudno nga ebanghelio dagiti simbaan. Awan kadakuada ti kinasaserdote ti Dios. Awananda kadagiti propeta wenna Apostol.



Kinuna ni Jesus nga agsublinto manen ditoy daga. Kinunana a nasken nga addanton ditoy daga ti pudno a Simbaanna sakbay nga umayto manen. Nasken nga ammo dagiti tao ti pudno nga ebangeliona. Nasken nga adda kinasaserdote kadagiti lallaki. Nasken nga adda dagiti propeta ken Apostol. Nasken nga adda dagiti paltiing.



Aggapu ken Jesus dagiti paltiing. Ibaga kadayo dagiti paltiing dagiti banag a kayat ni Jesus a maammuntayo. Ibagada kadayo no ania ti kayatna nga aramidentayo. Ited ni Jesus dagiti paltiing kadagiti propetana. Agpaay dagiti paltiing iti pudno a Simbaanna.



Libro dagiti paltiing ti Doktrina ken Katulagan. Isalaysay ti Doktrina ken Katulagan ti maipapan iti pudno a Simbaan ni Jesucristo. Isalaysay daytoy ti maipapan iti kinasaserdote. Isalaysay daytoy ti maipapan kadagiti propeta ken Apostol. Isalaysay ti Doktrina ken Katulagan no ania ti nasken nga aramidentayo tapno makapagsaganatayo inton umay manen ni Jesus.



Maipapan iti Doktrina ken Katulagan ti libro a basbasaenyo. Isalaysay daytoy a libro ti maipapan iti sumagmamano kadagiti paltiing. Isalaysay daytoy no kasano a napasubli ditoy daga ti pudno a Simbaan ni Jesucristo. Isalaysay pay daytoy ti maipapan iti sumagmamano kadagiti tao a nagbiag idi mairugi ti Simbaan.

# Ni Joseph Smith ken ti Kaamaanna

Umuna a Paset (1805–1820)



Nayanak ni Joseph Smith idi 23 ti Disiembre 1805. Nagnaed ti kaamaanna iti estado ti Vermont. Adda ti Vermont iti Estados Unidos ti America. Joseph met ti nagan ti ama ni Joseph Smith. Lucy ti nagan ti inana.

Joseph Smith—Pakasaritaan 1:3–4



Adda lima a kabsat a lallaki ken tallo a kabsat a babbai ni Joseph.

Joseph Smith—Pakasaritaan 1:4



Nasayaat a tattao ti ama ken ina ni Joseph. Inayatda dagiti annakda. Nagtrabahoda a nasayaat tapno mataripatoda dagiti annakda.



Idi ubing pay ni Joseph, adda nakaro a letteg iti gurongna. Inkarigatan dagiti doktor a pagimbagen ti gurongna, ngem dida kabaelan.



Manong ni Joseph ni Hyrum Smith. Inayatna ni Joseph. Naladingitan ni Hyrum iti panagut-ot unay ti gurong ni Joseph. Nagtugaw iti abay ti katre ni Joseph. Inkarigatanna a tulongan a sumayaat ti panagrikna ni Joseph.



Kayat dagiti doktor a putden ti gurong ni Joseph. Saan a pinalubosan ida ti inana. Isu nga inkeddengda laengen ti mangiwa iti paset ti tulang. Ammo ni Joseph a masaktan no iwaen dagiti doktor ti sakana. Ngem adda pammatina. Ammona a tulongan isuna ti Nailangitan nga Ama.



Kiniddaw dagiti doktor nga uminum ni Joseph iti arak tapno saan unay nga agut-ot. Saan nga imminum ni Joseph iti arak. Kiniddaw ni Joseph a rummuar ni nanangna. Dina kayat a makitana ti panangiwa dagiti doktor iti gurongna.



Kiniddaw ni Joseph iti amana a mangiggem kenkuana. Iniwada dagiti doktor ti gurong ni Joseph. Iniwada dagiti nadangran a paset ti tulang. Daytoy ti nangpaut-ot unay ken ni Joseph. Ngem natured unay isuna. Immimbag ti gurong ni Joseph kalpasan ti adu nga aldaw.

Idi dumakkelen ni Joseph, immakar ti kaamaanna iti estado ti Nueva York. Nagnaedda iti tinabla a balay iti talon nga asideg ti Palmyra.

Joseph Smith—Pakasaritaan 1:3



Nakurapay ti kaamaan ni Joseph. Nasken nga agrabahoda a nasayaat tapno mabayadanda ti talon. Tinulongan dagiti annak a lallaki ti amada a nagmula iti bukukel. Nagtarakenda kadagiti ayup. Timmulong dagiti annak a babbai iti inada.

Nasingpet nga ubing ni Joseph. Naragsak. Kaay-ayona ti agkatawa ken agragagsak.

Joseph Smith—Pakasaritaan 1:28

Joseph Smith—Pakasaritaan 1:46

# Ti Umuna a Parmata ni Joseph Smith

Maika-2 a Paset (1820)



Namati ni Joseph Smith ken ti kaamaanna iti Dios. Sangkamaysada nga agbasa idi iti Biblia. Insuro ti ama ken ti ina ni Joseph dagiti annakda nga agbalin a nasayaat.



Adu dagiti simbaan iti Palmyra. Kinuna ti amin a tattao a ti simbaanda ti umno a simbaan. Kinunada a palso ti dadduma a simbaan. Di ammo ni Joseph no ania a simbaan ti pagkamenganna. Kayatna a maammuan no ania ti pudno a Simbaan ni Jesucristo.

Joseph Smith—Pakasaritaaan 1:5–10



Maysa nga aldaw, basbasaen idi ni Joseph ti Biblia. Sangapulo-ket-uppat ti tawenna idi. Nabasana a nasken nga agsaludsodtayo iti Dios no kayattayo a maammuan ti maysa a banag. Inkeddeng ni Joseph ti nagkararag. Sinaludsodna iti Dios no ania a simbaan ti pagkamenganna.

Joseph Smith—Pakasaritaaan 1:11–13; Santiago 1:5





Napintas nga aldaw ti panagsusulbod idi. Napan ni Joseph iti kakaykaywan iti asideg ti pagtaenganna. Nagparintumeng. Nagkararag iti napigsa. Adda pammatina a sungbatan ti Nailangitan nga Ama ti kararagna.

Joseph Smith—Pakasaritaan 1:14–15



Saan a kayat ni Satanas nga agkararag ni Joseph. Pinadas ni Satanas a lapdan isuna. Pinasipnget ni Satanas ti aglawlaw ni Joseph. Saanen a makasao. Nagbuteng isuna.

Joseph Smith—Pakasaritaan 1:15




Saan a nagsardeng ni Joseph a nagkararag. Saan a kabelan ni Satanas a pinagsardeng isuna.

Joseph Smith—Pakasaritaan 1:16



Kalpasanna naaddaan iti parmata ni Joseph. Nakitana ti napintas, naraniag a lawag. Nalikmutan isuna iti lawag. Nakitana ti Nailangitan nga Ama ken ni Jesucristo. Agtaktakderda iti ngatuenna a yan ti lawag. Intudo ti Nailangitan nga Ama ni Jesucristo ket kinunana, “Daytoy ti Ay-ayatek nga Anakko. Dumngegka Kenkuana!”

Joseph Smith—Pakasaritaaan 1:16–17



Dinamag ni Joseph ken ni Jesus no ania a simbaan ti pudno. Dinamagna no ania a simbaan ti nasken a pagkamenganna. Imbaga ni Jesus ken ni Joseph a saan nga agkameng iti ania man kadagiti simbaan. Kinuna ni Jesus a palso amin dagiti simbaan. Awan kadagitoy ti Simbaanna. Adu pay dagiti dadduma nga imbagana ken ni Joseph. Kalpasanna naggibus ti parmata. Nagmaymaysa ni Joseph.

Joseph Smith—Pakasaritaan 1:18–20



Nagawid ni Joseph. Dinamag ti inana no nasayaat met la ti riknana. Kinuna ni Joseph a wen. Imbagana iti inana a nakakita isuna iti parmata. Imbagana no ania ti naammuanna iti parmata.

Joseph Smith—Pakasaritaan 1:20



Imbaga ni Joseph ti maipapan iti parmata kadagiti sumagmamano a tao iti ili. Saan a namati dagiti tao kenkuana. Impagarupda nga agibagbaga iti inuulbod daytoy. Nakapungtotda kenkuana. Natangsitda kenkuana.

Joseph Smith—Pakasaritaan 1:21–23




Kanayon a kinapudno ti ibagbaga ni Joseph maipapan iti parmata. Ammona a nakitana ti Nailangitan nga Ama ken ni Jesucristo. Ammona nga awan ti pudno kadagiti simbaan iti daga.

Joseph Smith—Pakasaritaan 1:25:26

# Ni Anghel Moroni ken Dagiti Balitok a Pinanid

Maika-3 a Paset (1823–1827)



Tallo a tawen ti napalabas kalpasan ti umuna a parmata ni Joseph. Sangapulo-ket-pito ti tawenna. Pinanunot ni Joseph no ania ti tarigagayan ti Dios nga aramidenna. Maysa a rabii, nagkararag ni Joseph. Adda pammatina nga ibaga kenkuana ti Dios no ania ti aramidenna.

Joseph Smith—Pakasaritaan 1:27, 29



Nakakita ni Joseph iti naraniag a lawag iti siledna. Nakatakder ti maysa nga anghel iti tengnga ti lawag. Nakalawlawag ti rupa ti anghel. Nakakawes iti napintas a puraw a roba.

Joseph Smith—Pakasaritaan 1:30–32



Kinuna ti anghel a Moroni ti naganna. Imbaon ti Dios daytoy a makisao ken ni Joseph. Kinuna ni Moroni nga adda paaramid ti Dios ken ni Joseph.

Joseph Smith—Pakasaritaan 1:33



Imbaga ni Anghel Moroni ken Joseph ti maipapan iti maysa a libro. Linaon ti libro ti maipapan kadagiti tao iti America iti nabayagen a panawen. Napan ni Jesucristo kadagitoy a tao. Insurona kadakuada ti ebangheliona.

Joseph Smith—Pakasaritaan 1:34



Kinuna ni Moroni a naisurat ti libro kadagiti balitok a panid. Maawagan iti pinanid dagiti balitok a panid. Naisurat ti libro iti pagsasao a ditayo ammo iti agdama. Kayat ti Dios nga ipatarus ni Joseph ti libro. Ipatarus ni Joseph daytoy iti pagsasao nga Ingles.

Joseph Smith—Pakasaritaan 1:34–35



Kinuna ni Anghel Moroni a nailemmeng dagiti pinanid iti maysa a turod iti asideg ti pagtaengan ni Joseph. Naikali dagitoy iti daga. Kinuna ni Moroni a nailemmeng ti dua a bato ti kadua dagiti balitok a pinanid. Maawagan dagiti bato iti Urim ken Tumim. Dagiti bato ti makatulong ken ni Joseph a mangipatarus iti libro.

Joseph Smith—Pakasaritaan 1:34–35, 42, 51



Imbaga ni Moroni ken Joseph ti maipapan ken ni Elias. Maysa a naindaklan a propeta ni Elias a nagbiag iti nabayagen a panawen. Addaan iti kinasaserdote ni Elias. Adda iti Daan a Tulag ti pakasaritaan ni Elias. Kinuna ni Moroni nga agsublinto ni Elias ditoy daga. Ibaganto ni Elias kadagiti tao nga adalenda ti maipapan kadagiti kapuonanda. Kameng ti kaamaantayo dagiti kapuonantayo a nagbiag kasakbayanantayo.

Joseph Smith—Pakasaritaan 1:38–39; DkK 2:1–2



Imbaga ni Moroni ken Joseph ti maipapan iti kinasaserdote. Ti kinasaserdote ti bileg ti Dios. Kinuna ni Moroni nga itugotto ni Elias ti bileg ti kinasaserdote iti daga. Ti bileg ti kinasaserdote ti mangtulogto kadagiti nalinteg a kaamaan. Mailantipdanto. Kalpasanna, makapagbiagdanto nga agdedenna iti agnanayon. Pimmanaw ni Moroni kalpasanna.

Joseph Smith—Pakasaritaan 1:38–39, 40; DkK 2:1–2

Namindua pay a daras a nagsubli ni Anghel Moroni iti dayta a rabli. Adu dagiti banag nga imbagana ken ni Joseph iti tunggal gundaway. Bigaten idi pumanaw. Bimmangon ni Joseph ket napan nagtrabaho iti talon a kaduana ti amana.

Joseph Smith—Pakasaritaan 1:43–49



Nabannog unay ni Joseph tapno agtrabaho. Nadalupo daytoy. Bayat ti pannakadalupona immay manen ni Moroni. Imbaga ni Joseph iti amana dagiti banag nga insuro ni Moroni kenkuana. Namati ti ama ni Joseph kenkuana. Ammona nga imbaon ti Dios ni Moroni. Imbagana ken ni Joseph a tungpalenna ni Moroni.

Joseph Smith—Pakasaritaan 1:48, 50

Sinapul ni Joseph dagiti balitok a pinanid. Napan iti maysa a turod nga asideg iti pagtaenganna. Maawagan daytoy iti Turod Cumorah. Adda idiai dagiti balitok a pinanid. Naikalida iti sirok ti dakkel a bato. Addada iti uneg ti bato a kahon. Adda met ti Urim ken Tumim iti uneg ti kahon.

Joseph Smith—Pakasaritaan 1:51–52



Nagparang ni Anghel Moroni ken ni Joseph. Dina impalubos a yawid ni Joseph dagiti balitok a pinanid iti pagtaenganda. Imbagana a tinawen a sarungkaran ni Joseph ti turod iti uneg ti uppat a tawen iti isu met la nga adlaw.

Joseph Smith—Pakasaritaan 1:53



Tinungpal ni Joseph ni Moroni. Tinawen a napan iti Turod Cumorah. Idiay ti nangisuruan ni Moroni kenkuana. Imbaga ni Moroni ken ni Joseph ti maipapan iti pudno a Simbaan ni Jesucristo. Iruginto manen ni Jesus ti Simbaanna ditoy daga.

Joseph Smith—Pakasaritaan 1:54



Idi 1827, inted ni Moroni dagiti balitok a pinanid ken ni Joseph. Naguray ni Joseph iti uppat a tawen a panangalana kadagiti pinanid. Imbaga ni Moroni ken ni Joseph nga aywananna a nasayaat dagiti pinanid.

Joseph Smith—Pakasaritaan 1:59



Inyawid ni Joseph dagiti balitok a pinanid. Kayatna nga aywanan a nasayaat dagitoy. Pinadas a takawen dagiti dakes a tao dagitoy. Inlemmeng ni Joseph dagiti balitok a pinanid iti lugar a saan a masarakan dagiti dakes a tao. Tinulongan ti Dios ni Joseph a mangidulin a natalged kadagiti balitok a pinanid.

Joseph Smith—Pakasaritaan 1:60

# Ni Martin Harris ken Dagiti Napukaw a Panid

Maika-4 a Paset (1824–1828)



Marigrigat ti kaamaan ni Joseph Smith. Kasapulanda ti kuarta. Kayat ni Joseph a tulongan ti kaamaanna. Napan nagtrabaho iti estado ti Pennsylvania. Nakipagnaed iti lalaki nga agnagan iti Mr. Hale.

Joseph Smith—Pakasaritaan 1:56–57



Adda balasang nga anak ni Mr. Hale nga agnagan iti Emma. Naam-ammo ni Joseph ni Emma. Naginnayatda ket nagkallaysada. Napanda nakipagnaed iti denna ti kaamaan ni Joseph. Tinulongan ni Joseph ti amana a nagtrabaho iti talon.

Joseph Smith—Pakasaritaan 1:57–58



Adu dagiti tao a makaammo nga adda ken ni Joseph dagiti balitok a pinanid. Pinadasda a takawen dagitoy. Riniribuk dagiti tao ni Joseph. Inuulbod ti imbagada maipapan ken ni Joseph ken ti kaamaanna.

Joseph Smith—Pakasaritaan 1:60–61





Nakaro unay dagiti riribuk isu nga inkeddeng da Joseph ken Emma ti umakar. Kayatda ti mapan iti Pennsylvania. Agnaedda iti asideg ti kaamaan ni Emma. Ngem awan ti umdas a kuarta da Joseph ken Emma tapno umakar.

Joseph Smith—Pakasaritaan 1:61



Maysa a lalaki a managan iti Martin Harris ti nagnaed iti asideg da Joseph Smith. Addaan ni Martin Harris iti nalawa a talon. Adu ti kuartana. Naasian ni Martin Harris kada Joseph ken Emma. Inikkanna ida iti kuarta tapno makatulong kadakuada iti yaakarda. Napan da Joseph ken Emma iti Pennsylvania.

Joseph Smith—Pakasaritaan 1:61–62




Rinugian ni Joseph nga impatarus ti sinurat kadagiti balitok a pinanid. Saan nga ammo ni Joseph ti kaipapanan dagiti nakasurat. Tinulongan ti Dios isuna. Inaramat ni Joseph ti Urim ken Tumim tapno maawatanna dagiti balikas. Mabasatayo no ania dagiti impatarusna. Maawagan daytoy iti Libro ni Mormon.

Joseph Smith—Pakasaritaan 1:62



Napan ni Martin Harris iti Pennsylvania. Tinulonganna ni Joseph nga agipatarus. Binasa ni Joseph dagiti balikas manipud kadagiti balitok a pinanid. Insurat ni Martin dagitoy iti papel. Nakaipatarus da Joseph ken Martin iti 116 a panid ti Libro ni Mormon.



Kayat a yawid ni Martin dagiti 116 a panid iti pagtaenganna. Kayatna a makita daytoy ti kaamaanna. Dinamag ni Joseph iti Apo no mabalin a yawid ni Martin dagiti panid. Kinuna ti Apo a saan a mabalin. Nagdamag manen ni Joseph. Kinuna ti Apo a saan latta a mabalin.



Kayat latta a yawid ni Martin dagiti panid iti pagtaenganna. Nagdamag manen ni Joseph. Iti daytoy a gundaway kinuna ti Apo a mabalinen a yawid ni Martin dagiti panid. Kinuna ti Apo ken ni Martin a mabalinna nga ipakita dagiti panid iti kaamaanna. Ngem nasken a dina ipakpakita dagitoy kadagiti sabali a tao.



Nagkari ni Martin a tungpalenna ti Apo. Inyawidna dagiti panid iti pagtaenganna. Impakitana dagitoy iti kaamaanna. Ngem dina tinungpal ti karina. Impakitana dagiti panid kadagiti sabali a tao. Kalpasanna inwarangna lattan dagiti panid.



Idi agangay sinapul ni Martin dagiti panid. Sinapulna iti amin a lugar. Ngem dina masarakan dagitoy. Napukaw dagiti panid.



Nadanagan unay ni Joseph maipapan kadagiti napukaw a panid. Saan a nakaturrog.

Kinasao ni Jesus ni Joseph. Kinunana a nakaaramid ni Martin Harris iti dakes a banag. Inkari ni Martin a tungpalenna ti Apo. Ngem dina tinungpal ti karina. Ita napukawen dagiti panid ti Libro ni Mormon. Saanen a makatulong pay ni Martin Harris a mangipatarus iti libro.

DkK 3:12-14



Kinuna ni Jesus a kayat ni Satanas a mapukaw dagiti 116 a panid. Adda kadagiti dakes a lallaki dagiti panid. Kayat ni Satanas ken dagiti dakes a lallaki a pagsardengen ti aramid ti Dios. Saanda a kayat a patien dagiti tao ti Libro ni Mormon. Kinuna ni Jesus a saan a mapagsardeng ni Satanas ti aramid ti Dios. Saan a mapagsardeng dagiti dakes a lallaki ti aramid ti Dios.

DkK10: Pakauna, 8, 12, 22-29, 33, 43



Imbaga ni Jesus ken ni Joseph a saan nga agdanag maipapan kadagiti estoria nga adda kadagiti napukaw a panid. Nakasurat dagiti isu met laeng nga estoria iti sabali pay a paset dagiti balitok a pinanid. Kinuna ni Jesus a nasken nga ipatarus ni Joseph ti sabali pay a paset dagiti pinanid. Iti kasta kabaelan a basaen dagiti nasayaat a tao ti Libro ni Mormon. Patienda a pudno ti libro. Masursuroda ti ebanghelio.

Dkk 10:30, 41, 52, 62–63

# Da Joseph Smith ken Oliver Cowdery

Maika-5 a Paset (Pebrero–Abril 1829)



Nagnaed da Joseph ken Emma Smith iti bassit a katalalanan iti asideg ti Harmony, Pennsylvania. Immay simmarungkar ti ama ti Joseph kadakuada. Naragsakanda a nakakita kenkuana. Naimbag a tao ti ama ni Joseph.



Nangted ni Jesus ken ni Joseph iti paltiing para iti amana. Imbaga ti paltiing no kasano a matulongan dagiti tao ni Jesus. Nasken nga ayatenda ni Jesus. Nasken nga aggagetda a mangisuro iti ebanghelio. Nasken nga ayaten ken tulonganda dagiti sabali a tao.

DkK 4:2–6



Nasken nga agadal ken agsursuro dagiti tao nga agtarigagay nga agbalin a misionario ken tumulong ken ni Jesus. Nasken nga adda pammatida. Nasken nga agkararagda. Kinuna ni Jesus a maparaburanto dagiti tao a tumulong kenkuana.


DkK 4:5–7



Nagawid ti ama ni Joseph. Inkagumaanna nga inaramid dagiti imbaga ni Jesus nga aramidenna.




Nasken nga agtrabaho ni Joseph iti talonna. Nasken met nga ipatarusna dagiti balitok a pinanid. Adu unay dagiti trabaho nga aramidenna. Nagkararag ni Joseph ket dimmawat iti tulong ti Dios.



Sinungbatan ti Dios ti kararagna. Imbaon ti Dios ti maysa a lalaki nga agnagan iti Oliver Cowdery ken ni Joseph. Kayat a maammuan ni Oliver Cowdery ti maipapan kadagiti balitok a pinanid. Imbaga ni Joseph ti maipapan ken ni Moroni ken dagiti pinanid. Imbagana ken ni Oliver ti maipapan iti Libro ni Mormon.



Namati ni Oliver ken ni Joseph. Kinuna ni Oliver a tulonganna ni Joseph a mangipatarus kadagiti balitok a pinanid. Binasa iti napigsa ni Joseph dagiti balikas. Insurat ni Oliver dagiti balikas iti papel. Impasnek da Joseph ken Oliver ti nagtrabaho.



Adu a banag ti insuro ni Jesus kada Joseph ken Oliver. Kinunana a nasken a dida kalikaguman ti bumaknang. Nasken a sursuruenda ti maipapan iti Dios. Kinunana a nasken a tulonganda dagiti tao a makasursuro iti ebanghelio. Kinuna ni Jesus a nasken nga adda pammatida ket agaramidda kadagiti nasayaat a banag. No aramidenda, makapagnaeddanto iti sidong ti Nailangitan nga Ama iti agnanayon.

DkK 6:7, 8, 11, 13



Kinuna ni Jesus nga agnanayon koma a gayyem ni Joseph ni Oliver. Nasken a kanayon a tulonganna ni Joseph. Kinuna ni Jesus a masursuro ni Oliver ti agipatarus a kas ken ni Joseph. Tulonganto ti Espiritu Santo ni Oliver a mangbasa kadagiti balikas iti Libro ni Mormon, ngem nasken nga adda pammati ni Oliver. Ken nasken a panunotenna a naimbag ti maipapan kadagiti balikas.

DkK 6:18, 25; 8:1-2



Pinadas ni Oliver ti nagipatarus. Impagarupna a nalaka laeng. Dina pinanunot ti maipapan kadagiti balikas. Kayatna nga ibaga kenkuana ti Dios dagiti balikas. Saanna a kabelaen ti agipatarus.

DkK 9:1, 5, 7



Saanen a pinadas pay ni Oliver ti nagipatarus iti Libro ni Mormon. Impatarus ni Joseph dagiti pinanid. Insurat ni Oliver dagiti balikas para ken Joseph. Kinuna ni Jesus a nasken nga agrabaho a sipapasnek ni Oliver no tulonganna ni Joseph. Iti kasta paraburan ni Jesus ni Oliver.

DkK 9:14



Imbaga ni Jesus a saan a dimmawat ni Oliver iti tulong ti Dios iti rumbeng a wagas. Imbaga ni Jesus ken ni Joseph Smith no kasano a makagun-od ni Oliver ken dagiti amin a tao iti tulong manipud iti Dios.

Dkk 9:7



No kasapulan dagiti tao iti tulong nasken a panunotenda ti maipapan no ania ti aramidenda. Nasken nga ikeddengda no ania ti rumbeng.

Dkk 9:8



Kalpasanna nasken a damagenda iti Dios no rumbeng daytoy. No rumbeng, mariknada ti nasayaat iti pusoda. Ammoda a rumbeng daytoy.

Dkk 9:8



No saan a rumbeng, saanda a marikna ti nasayaat iti pusoda.

Dkk 9:9



# Naited Kada Joseph ken Oliver ti Kinasaserdote

Maika-6 a Paset (Mayo 1829)



Nagipatpatarus da Joseph Smith ken Oliver Cowdery iti Libro ni Mormon. Nabasada ti maipapan iti panagbuniag. Kayatda nga ad-adu pay ti maammuanda maipapan iti panagbuniag.

Joseph Smith—Pakasaritaan 1:68



Inkeddeng da Joseph ken Oliver ti agdamag iti Dios. Adda pammatida a tulongan ti Dios ida a mangsursuro iti kinapudno. Idi 15 ti Mayo 1829, napanda iti kakaykaywan ket nagkararagda.

Joseph Smith—Pakasaritaan 1:68, 72



Maysa nga anghel ti nagpakita kada Joseph ken Oliver. Napalawlawan ti anghel iti naraniag a lawag. Ni Juan Bautista ti anghel. Isu ti nangbuniag ken ni Jesus iti nabayagen a panawen.

Joseph Smith—Pakasaritaan 1:68, 72



Immay ni Juan Bautista a mangted kada Joseph ken Oliver iti kinasaserdote. Ti kinasaserdote ti bileg ti Dios. Intedna kada da Joseph ken Oliver ti Kinasaserdote nga Aaron. Adda bileg dagiti saserdote iti Kinasaserdote nga Aaron a mangbuniag kadagiti tao.

Dkk 13; Joseph Smith—Pakasaritaan 1:68–69



Imbaga ni Juan Bautista nga agbinnuniag da Joseph ken Oliver. Binuniagan ni Joseph ni Oliver. Sa binuniagan met ni Oliver ni Joseph. Nairaremnda iti danum idi nabuniaganda.

Joseph Smith—Pakasaritaan 1:70–71, 73



Nabayagen a panawen ti napalabas, binuniagan ni Juan Bautista ni Jesus iti kasta met la a wagas. Nairarem ni Jesus iti danum idi nabuniagan.

Mateo 3:16



Napno iti Espiritu Santo da Joseph ken Oliver kalpasan ti pannakabuniagda. Imbaga kadakuada ti Espiritu Santo nga iti mabiit addanto manen iti rabaw ti daga ti pudno a Simbaan ni Jesucristo.

Joseph Smith—Pakasaritaan 1:73



Imbaga da Joseph ken Oliver kadagiti nasayaat a gagayyemda a nabuniagandan. Imbagada kadakuada ti maipapan iti kinasaserdote. Ngem di imbaga da Joseph ken Oliver daytoy kadagiti sabali a tao. Ammoda a saanto a mamati kadakuada dagiti dakes a tao. Mangted laeng iti riribuk kadakuada dagiti dakes a tao.

Joseph Smith—Pakasaritaan 1:74–75



Kalpasan ti sumagmamano nga aldaw, immay ti tallo a sabali pay nga anghel. Isuda da Pedro, Santiago ken Juan. Isuda dagiti Apostol ni Jesus iti napalabas a nabayagen a panawen. Inted da Pedro, Santiago, ken Juan ti Kinasaserdote a Melchizedek kada Joseph Smith ken Oliver Cowdery.

DkK 27:12



Adda manen ti kinasaserdote ti Dios ditoy daga. Ita, mabalinen dagiti nalinteg a lallaki a maaddaan iti bileg ti kinasaserdote. Makapagbalin a dadaulo iti Simbaan dagiti lallaki nga addaan iti Kinasaserdote a Melchizedek. Mabendisionanda dagiti tao. Maitedda kadagiti tao ti sagut ti Espiritu Santo.

DkK 20:41-44

# Nakita Dagiti Saksi Dagiti Balitok a Pinanid

Maika-7 a Paset (1829-1830)



Nalpas nga impatarus da Joseph Smith ken Oliver Cowdery ti Libro ni Mormom. Kayat ni Jesucristo a mabasa dagiti tao ti Libro ni Mormom. Kayatna a maammuanda nga imbaga ni Joseph ti kinapudno maipapan kadagiti balitok a pinanid. Kayat ni Jesus a maammuan dagiti tao a pudno dagiti balitok a pinanid.

DkK 17:4-5



Ni Joseph Smith laeng ti tao a nakakita kadagiti balitok a pinanid. Nangpili ni Jesus iti tallo pay a lallaki a mangkita kadagiti balitok a pinanid. Maawagan iti saksi dagitoy a lallaki. Da Martin Harris, Oliver Cowdery, ken David Whitmer dagiti lallaki.

DkK 17:1

Inkuyog ni Joseph dagiti tallo a saksi iti kakaykaywan. Nagkararagda. Immay ti maysa nga anghel ket impakitana kadakuada dagiti balitok a pinanid. Impakitana kadakuada ti nakasurat kadagiti pinanid. Imbaga ni Jesus kadagiti tallo a saksi nga isuratda ti maipapan kadagiti banag a nakitada.

DkK 17:3, 5; Libro ni Mormom: Ti Pammaneknek Dagiti Tallo a Saksi



Napalalo ti ragsak ni Joseph. Imbaga dagiti tallo a saksi kadagiti dadduma a tao a pudno dagiti balitok a pinanid. Ammo itan dagiti tao a pudno amin dagiti imbaga ni Joseph maipapan kadagiti pinanid.



Imbaga ni Jesus ken ni Joseph nga ipakitana dagiti pinanid iti walo pay a saksi. Iniggaman dagiti walo a lallaki dagiti balitok a pinanid. Nakitada ti naisurat kadagiti pinanid.

Libro ni Mormon: Ti Pammaneknek Dagiti Walo a Saksi




Insurat amin dagiti saksi ti maipapan kadagiti balitok a pinanid. Imbagada a nakitada dagiti pinanid. Imbagada a pudno dagiti balitok a pinanid. Adda iti Libro ni Mormon dagiti balikas nga insurat dagiti saksi.

Libro ni Mormon: Ti Pammaneknek Dagiti Tallo a Saksi;  
Ti Pammaneknek Dagiti Walo a Saksi



Nalpasen ni Joseph Smith nga impatarus dagiti pinanid. Nakitan dagiti saksi dagitoy. Saanen a masapul pay ni Joseph dagiti balitok a pinanid. Sinarungkaran ni Anghel Moroni ni Joseph. Insubli ni Joseph dagiti balitok a pinanid ken ni Moroni.



Ita nakasaganan a maimaldit ti Libro ni Mormon. Impan ni Joseph daytoy iti maysa nga agimalmaldit. Awan kuarta ni Joseph a pagbayad iti agimalmaldit. Adu ti kuarta ni Martin Harris. Kinuna ni Jesus a nasken nga ibinglay ni Martin Harris ti kuartana a pangbayad iti agimalmaldit.

D&C 19:26, 35

Saan a kayat ni Satanas a maimaldit ti Libro ni Mormon. Dina kayat a mabasa daytoy dagiti tao. Pinadas dagiti dakes a lallaki a pasardengen ti agimalmaldit.



Saan nga agrabaho idi iti Domingo ti agimalmaldit. Maysa a dakes a lalaki ti napan iti pagimalditan kadagiti aldaw ti Domingo. Tinakawna ti sumagmamao a panid ti Libro ni Mormon. Immalditna dagiti panid iti maysa a pagiwarnak. Linapdan ti sumagmamano a nalinteg a tao ti panagtakawna kadagiti panid.

Kayat ni Jesus a mabasa dagiti tao ti Libro ni Mormon. Saan a mapagsardeng dagiti dakes a lallaki ti aramid ni Jesus. Saan a mapagsardeng dagiti dakes a lallaki ti agimalmaldit. Iti kamaudiananna, naimaldit ti Libro ni Mormon. Ita, adun a tao ti makabasa iti daytoy. Masursuroda ti ebanghelio ni Jesucristo.



# Panagsagana para iti Simbaan ni Jesucristo

Maika-8 a Paset (Marso–Abril 1830)



Umadanin ti panawen a pannakabangon manen ti pudno a Simbaan ni Jesucristo ditoy daga. Nangted ni Jesus ken ni Joseph Smith iti paltiing para kadagiti tao. Kayat ni Jesus nga agsagana dagiti tao para iti Simbaanna. Imbagana kadakuada dagiti banag a nasken a maammuanda sakbay nga irugida ti Simbaanna. Imbagana kadakuada ti ad-adu pay maipapan iti ebangheliona.

Dkk 20:1–4



Kinuna ni Jesus a ti Libro ni Mormon ti mangisuro iti ebangheliona. Kinunana a pudno ti Libro ni Mormon. Kayat ni Jesus a patien dagiti tao ti Libro ni Mormon. Makatulong daytoy kadakuada nga agtungpal iti Dios.

Dkk 20:8–15




Insalaysay ni Jesus ti maipapan iti biagna. Imbaon ti Dios ni Jesus a tumulong kadagiti tao ditoy daga. Pinadas ni Satanas a pagaramiden isuna kadagiti dakes a banag. Ngem saan a dimngeg ni Jesus ken ni Satanas.

Dkk 20:21–22



Nagladingit ni Jesus kadagiti dakes a banag nga inaramid dagiti tao. Nagpadara ken nagsagaba para iti amin a tao. Saanto nga agsagaba dagiti tao no agbabawida.

Dkk 19:16, 18




Inlansa iti krus dagiti dakes a tao ni Jesus ket pinatayda.

Dkk 20:23




Dagiti gagayem ni Jesus ti nangikali kenkuana iti tanem.

Mateo 27:57-61



Nagungar ni Jesus kalpasan ti tallo nga aldaw. Nagbiag manen (kalpasan ti ipapatayna).

Dkk 20:23



Inaramid ni Jesus dagitoy a banag tapno makatulong kadagiti tao nga agbabawi. Natay tapno makatulong kadagiti tao nga addaan iti pammati ken nabuniagan. Saandanto a madusa. Makapandanto iti langit. Madusanto dagiti tao a saan nga agbabawi.

DkK 19:17, 20:25



Insalaysay ni Jesus ti maipapan iti panagbuniag. Nasken nga agbabawi dagiti tao nga agtarigagay a mabuniagan. Nasken nga ayaten ken tungpalenda ni Jesucristo. Nasken a walo ti tawenda wenna nasursurok pay. Iti kasta mabuniaganda ket agbalinda a kameng ti Simbaan.

DkK 20:37, 71; 68:27



Insuro ni Jesus ti umno a wagas ti panagbuniag. Imbagana a ti saserdote iti Kinasaserdote nga Aaron wenna ti tao nga addaan iti Kinasaserdote a Melchizedek ti mabalina mangbuniag iti maysa a tao. Ipan ti lalaki nga addaan iti kinasaserdote ti tao (a buniaganna) iti danum. Sawenna ti naisangsangayan a kararag.

DkK 20:72-73



Iragem ti lalaki nga addaan iti kinasaserdote ti tao (a buniaganna) iti danum. Kalpasanna, ilung-awna ti tao iti danum.

DkK 20:74



Kinuna ni Jesus nga agkari dagiti tao nga agtungpal kenkuana no agbuniagda. Nasken nga agsarita ken agaramidda kadagiti nasayaat a banag.

DkK 20:69



Insalaysay ni Jesus ti maipapan iti panangbendision kadagiti maladaga. Mabalin dagiti lalaki nga addaan iti Kinasaserdote a Melchizedek ti mangbendision kadagiti maladaga. Sarapaen dagiti lallaki ti maladaga. Maysa a lalaki ti mangted iti nagan ken mangbendision iti maladaga.

D&C 20:70



Insalaysay ni Jesus ti maipapan iti sakramento. Kinunana a nasken a masansan nga umawat dagiti tao iti sakramento. No nakaaramiddayo iti maysa a banag a dakes, nasken a saantayo nga umawat iti sakramento. Nasken nga agbabawitayo. Kalpasanna mabalintayo ti umawat iti sakramento.

DkK 20:75; 46:4



Awatentayo ti sakramento tapno malagiptayo ni Jesus. Tulongannatayo ti tinapay a manglagip iti bagi ni Jesucristo. Malagiptayo a natay iti krus para kadayo.

DkK 20:77



Tumulong ti danum a mangipalagip kadayo iti dara ni Jesus. Malagiptayo a nagpadara ken nagsagaba para kadayo iti Minuyongan ti Getsemani.

DkK 20:79



Agaramiddayo kadagiti katulagan no umawattayo iti sakramento. Maysa a kari ti katulagan. Agkaritayo nga ikarigantayo ti agbalin a kas kenkuana. Agkaritayo a lagipentayo a kanayon isuna. Agkaritayo a tungpalentayo dagiti bilinna. Addanto kadayo ti Espirituna no tungpalentayo dagiti katulagantayo.

DkK 20:77, 79

# Ti Pudno a Simbaan ni Jesucristo

Maika-9 a Paset (6 Abril 1830)



Agnanaed ni Joseph Smith iti ili a maawagan iti Fayette. Adda ti Fayette iti estado ti Nueva York. Imbaga ni Jesucristo ken ni Joseph Smith a panawenen tapno mapaadda manen ti pudno a Simbaan ditoy daga. Imbaga ni Jesus ken ni Joseph a rugianna ti Simbaan.

DkK 20:1-2; 21:3



Nagtungpal ni Joseph Smith. Nangawag iti taripnong idi Abril 6, 1830. Lima a lallaki ti dimmar- ay iti taripnong a tumulong ken ni Joseph a mangirugi iti Simbaan. Da Oliver Cowdery, Hyrum Smith, Samuel Smith, David Whitmer, ken Peter Whitmer dagiti lallaki. Nabuniagandan amin. Immay dagiti dadduma a tao a nangbuya iti taripnong.



Nagkararag dagiti lallaki iti Nailangitan nga Ama. Inordenan ni Joseph ni Oliver nga agbalin nga elder iti Simbaan. Kalpasanna inordenan met ni Oliver ni Joseph.

Binendisonan da Joseph ken Oliver ti sakramento. Intedda daytoy kadagiti lallaki.



Impatay da Joseph ken Oliver dagiti imada iti ulo ti tunggal lalaki. Pinatalgedanda dagiti lallaki nga agbalin a kameng ti Simbaan ni Jesucristo. Intedda kadagiti lallaki ti sagut ti Espiritu Santo. Nagyamanda iti Dios.





Sabali pay a tattao ti adda iti taripnong. Inordenan da Joseph ken Oliver ti sumagmamano kadagiti lallaki. Intedda kadakuada ti kinasaserdote. Naragsakan unay dagiti lallaki a naordenan. Kinunada a patpatgenda ti Dios. Imbagada no kasano a pinaraburan ti Dios ida.

Nangted ni Jesus iti paltiing ken ni Joseph Smith iti taripnong. Kinuna ni Jesus a maysa a propeta ni Joseph. No agsarita ti propeta, agsarita para ken ni Jesus. Nasken a dumngeg dagiti kameng ti Simbaan iti propeta. Nasken a tungpalenda daytoy.

Dkk 21:1, 4-5



Adu a tao ti nabuniagan kalpasan ti taripnong. Nabuniagan ti ina ken ti ama ni Joseph Smith. Naisangsangayan nga aldaw ti Abril 6, 1830. Adda manen ti pudno a Simbaan ni Jesucristo ditoy daga.

# Ti Umuna a Milagro iti Simbaan

Maika-10 a Paset (Abril 1830)



Domingo, 11 ti Abril 1830 ti simmaruno a taripnong ti Simbaan ni Jesucristo. Immay iti taripnong dagiti kameng ti Simbaan. Santo ti awag kadagiti kameng.



Adu pay dagiti sabali a tao dimmar-ay iti taripnong. Saanda a kameng ti Simbaan. Insuro kadakuada ni Oliver Cowdery ti ebanghelio ni Jesucristo. Sumagmamano kadagiti tattao ti namati ken ni Oliver ket kinayatda ti agkameng iti Simbaan. Nabuniaganda kalpasan ti taripnong.



Saan a kayat ni Satanas nga agkameng dagiti tao iti Simbaan. Pinadas ni Satanas a pagbalinen a dakes ti rikna dagiti nasayaat a tao. Maysa kadagitoy a tattao ti agnagan iti Newel Knight. Saan a kameng ti Simbaan ni Newel Knight. Saan a kayat ni Satanas a mabuniagan daytoy.



Kiniddaw ni Joseph nga agkararag ni Newel iti maysa a taripnong. Kinuna ni Newel nga agkararag isuna.



Saan a kinayat ni Satanas a tungpalen ni Newel ni Joseph. Napan ni Newel iti taripnong, ngem saan a nagkararag. Kinunana a mabuteng nga agkararag iti napigsa.



Idi agangay, napan ni Newel Knight iti kakaywan. Kayatna ti agkararag nga agmaymaysa. Saan a kayat ni Satanas nga agkararag daytoy. Pinadas ni Newel ti nagkararag, ngem saan a nakapagsao. Nagsakit. Nagladingit ken nagbuteng. Nagawid ni Newel.



Nariribukan ti asawa ni Newel. Kiniddawna ken ni Joseph Smith a tulonganna ni Newel. Inaramat ni Joseph Smith ti bileg ti kinasaserdotena a nangbendision ken ni Newel. Simmayaan manen ti rikna ni Newel. Saanen a masakit. Saanen a mabuteng. Naragsakan. Saanen a kabaelan a dangran isuna ni Satanas. Iti saan a nabayag, nabuniagan ni Newel Knight.



# Adu Pay a Tao ti Nagkameng iti Simbaan

Maika-11 a Paset (Abril–Hunio 1830)



Adu a lawas ti napalabas. Addan duapulo-ket-pito a kameng ti Simbaan. Saanda nga agnaed amin iti maymaysa nga ili. Kiniddaw ni Joseph Smith ida nga umayda iti maysa a komperensia. Maysa a naisangsangayan a taripnong ti komperensia para iti amin a Santo. Dagiti Santo ket isu dagiti kameng ti Simbaan ni Jesucristo.



Naaddaan iti sakramento dagiti Santo iti komperensia. Naordenan ti sumagmamano a lallaki iti kinasaserdote. Binendisionan ti Espiritu Santo dagiti Santo. Napalalo ti ragsakda.



Adda met dagiti sumagmamano a dadduma pay a tao iti komperensia. Saanda a kameng ti Simbaan. Nasursuroda ti maipapan iti ebanghelio iti komperensia. Kinayatda ti agkameng iti Simbaan. Nabuniaganda. Kalpasan ti komperensia, napan ni Joseph Smith iti sabali nga ili. Sumagmamano kadagiti nalinteg a tao ti nagtarigagay a mabuniagan. Imbaga ni Joseph a mabalinda a mabuniagan iti bassit a karayan.



Nagaramid dagiti tao iti maysa a panned iti karayan. Nagaramidda iti napintas a lugar a pagbuniagan. Iti rabii, sumagmamano a dakes a tao ti nangdadael iti panned.



Inaramid manen dagiti a tao ti panned. Ket rinugianen ni Oliver Cowdery ti nangbuniag kadakuada. Idi agangay, simmangpet ti bunggoy a mangriribuk. Grupo dagiti natangsit, dakes a lallaki ti bunggoy a mangriribuk. Adu nga agkakadakes a banag ti insao ti bunggoy a mangriribuk kadagiti nasayaat a tao. Pinadas ti bunggoy a mangriribuk ti mangdangran kadakuada. Ngem sinalakniban ti Apo dagiti nasayaat a tao.



Kinayat ni Satanas a riribuk ti bunggoy a mangriribuk ti Simbaan ni Jesucristo. Inuulbod dagiti imbaga dagiti dakes a tao maipapan ken ni Joseph Smith. Kinunada a nagaramid kadagiti dakes a banag. Naibalud ni Joseph.



Pinadas dagiti natangsit a tao a dangran ni Joseph. Tinupraanda daytoy. Dida kayat nga ikkan iti kanenna. Sumagmamano kadakuada ti nangibaga iti inuulbod maipanggep ken ni Joseph. Ngem imbaga dagiti nalinteg a tao ti kinapudno maipapan ken ni Joseph. Imbagada nga isu ket nasayaat a tao. Iti kamaudiananna naparuar ni Joseph iti pagbaludan.

# Ti Mision ni Samuel Smith

Maika-12 a Paset (Hunio 1830)



Ading ni Joseph Smith ni Samuel Smith. Kinuna ni Joseph a kayat ni Jesus a mapan ni Samuel iti mision. Ni Samuel Smith ti immuna a misionario ti Simbaan.



Napan ni Samuel tapno isurona kadagiti tao ti ebanghelio. Kayatna nga ibaga kadakuada ti maipapan iti Libro ni Mormon. Pinadasna nga ilako ti libro kadagiti tao. Ngem awan ti mayat a mangbasa iti daytoy. Nagladingit ni Samuel.



Narigat ti pinagmision ni Samuel. Adu a kanito a nabisinan. No dadduma awan lugar a pagturoganna. Natangsit ti sumagmamano a tao a kenkuana.



Nakalako ni Samuel iti Libro ni Mormon iti maysa a lalaki nga agnagan iti Phineas Young. Binasa ni Phineas ti libro. Intedna ti Libro ni Mormon iti kabsatna a lalaki. Brigham Young ti nagan ti kabsatna.



Binasa ni Brigham Young ti Libro ni Mormon. Namati a pudno daytoy. Nasursurona ti maipapan iti ebanghelio ni Jesucristo. Impadamag da Phineas ken Brigham Young iti sumagmamano a gagayem ti maipapan iti Libro ni Mormon. Binasa dagiti gagayemda daytoy. Nagkameng iti Simbaan da Phineas ken Brigham Young ken dagiti gagayemda.





Iti di mabayag, nagbalin a propeta ti Simbaan ni Brigham Young. Tinulonganna dagiti Santo. Maysa isuna a naindaklan a dadaulo.



Nagawid ni Samuel Smith. Saanna a pinanunot a nakatulong ti misionna iti Simbaan. Dina ammo nga agbalinto ni Brigham Young a propeta iti maysa nga aldaw.





Maysa a rabii dimmagas ni Samuel iti maysa a pagdagusan. Kiniddawna iti akinkukua iti pagdagusan a gumatang iti Libro ni Mormon. Dinamag ti akinkukua no sadino ti nangalaan ni Samuel iti libro. Kinuna ni Samuel nga impatarus ti kabsatna daytoy manipud kadagiti sumagmamano a balitok a pinanid.

Nakapungtot ti akinkukua. Kinunana nga agul-ulbod ni Samuel. Imbagana a rummuar ni Samuel iti pagdagusan.



Iti dayta a rabii naturog ni Samuel iti sirok ti kayo ti mansanas.

Iti kamaudiananna nangted ni Samuel iti Libro ni Mormon iti maysa a dadaulo ti sabali a simbaan. Binasa ti dadaulo ken ti asawana ti libro. Ammoda a napateg daytoy.

# Da Joseph ken Emma

Maika-13 a Paset (Hulio 1830)




Nagnaed da Joseph ken Emma Smith iti Pennsylvania. Adda bassit a bangkagda. Agpimpinnateg da Joseph ken Emma. Nagtrabahoda a nasayaat tapno matulonganda ti tunggal maysa.



Adu ti parikut da Joseph ken Emma. Marigrigatda. Kayatda ti maaddaan iti annak. Naaddaan ni Emma iti maladaga a lalaki, ngem natay. Nagladingit ni Emma. Idi agangay naaddaanda ken Joseph iti ad-adu pay nga anak.



Nariribukan ni Joseph maipapan iti kaamaanna. Kayatna nga aywanan ida. Kayatna ti agmula iti bukbukel tapno adda taraon ti kaamaanna.



Naribukan pay ni Joseph maipapan iti Simbaan. Rirribuken dagiti dakes a tao dagiti Santo. Sumagmamano kadagiti dadaulo ti Simbaan ti naglemmeng tapno mayadayoda kadagiti dakes a tao. Nasken nga agrabaho a nasayaat ni Joseph tapno matulonganna dagiti Santo.

No dadduma nasken a panawan ni Joseph ti kaamaanna tapno matulongana dagiti Santo. Naldaangan ni Joseph a mangpanaw iti kaamaanna. Naladingitan ni Emma idi pimmanaw ni Joseph. Nadanagan maipapan kenkuana.



Dinamag ni Joseph ken ni Jesus no ania ti nasken nga aramidenna. Imbaga ni Jesus ken ni propeta Joseph a saan a madanagan maipapan kadagiti parikutna. Imbaga ni Jesus kenkuana a saan nga agbuteng kadagiti dakes a tao. Kinuna ni Jesus a kanayon a tulonganna ni Joseph.

Kinuna ni Jesus a nasken nga agmula ni Joseph iti bukbukel para iti kaamaanna. Kalpasanna nasken a mapan ket tulonganna dagiti Santo. Imbaga ni Jesus ken Joseph a saan nga agdanag maipapan iti kanen, pagan-anay, wenno kuarta. Ited dagiti Santo ken ni Joseph no ania ti kasapulanna.

Dkk 24:16-17

Dkk 24:3, 18



Inikkan ni Jesus ni Joseph Smith iti paltiing para ken Emma. Imbaga ni Jesus a naisangsangayan a babai ni Emma Smith. Pinilinan daytoy a mangaramid iti napateg a trabaho.

DkK 25:3



Kinuna ni Jesus a nasken a mannakaawat ni Emma no kasta nga adda parikut ni Joseph. Nasken a tulonganna nga agbalin a naragsak ken saan nga agdanag.

DkK 25:5



Imbaga ni Jesus a nasken nga isuro ni Emma Smith dagiti Santo. Nasken nga isurona ida nga agadal kadagiti nasantuan a kasuratan. Kinunana a tulonganto ti Espiritu Santo a mangammo no ania ti isurona.

DkK 25:7-8



Kinuna ni Jesus a nasken nga aramaten ni Emma ti panawenna nga agadal. Nasken nga agsursuro ken agsurat iti adu a banag.

DkK 25:8



Kiniddaw ni Jesus ken ni Emma a mangpili kadagiti kanta a kantaen dagiti Santo. Masapul a maimaldit dagiti kanta iti pagkantaan a libro.

DkK 25:11



Magustuan ti Dios a denggen ti panagkanta dagiti nalinteg a tao. Kararag kenkuana dagiti kantada. Mabendisionan dagiti nalinteg a tao nga agkanta para iti Dios.

DkK 25:12



Imbaga ni Jesus ken ni Emma nga agbalin a napakumbaba. Imbagana kenkuana nga ipategna ti asawana. Imbagana kenkuana nga agragsak gapu ta maaddaanto ni Joseph iti adu a naindaklan a bendision.

DkK 25:14



Imbaga ni Jesus ken ni Emma a saan a madanagan maipapan iti daytoy a lubong. Nasken nga agsagana para iti nasaysayaat a lubong idia langit. Nasken nga agragsak ken agtungpal kadagiti bilin ti Dios. Iti kasta makapanto iti langit.

DkK 25:13, 15



Kinuna ni Jesus a para amin kadagiti babbai dagiti banag nga imbagana ken ni Emma Smith.

Dkk 25:16

# Ti Propeta ken Dagiti Paltiing para iti Simbaan

Maika-14 a Paset (Septiembre 1830)



Immakar da Joseph Smith ken Emma iti Nueva York. Maysa a lalaki nga agnagan iti Hiram Page ti nagnaed sadiay. Kameng isuna ti Simbaan. Adda batona. Imbagana a nakatulong kenkuana ti bato maaddaan iti paltiing para iti Simbaan.



Adu a kameng ti Simbaan ti namati ken ni Hiram Page. Namati kenkuana ni Oliver Cowdery. Sumagmamano a tao a nangipagarup a maysa a propeta ni Hiram.

DkK 28: Pakauna



Dinamag ni Oliver ken ni Joseph ti maipapan ken ni Hiram Page. Nagkararag ni Joseph. Nangted ni Jesus iti paltiing ken ni Joseph para ken ni Oliver Cowdery. Kinunana a maysa laeng a tao ti maaddaan kadagiti paltiing para iti Simbaan. Ni Propeta Joseph Smith dayta a tao.

DkK 28:2



Kinuna ni Jesus a makaawat met dagiti tao iti paltiing para iti bagbagida. Ngem ti laeng propeta ti makaawat iti paltiing para iti sibubukel a Simbaan. Namati ni Oliver ken ni Joseph. Ammona a saan nga agpayso dagiti paltiing ni Hiram Page.

DkK 28:1-2, 8



Kalpasanna imbaga ni Jesus ken ni Oliver a kasaritana ni Hiram Page. Imbaga ni Oliver ken Hiram a saan a naggapu iti Dios dagiti paltiingna. Naggapu dagiti paltiing ken ni Satanas.

DkK 28:11



Kinuna ni Oliver nga inallilaw ni Satanas ni Hiram Page. Dimngeg ni Hiram ken ni Oliver. Nagbabawi daytoy.



Maymaysa laeng a tao ti umawat iti paltiing para iti Simbaan. Presidente ti Simbaan dayta a tao. Isu ti dadaulo ti Simbaan. Isu ti propeta ti Dios. Nasken nga agtungpal dagiti kameng ti Simbaan iti propeta.



# Maysa a Mision Kadagiti Lamanite

Maika-15 a Paset (Septiembre 1830)




Tinarigagayan ni Jesus nga ad-adu pay a tao ti dumngeg maipapan iti ebanghelio. Tinarigagayanna a mapan ti sumagmamano a Santo iti mision. Imbagana ken ni Oliver Cowdery a mapan agmision kadagiti Indian.



Maawagan iti Lamanite dagiti Indian iti Libro ni Mormon. Kayat ni Jesus a basaen dagiti Lamanite ti Libro ni Mormon. Inkarina iti adu a propeta a maaddaanto dagiti Lamanite iti Libro ni Mormon. Ita, panawenen tapno matungpal dayta a kari.

DkK 3:19–20



Isalaysay ti Libro ni Mormon kadagiti Lamanite ti maipapan kadagiti kapuonanda a nagbiag, dua ribu a tawenen ti napalabas. Salaysayenna kadagiti Lamanite dagiti kari ni Jesus kadakuada. Makatulong daytoy kadakuada a mamati ken ni Jesus ken ti ebangheliona. Daytoy ti mangisuro kadakuada nga agbabawi ken agbabuniag.

DkK 3:19–20



Tinarigagayan ti dadduma a lallaki ti kumuyog ken ni Oliver Cowdery. Kayatda nga ikasaba ti ebanghelio kadagiti Lamanite. Kayatda ti mangted iti Libro ni Mormon kadagiti Lamanite. Kinuna ti Apo a tallo kadagiti lallaki ti makapan.



Immuna a napan dagiti misionario iti sumagmamano nga Indian iti Nueva York. Naammuanda a sumagmamano laeng nga Indian ti makabasa. Inikkan ida dagiti misionario iti Libro ni Mormon.



Kalpasanna napan nangasaba dagiti misionario kadagiti sumagmamano nga Indian iti Ohio. Naragsakan dagiti Indian a nakanggeg ti maipapan iti Libro ni Mormon. Naragsakanda a nakaammo maipapan kadagiti kapuonanda.



Pimmanaw dagiti misionario iti Ohio. Napanda iti maysa a ciudad a maawagan iti Independence, iti Jackson County, Missouri. Adu ti Indian iti Missouri.



Inkasaba dagiti ti misionario ti ebanghelio kadakuada. Inikkanda dagiti Indian iti Libro ni Mormon. Daytoy ti nangparagsak unay kadagiti Indian. Nagyamanda kadagiti misionario iti Libro ni Mormon.



Saan a namati iti ebanghelio dagiti dadduma a tao iti Missouri. Saanda a namati iti Libro ni Mormon. Imbagada kadagiti misionario nga adaywanda dagiti Indian.



Kinuna dagiti tao a tiliwen dagiti soldado dagiti misionario no saanda a pumanaw. Naladingitan dagiti misionario iti daytoy a damag. Napanda insuro ti ebanghelio kadagiti dadduma a tao iti Missouri.



Maysa kadagiti misionario ti agnagan iti Parley P. Pratt. Nagsubli iti Kirtland tapno ibagana ken ni Joseph no ania ti inaramidda. Kinuna ni Parley a naaddaanda iti nasayaat a panagmision. Naisuroda ti ebanghelio iti adu a tao.

# Nasursuro da Joseph Smith ken Sidney Rigdon ti Maipapan iti Zion


Maika-16 a Paset (1830)



Bayat ti kaadda iti misiononda da Oliver Cowdery ken dagiti gagayemna, nagsardengda iti asideg ti Kirtland, Ohio. Naam-ammoda ti maysa a lalaki nga agnagan iti Sidney Rigdon. Maysa a dadaulo iti sabali a simbaan daytoy.



Inikkan dagiti misionario ni Sidney iti Libro ni Mormon. Insuroda kenkuana ti ebanghelio. Binasa ni Sidney Rigdon ti Libro ni Mormon. Nagkararag maipapan iti daytoy. Imbaga kenkuana ti Nailangitan nga Ama a pudno ti ebanghelio. Nabuniagan ni Sidney Rigdon.



Imbaga ni Sidney Rigdon kadagiti kameng ti simbaanna a dumngegda kadagiti misionario. Adu kadakuada ti nagpabuniag. Iti saan a mabayag, nabuniagan ti sangaribu a tao iti Kirtland.



Kayat ni Sidney Rigdon a maam-ammo ni Joseph Smith. Napan iti Nueva York tapno sarungkaranna ti propeta. Nangted ni Jesus iti paltiing ken ni Joseph Smith para ken ni Sidney Rigdon. Kinuna ni Jesus nga agaramidto ni Sidney Rigdon iti napapateg a banag. Isuronanto ti ebanghelio iti adu a tao. Buniagannanto ida ket itednanto kadakuada ti sagut ti Espiritu Santo.

DkK 35:4-6

Imbaga ni Jesus kada Joseph ken Sidney a nabalbaliwanen ti sumagmamano a paset ti Biblia adun a tawen ti napalabas. Awan iti Biblia dagiti sumagmamano a napapateg nga estoria. Ibaganto ni Jesus ken ni Joseph dagiti estoria nga awan iti Biblia. Nasken nga isurat ni Sidney Rigdon dagitoy.

DkK 35:20



Insalaysa ti maysa kadagiti estoria ti maipapan ken ni Enoc. Maysa a naindaklan a propeta ni Enoc. Insurona dagiti taona nga agbalin a nalinteg unay. Inawagan ti Apo dagiti nalinteg a tao ni Enoc iti Zion. Nangbangon dagiti tao ni Enoc iti maysa a ciudad. Ninagananda daytoy a ciudad iti Zion. Iti Zion, agpipinnateg dagiti tao. Agiinnaywanda iti tunggal maysa. Awan ti marigrigat wenno saan a naragsak.

Moises 7:18-19

Tinungpal ti tunggal maysa iti Zion dagiti bilin ti Nailangitan nga Ama. Nalinteg unay dagiti tao ta immay ni Jesus nakipagnaed kadakuada. Kalpasanna innala ti Dios dagiti tao iti Zion a makipagnaed kenkuana idiyang langit.

Moises 7:69



Imbaga ni Jesus ken ni Joseph Smith a suruanna dagiti taona nga agbalin a nalinteg. Nasken nga ikarigatanda ti mangbangon iti sabali pay a ciudad a maawagan iti Zion. Napintasto ti ciudad. Ipategto ti tunggal maysa ti Nailangitan nga Ama idiyay. Agpipinnategto ti tunggal maysa. Naragsakto ti tunggal maysa iti Zion. Umayto makipagnaed ni Jesus kadakuada.

Dkk 45:64–71

# Dagiti Immuna nga Obispo ti Simbaan

Maika-17 a Paset (Pebrero 1831)



Sumagmamano a dakes a tao ti nagnaed iti Nueva York. Natangsitda kadagiti kameng ti Simbaan ket kayatda a pumanawda. Imbaga ni Jesus a pumanaw ni Joseph Smith iti Nueva York ket mapan iti Kirtland, Ohio.



Napan da Joseph Smith, ni Emma nga asawana, Sidney Rigdon, ken Edward Partridge iti Kirtland. Nakipagnaed da Emma ken Joseph iti maysa a kameng ti Simbaan. Newel K. Whitney ti naganna.



Adda sangaribu a kameng ti Simbaan iti Kirtland. Inkagumaanda a tinungpal ti Dios. Ngem dida unay maawatan ti amin maipapan iti ebanghelio.

DkK 41: Pakauna



Nagkararag ni Joseph iti Nailangitan nga Ama. Nangted ni Jesus ken ni Joseph iti paltiing. Imbaga ni Jesus ken ni Joseph a kasapulan dagiti Santo iti Kirtland ti maysa nga obispo. Nasken nga aramaten ti obispo ti panawenna a mangisuro ken tumulong kadagiti Santo. Ni Edward Partridge ti immuna nga obispo ti Simbaan.

DkK 41:9

Imbaga ni Jesus ken ni Joseph no ania ti nasken nga aramiden ti maysa nga obispo iti Simbaan. Nasken a saluadan ti obispo ti pagidulinan iti taraon. Nasken nga agumong dagiti Santo kadagiti taraon ken lupot iti pagidulinan. No asino man kadagiti Santo ti makasapul iti taraon wenno lupot, nasken nga ikkan ida ti obispo.

DkK 72:10-12



Nasken a saluadan ti obispo ti kuarta para iti Simbaan. Nasken a mangted dagiti Santo iti kuarta iti obispo. Nasken a bayadan ti obispo ti gastos para iti Simbaan. Nasken nga ikkana iti kuarta ti sumagmamano a marigrigat a Santo.

DkK 72:10-12

Nasken nga ipateg ti obispo dagiti Santo. Nasken nga ikagumaanna ti tumulong kadakuada. Nasken a makipagkita dagiti lallaki nga addaan iti kinasaserdote. Nasken a pagsasaritaanda ti rumbeng nga aramidenda a mangtulog kadagiti Santo.

DkK 72:5, 11





Adu pay a tao ti nagkameng iti Simbaan. Kasapulan ti Simbaan ti ad-adu pay nga obispo. Ni Newel K. Whitney ti maikadua nga obispo ti Simbaan.

Ti obispo isu ti dadaulo dagiti Santo iti tunggal purok. Kasla obispo ti presidente ti sanga. Ti presidente ti sanga isu ti pangulo dagiti Santo iti tunggal sanga.

DkK 72:8



Rinibu itan ti obispo iti Simbaan.

# Ti Linteg ti Simbaan

Maika-18 a Paset (4 Pebrero 1831)



Nangted ti Apo iti napateg unay a paltiing ken ni Joseph Smith iti Kirtland. Maawagan daytoy iti linteg ti Simbaan.

DkK 42: Pakauna



Kinuna ti Apo a nasken nga isuro dagiti Santo ti ebanghelio iti amin a tao. Nasken a maordenan iti kinasasersote ti amin a lallaki a mapan iti mision. Nasken nga ordenan ida dagiti dadaulo ti Simbaan.

DkK 42: Pakauna, 7, 11



Nasken nga agkuyog nga agrabaho ti dua a misionario. Nasken a mangisuroda manipud iti Biblia ken iti Libro ni Mormon. Nasken nga agkararagda tapno adda kadakuada ti Espiritu Santo. Ibaga ti Espiritu Santo kadakuada no ania ti isuroda.

DkK 42:6, 14



Nasken a buniagan dagiti misionario dagiti tao a mamati iti ebanghelio.

D&C 42:7



Kinuna ti Apo a nasken a tungpalen dagiti kameng ti Simbaan dagiti Sangapulo a Bilin. Nasken a dida pumatay. Nasken a dida agul-ulbod. Nasken a dida agsasao iti dakes maipapan iti dadduma a tao. Nasken a dida agaramid iti ania man a dakes a banag.

D&K 42:18–27



Nasken nga ibinglayan dagiti Santo dagiti tao iti banag nga adda kadakuada. Ti panangibinglay iti dadduma ket kasla panangibinglay met ken ni Jesus.

D&K 42:30–38



Nangted ni Jesus kadagiti Santo iti dadduma pay a bilin. Awan koma ti Santo ti nasken a mangpanunot a nasaysayaat isuna ngem iti sabali a tao. Nasken a nadalus dagiti Santo. Nasken nga agrtrahoda a nasayaat.

D&K 42:40–42



Rumbeng nga aywanan dagiti Santo dagiti masakit a kameng. Nasken a bendisionan dagiti lallaki nga addaan iti kinasaserdote dagiti masakit a kameng. Malaingan dagiti masakit nga adda pammatina. Saandanto a matay no di pay oras ti ipapatayda.

DkK 42:43–44, 48



Nasken a di agbuteng a matay dagiti nalinteg a Santo. Ti patay ket nakaskasdaaw kadagiti nalinteg a tao.

DkK 42:46



Adunto ti paltiing nga ited ni Jesus kadagiti nalinteg a kameng. Adunto a banag ti isurona kadakuada. Ammodanto no kasano ti agbalin a nakaragratsak. Imbaga ti Apo kadagiti Santo a tungpalenda ti linteg ti Simbaan.

DkK 42:61–62, 66

# Ti Maikadua a Yaay ni Jesucristo

Maika-19 a Paset (Pebrero–Marso 1831)



Sumagmamano kadagiti tao iti Kirtland, Ohio ti agsasao iti inuulbod maipapan kadagiti Santo. Dagitoy a tao ti di mangayat nga agsursuro iti ebanghelio.

DkK 45: Pakauna



Imbaga ni Jesus ken ni Joseph Smith nga agsublinto ditoy daga iti saan a mabayag. Sakbay nga agsubli, nasken a nangngegan ti amin ti ebanghelio. Nasken nga agtrabaho a sipapasnek dagiti Santo a mangisuro iti ebanghelio. Nasken nga agbalinda a nalalaing a misionario.

DkK 43: Pakauna, 20



Idi nagnaed ni Jesus ditoy daga, imbagana kadagiti Apostolna no anianto ti mapasamak sakbay nga agsubli manen.

DkK 45:16



Imbaga ni Jesus kadagiti Apostolna a madadaelto ti templo iti Jerusalem. Agnaedto dagiti Judio kadagiti sabali a pagilian. Adunto ti matay a Judio. Adunto ti gubat. Saanto nga agpipinnateg dagiti tao. Awanto ti pudno a Simbaan ditoy daga.

DKK 45:17-24, 27



Kalpasanna rugianto manen ti Nailangitan nga Ama nga ipatakder ti pudno a Simbaan ditoy daga. Kayariganto ti silaw iti kasipngetan ti ebanghelio ni Jesucristo.

DkK 45:28



Adun a bambanag nga insalaysay ni Jesus ti napasamaken. Adu pay dagiti banag nga insalaysayna ti mapasamakto. Adunto ti tao nga agririnnanget. Adunto dagiti agsakit. Addanto ginggined. Aglidemto ti init. Kayariganto ti dara ti bulan. Agtinnagto dagiti bituen.

D&C 45:26, 29, 31, 33, 42



No mapasamakto dagitoy a banag, ammonto dagiti nalinteg a tao nga asidegen ti yaay ni Jesus. Kayatdanto nga umay isuna. Adunto a Judio ti agsubli iti Jerusalem. Mangngeganganto ti ebanghelio.

DkK 45:25, 38–39



Buklento manen dagiti nalinteg a Santo ti baro a ciudad ti Zion. Natalgeddanto iti Zion. Saandanto nga agririnnanget. Naragsakdanto unay. Agkantadanto iti kanta a makaparag-o. Saanto a makapan dagiti dakes a tao iti Zion.

DkK 45:65–71



Agsublinto manen ni Jesus ditoy daga. Makitanto isuna dagiti nalinteg a tao. Umayto babaen ti nalawag nga ulep. Agungarto amin dagiti nalinteg a tao a natayen. Sabatendanto ni Jesus iti ulep. Kakuyogdanto iti panagsublina ditoy daga.

DkK 45:44-46





Umayto ni Jesus iti Jerusalem. Agtakderto iti rabaw ti bantay sadiay. Aggduanto ti bantay. Magunggonto ti daga. Magunggonto dagiti langit. Madadaelto dagiti dakes a tao.

DkK 45:48-50



Makitanto dagiti tao iti Jerusalem ni Jesus. Damagendanto: “Ania dagiti sugat iti ima ken sakam?” Kunananto: “Siak ni Jesus a nailansa iti krus. Siak ti Anak ti Dios.” Ket agsangitto dagiti tao. Maladingitandanto ta mailansa ni Jesus iti krus.

DkK 45:51-53



Kasta unayto ti ragsak dagiti nalinteg a tao a makakita ken ni Jesus. Kukuadanto ti sibubukel a lubong. Didanto paallilaw ken ni Satanas. Natibkerdanto. Maaddaandanto iti adu nga annak. Dumakkelta dagiti annakda ket agtungpalda iti Dios. Makipagnaedto ni Jesus kadagiti nalinteg a tao iti uneg ti sangaribu a tawen. Isunto ti arida.

Dkk 45:56-59



Imbaga ni Jesus ken ni Joseph Smith a mangipatulod kadagiti misionario a mangisuro iti tunggal maysa maipapan iti panagsublina. Kinunana a nasken nga agsagana dagiti Santo. Nasken nga agkararag ken agayunoda. Nasken nga agsisinnuroda maipapan kadagiti bilin.

DkK 43:19–21; 88:77



Kinuna ni Jesus a nasken nga agkalikagum nga umasideg dagiti Santo kenkuana. Iti kasta asidegto isuna kadakuada. No agkiddaw dagiti Santo iti tulong ti Dios, tulongannanto ida.

DkK 88:63



Nasken nga aramiden dagiti Santo ti amin a kabaelanda a makatulong ken ni Jesus. No tulongan dagiti tao ni Jesus, agbalinda a kas kenkuana. Iti kasta nakasaganadanto para iti maikadua a yaayna.

Moroni 7:48

# Dagiti Sagut ti Espiritu Santo

Maika-20 a Paset (8 Marso 1831)




Sumagmamano kadagiti Santo ti saan a makaawat iti maipapan iti Espiritu Santo. Imbaga ni Jesus ken ni Joseph Smith ti maipapan iti Espiritu Santo. Tulongan ti Espiritu Santo ti Nailangitan nga Ama ken ni Jesus. Awan bagi a nagtagilasag ken tulang ti Espiritu Santo. Isu ket maysa nga espiritu.

DkK 130:22




Kinuna ni Jesus a tulongan ti Espiritu Santo dagiti nalinteg a tao. Tulonganna ti Dios a mangted kadakuada kadagiti naisangsangayan a sagut. Addaan naisangsangayan a sagut ti tunggal Santo. Nasken nga aramaten dagiti Santo dagiti sagutda a mangtulong iti tunggal maysa. Imbaga ni Jesus ken ni Joseph Smith no ania dagitoy a sagut.

DkK 46:9-12



Itd ti Espiritu Santo kadagiti sumagmamano a Santo ti sagut ti pammaneknek. Ammoda nga anak ti Dios ni Jesucristo. Ammoda a natay gapu kadayo. Naikkan dagiti dadduma a Santo iti sagut a mamati kadagiti pammaneknek maipapan ken ni Jesus.

DkK 46:13–14



Sumagmamano a Santo ti naikkan iti sagut nga agbalin a dadaulo.

DkK 46:15



Sumagmamano a Santo ti naikkan iti sagut a mangammo no ania dagiti nalinteg nga espiritu ken dakes nga espiritu. Imbaon ti Dios dagiti nalinteg nga espiritu. Parparagsakendatayo. Kayarig dagitoy ti silaw. Imbaon ni Satanas dagiti dakes nga espiritu. Patangsitenda ti riknatayo. Kayarig dagitoy ti sipnget.

DkK 46:16, 23; 50:23–24



Sumagmamano a Santo ti sinagutan ti Espiritu Santo nga agbalin a masirib. Kabaelanda ti agpili kadagiti nasayaat. Sumagmamano a Santo ti naikkan iti sagut nga agsursuro kadagiti banag. Maisuroda no ania ti ammoda kadagiti dadduma a Santo. Maisuroda dagiti dadduma a Santo nga agpili iti nasayaat.

DkK 46:18



Sumagmamano a Santo ti naikkan iti sagut ti pammati a maagasan. Naikkan dagiti dadduma a Santo iti sagut nga agagas kadagiti masakit a tao. Ikkan pay ti Espiritu Santo dagiti dadduma a Santo iti sagut nga agaramid kadagiti milagro. Ipakita dagiti milagro ti bileg ti Dios.

DkK 46:19-21



Naikkan dagiti dadduma a Santo iti sagut nga agsao iti pagsasao a dida ammo.

DkK 46:24



Mangted ti Espiritu Santo kadagiti dadduma a Santo iti sagut a mangammo no ania ti mapasamak sakbay a mapasamak dagitoy.

DkK 46:22



Sumagmamano a Santo ti naikkan iti adu a sagut.

DkK 46:29



Ammono ti obispo no ania dagiti sagut nga adda iti tunggal Santo. Ammono no asino dagiti agbalin a nalaing a mannursuro. Ammono no asino ti makaaramid iti milagro. Ammono no asino kadagiti Santo ti mangipatpateg iti Dios ken mangtungtungpal kadagiti bilin ti Dios.

DkK 46:27



Mabalin a maaddaan iti adu a sagut dagiti nalinteg a Santo. Nasken nga agrabahoda a manggun-od kadagiti sagut a kasapulanda. Aggapu amin dagitoy a sagut iti Dios.

DkK 46:9, 28, 32

# Napan ti Propeta Idiay Missouri

Maika-21 a Paset (Mayo–Hunio 1831)



Adu kadagiti Santo ti nagnaed pay laeng iti Nueva York. Adda da Joseph Smith ken Sidney Rigdon iti Kirtland, Ohio. Imbaga ni Joseph kadagiti Santo iti Nueva York a mapanda iti Ohio. Tinungpalda ti Propeta. Napanda iti Ohio.



Imbaga ni Jesus ken ni Joseph nga ibinglayan dagiti Santo iti Kirtland iti daga dagiti Santo nga aggapu iti Nueva York. Adu ti daga ni Leman Copley. Inkarina a mangibinglay. Immakar ditoy dagiti Santo ti Nueva York.

DkK 48:2






Saan a tinungpal ni Lemay Copley ti karina. Dina kinayat nga ikkan iti dagana dagiti Santo a naggapu iti Nueva York. Nasken a pumanawda. Awan ti lugar a pagyananda.

Ni Newel Knight ti dadauloda. Dina ammo ti aramidenna. Napanna kinita ni Propeta Joseph. Dinamagna ken ni Joseph no ania ti nasken nga aramiden dagiti Santo.



Imbaga ti Apo ken ni Joseph a mapan dagiti Santo a naggapu iti Nueva York idia Missouri iti saan a mabayag.

Dkk 54:7-9



Sakbay a pimmanawda, nagkomperensia dagiti Santo iti Kirtland. Nagpaut ti komperensia iti tallo nga aldaw. Nangted ti Apo ken ni Joseph Smith iti sumagmamano a napateg a paltiing.

Imbaga ti Apo ken ni Joseph nga ordenanna dagiti umuna a nangato a saserdote iti Simbaan. Addaan iti Kinasaserdote a Melchizedek dagiti nangato a saserdote. Dadauloda iti Simbaan. Kaaduan kadagiti dadaulo ti Simbaan ti naordenan iti nangato a saserdote.



Imbaga ti Apo a sumagmamano kadagiti lallaki ti nasken a mapan iti mision iti Missouri. Nasken nga ikasabada ti ebanghelio iti dalanda. Idi nalpas ti komperensia, napan dagiti misionario iti Missouri.

Imbaga ti Apo ken ni Joseph a maangayto ti sumaruno a komperensia ti Simbaan iti Jackson County, Missouri. Imbagana ken ni Joseph ken dagiti gagayemna a mapanda sadiay. Maipatakdero iti Jackson County ti Zion. Ipakitanto kadakuada ni Jesus no sadino ti pakaipatakderan ti ciudad ti Zion.

Dkk 52:9-10


Dkk 52:1-5

# Dagiti Santo iti Missouri

Maika-22 a Paset (Hulio–Agosto 1831)



Napan da Propeta Joseph Smith, Sidney Rigdon, Edward Partridge, ken dadduma pay iti Missouri. Naragsakda unay a napan. Kayatda nga ipatakder ti ciudad ti Zion. Kayatda nga ipakita ti Apo kadakuada ti umno a lugar.



Nagluganda iti bilog iti dadduma a paset ti pannagnada. Idi nakadanonda iti Missouri, tinariagagayan ni Joseph ti magna. Ammona a sagrado ti daga ti Missouri. Kayatna a makita daytoy.



Nagna da Joseph ken dagiti gagayyemna iti 300 a milia a napan iti Jackson County. Napudot, ngem dida inkankano. Kayatda ti mapan sadiay tapno ipatakderda ti Zion.



Napan ti propeta ken dagiti gayyemna iti Jackson County, Missouri. Sinabat ida dagiti misionario iti Kirtland.



Kalpasan ti sumagmamano nga adlaw, napan met dagiti Santo a naggapu iti Nueva York iti Jackson County. Naragsakan ti tunggal maysa iti kaaddada sadiay.



Imbaga da Propeta Joseph ken ni Obispo Edward Partridge no ania ti aramiden dagiti tao. Sumagmamano kadakuada ti nasken a gumatang iti daga iti Missouri. Nasken a rugian da Oliver Cowdery ken William W. Phelps ti mangipatakder kadagiti eskuela. Nasken nga agsuratda kadagiti libro a kabaelan a basaen dagiti babassit nga ubbing.

DkK 55:4



Kayat a maammuan ni Joseph no sadino ti pakaipatakderan ti siudad ti Zion. Nagkararag iti Nailangitan nga Ama. Nasungbatan ti kararagna.



Imbaga ti Apo a maipatakdero ti Zion iti asideg ti ciudad ti Independence iti Jackson County, Missouri. Imbaga ti Apo ken ni Joseph no sadino ti pakaipatakderan ti templo. Imbagana a saan pay a marugian ti Zion iti mabiit. Adu pay a pannubok ti paglasatan dagiti Santo. Ngem maipatakderda ti Zion no addaanda iti umdas a pammati.

DkK 57:1-3; 58:2-4



Imbaga ti Apo ken ni Joseph a nasken a tungpalen dagiti Santo ti linteg ti Missouri. Nasken a tungpalenda dagiti bilin ti Dios. Nasken nga agaramidda kadagiti nasayaat a banag nga awan ti mangibagbaga kadakuada. Nasken nga agbabawi dagiti Santo kadagiti basolda. Saanen a malagip ti Apo dagiti basol ti tao no agbabawida.

DkK 58:21, 27–29, 42




Imbaga ti Apo a nasken nga idaton ni Sidney Rigdon ti daga. Dinamag ni Sidney Rigdon kadagiti Santo no agyamanda para iti daga. Dinamagna no tungpalenda met la amin dagiti bilin ti Dios. Simmungbat dagiti Santo iti “Wen.” Ket nagkararag ni Sidney Rigdon ken indatonna ti daga.

DkK 58:57



Nagmiting iti sumaruno nga aldaw da Joseph Smith, Oliver Cowdery, Sidney Rigdon ken sumagmamano kadagiti gagayyemda. Nagsasarakda iti naisangsangayan a lugar iti Independence. Binasada dagiti nasantuan a kasuratan. Nagkararagda kalpasanna. Indaton ni Joseph Smith ti lugar a pakaipatakderanto ti templo.



Napan amin dagiti Santo iti Missouri iti maysa a komperensia. Napnuanda iti Espiritu Santo. Imbaga ni Joseph kadagiti Santo a bendisionan ida ti Dios no tungpalenda la ketdi dagiti karida.



Kalpasan ti sumagmamano nga aldaw, inikkan ni Jesus ni Joseph iti sabali pay a paltiing. Kinunana a naisangsangayan nga aldaw ti Domingo. Ti Domingo ti aldaw a nasken a panagaramid tayo kadagiti banag a pakalagipantayo ken ni Jesus. Nasken a saantayo nga agtrabaho iti Domingo. Nasken a mapantayo iti Simbaan ket awatentayo ti sakramento. Nasken nga agbabawitayo kadagiti basoltayo. Nasken a sarungkarantayo dagiti masakit. Nasken nga agyamantayo kadagiti naawattayo a parabur. Nasken a tungpalentayo a kanayon dagiti bilin ti Dios.

DkK 59:3-15



Addanto amin kadagiti Santo a mangaramid kadagitoy a banag dagiti nasayaat a banag a kasapulanda. Addaandanto iti taraon, pagan-anay, balay, ken minuyongan. Naragsakdanto. Addaandanto iti talna iti daytoy a biag. Addaandanto iti biag nga agnanayon.

DkK 59:15-19, 23





# Ti Doktrina ken Katulagan

Maika-23 a Paset  
(Agosto–Nobiembre 1831)



Pimmanaw ni Joseph Smith ken sumagmamano kadagiti Santo iti Missouri. Nagsublida iti Kirtland, Ohio. Adda komperensia dagiti Santo iti Ohio.



Nangted ti Apo iti adu a paltiing ken ni Joseph Smith. Insurat ni Joseph dagiti paltiing. Kayat dagiti Santo a mailibro dagiti paltiing. Naawagan ti libro iti Libro dagiti Bilin. Iti saan a nabayag, naawagan daytoy iti Doktrina ken Katulagan.



Imbaga ni Jesus ken ni Joseph a napateg unay dagiti paltiing. Naggapuda iti Dios. Pudno ti amin a banag nga adda kadagitoy. Inikkan ni Jesus ni Joseph iti dua pay a paltiing. Maipapan ti maysa a paltiing iti punganay ti Doktrina ken Katulagan. Maipapan iti paggibusan ti maysa. Ibagi dagitoy kadayo a napateg a libro ti Doktrina ken Katulagan.

DKK 67: Pakauna; 133: Pakauna



Isalaysay ti Doktrina ken Katulagan iti tunggal maysa nga adda manen ditoy daga ti pudno a Simbaan ni Jesucristo.



Isalaysay ti Doktrina ken Katulagan ti maipapan iti kinasaserdote. Adda manen ti bileg ti kinasaserdote kadagiti nalinteg a lallaki.



Isalaysay ti Doktrina ken Katulagan ti maipapan iti Libro ni Mormon. Mabasa dagiti tao ti Libro ni Mormon. Maammuan ti tunggal maysa ti maipapan iti ebanghellio ni Jesucristo.



Isuro pay ti Doktrina ken Katulagan dagiti Santo nga agsisinnaranay. Mapnonto iti Espiritu Santo dagiti Santo a sumaranay.

DKK 70:14



Isuro ti Doktrina ken Katulagan dagiti bilin ti Dios. Makaipatakder iti Zion dagiti Santo nga agtungpal kadagitoy a bilin. Makapagbiagda iti agnanayon iti sidong ti Nailangitan nga Ama ken ni Jesus.



Imbaga ni Jesus a nasken a basaen dagiti amin a kameng ti Simbaan ti Doktrina ken Katulagan.

DkK 1:37



Kalpasan ti komperensia napan ni Oliver Cowdery iti Missouri. Intugotna dagiti paltiing nga insurat ni Joseph. Intedna dagitoy iti maysa nga agimalmaldit. Imbagana iti agimalmaldit nga imalditna ti tallo a ribu a libro, ngem pinasardeng dagiti dakes a lallaki ti imprenta ken dinadaelda ti kaaduan kadagiti panid.



Naipablaak iti kamaudiananna ti Doktrina ken Katulagan idi 1835. Nagyaman dagiti Santo iti Nailangitan nga Ama gapu kadagiti paltiing iti Doktrina ken Katulagan. Inkarida nga ibagada kadagiti sabali a tao a naggapu iti Dios dagiti paltiing.

# Nasken nga Isuro Dagiti Nagannak Dagiti Annakda

Maika-24 a Paset (Nobiembre 1831)



Sumagmamano a Santo iti Ohio ti napan nangkita ken ni Joseph Smith. Nangted ni Jesus ken ni Joseph iti paltiing para kadakuada. Imbaga ni Jesus kadagiti Santo no kasano ti agbalin a nasayaat a nagannak.

DkK 68: Pakauna



Imbaga ni Jesus a nasken a mabuniagan dagiti ubbing nga agtawen iti walo. Imbilin ni Jesus kadagiti nagannak nga isuroda kadagiti annakda ti maipapan iti ebanghelio sakbay a mabuniaganda.

DkK 68:25



Nasken nga ammo dagiti ubbing ni Jesus. Nasken nga adda pammatida kenkuana.

DkK 68:25



Nasken nga ammo dagiti ubbing no kasano ti agbabawi.

DkK 68:25



Nasken nga ammo dagiti ubbing ti maipapan iti panagbuniag. Nasken a masursuroda ti agbalin a nasayaat a kameng ti Simbaan.

DkK 68:25, 28



Nasken nga ammo dagiti ubbing ti agkararag. Nasken nga ammoda ti dumngeg iti Espiritu Santo.

DkK 68:28

Nasken nga ammo dagiti ubbing dagiti bilin ti Dios. Nasken a tungpalenda dagiti bilin.

DkK 68:28



Nasken nga isuro dagiti nagannak kadagiti annakda dagitoy a banag. Mababalawto dagiti nagannak kadagiti pagbasolan dagiti annakda no saanda nga isuro kadakuada ti maipapan iti ebanghelio.

DkK 68:25

# Nagmision da Joseph Smith ken Sidney Rigdon

Maika-25 a Paset  
(Disiembre 1831–Enero 1832)



Sumangmamano a tao ti saan a nangayat iti Simbaan ni Jesucristo. Nagipadamagda iti kinaulbod maipapan iti daytoy. Sumagmamano kadagiti kinaulbod ti naimaldit iti maysa a pagiwarnak. Imbaga ni Jesus kada Joseph Smith ken Sidney Rigdon nga agmisionda kadagiti kabangibang nga ili. Mabalinda nga ibaga kadagiti tao ti kinapudno maipapan iti Simbaan.

DkK 71:1–4



Tinungpal da Joseph ken Sidney ni Jesus. Pinanawanda dagiti pagtaenganda. Napanda kadagiti adu nga ili. Nagsarita da Joseph ken Sidney kadagiti taripnong iti simbaan. Insuroda dagiti tao kadagiti pagtaenganda.



Imbaga da Joseph ken Sidney kadagiti tao ti maipapan kadagiti bilin ti Dios. Imbagada kadagiti tao maipapan iti pammaneknekda maipapan ken ni Jesucristo. Imbagada kadagiti tao nga agbabawida. Nalpas da Joseph ken Sidney ti panagmisionda. Nagawidda kadagiti kaamaanda.

# Dagiti Tallo a Pagarian ti Langit

Maika-26 a Paset (16 Pebrero 1832)



Agbasbasa da Joseph Smith ken Sidney Rigdon iti Baro a Tulag iti maysa nga aldaw. Ibaga ti Baro a Tulag a mapan dagiti nasayaat a tao iti langit kalpasan ti panagungarda. Pampanunoten ni Joseph no mapan amin dagiti tao iti maymaysa a lugar iti langit. Nagkararag da Joseph ken Sidney. Dinawatda iti Nailangitan nga Ama nga ibagana kadakuada ti maipapan iti Langit.

DkK 76: Pakauna



Sinungbatan ti Nailangitan nga Ama ti kararagda. Adda naipaltiing kadakuada. Maysa a napintas a parmata. Iti parmata, nakita da Joseph ken Sidney ti langit. Nakitada ni Jesus a nabungon iti lawag. Kalpasanna nakitada dagiti anghel a nanglikmut ken ni Jesus ken ti Nailangitan nga Ama.

DkK 76: Pakauna, 19–21



Kinuna da Joseph ken Sidney nga ammoda a nagbiag ni Jesus. Nakitada isuna! Nakangngeg da Joseph ken Sidney iti maysa a timek. Imbaga ti timek a ni Jesus ti Anak ti Dios. Immay isuna ditoy lubong. Impakita ni Jesus kadagiti amin a tao no kasano ti agbiag tapno makadennadanto manen iti Nailangitan nga Ama.

DkK 76:22–24





Kalpasanna nakita da Joseph ken Sidney ti lugar a papanan dagiti tao kalpasan ti panagungarda. Adda tallo a lugar a papanan dagiti tao iti langit. Mapan dagiti nalinteg a Santo iti celestial a pagarian iti langit kalpasan ti panagungarda. Ti celestial a pagarian ti lugar a pagnaedan ti Nailangitan nga Ama ken ni Jesus.

DkK 76:50-70



Adda pammati dagiti nalinteg a Santo ken ni Jesus idi nagnaedda iti daga. Nabuniaganda. Insuro ida ti Espiritu Santo no kasano ti agbiag.

DkK 76:51-54

Adu ti parikut dagiti nalinteg a Santo, ngem adda pammatida. Tinulongan ida ni Jesus idi adda parikutda. Nagtrabahoda a sipapasnek. Nagbabawida ket tinungpalda dagiti bilin ti Dios. Sinulisog ida ni Satanas, ngem dina sinurot ni Satanas.

DkK 76:51-54



Agbalinto a kas iti Nailangitan nga Ama ken ni Jesus dagiti nalinteg a Santo. Maammuandanto ti amin a banag. Agbalindanto a naan-anay. Agbalindanto a dios.

DkK 76:58-60



Kalpasanna nakakita manen da Joseph ken Sidney iti sabali a lugar. Maawagan daytoy iti terestrial a pagarian ti langit. Sumagmamanonto a tao ti mapan iti terestrial a pagarian kalpasan ti panagungarda.

DkK 76:71



Nasayaat a tao idi addada iti daga dagiti tao iti terestrial a pagarian. Ngem saanda a nalinteg a Santo. Awan ti pammatida ken ni Jesus. Tinungpalda dagiti dadduma a bilin ti Dios. Ngem dida tinungpal amin dagiti bilin.

DkK 76:75



Saanda a namati iti ebanghelio idi nangngeganda daytoy ditoy daga. Namatida iti ebanghelio kalpasan ti ipapatayda.

DkK 76:73-74



Makitanto dagiti tao iti terestrial a pagarian ni Jesus. Ngem didanto makapagnaed iti sidong ti Nailangitan nga Ama wenna ni Jesus. Saandanto nga agbalin a dios.

DkK 76:77-79



Nakita da Joseph ken Sidney ti maikatlo a lugar. Maawagan daytoy iti telestial a pagarian ti langit. Saan a nalinteg idi addada ditoy daga dagiti tao a mapan iti telestial a pagarian.

DkK 76:81, 103




Saan a namati ken ni Jesus dagitoy a tao. Saanda a namati kadagitoy propeta. Saanda a nabuniagan. Saanda a tinungpal dagiti bilin ti Dios.

DkK 76:81-82, 102-103



Saan a makita dagiti tao a mapan iti telestial a pagarian ni Jesus wenno ti Nailangitan nga Ama. Sarungkaranto ida dagiti anghel. Isuronto ida ti Espiritu Santo. Maammuan dagiti tao iti telestial a pagarian ti maipapan ken ni Jesus ken ti Nailangitan nga Ama. Ngem saandanto a pulos makapagnaed kadakuada.

DkK 76:86



Agungarto dagiti tao a mapan iti celestial ken iti terestrial a pagarian no umayto manen ni Jesus. Saanto nga agungar dagiti tao a mapan iti telestial a pagarian inton umay manen ni Jesus. Masapul nga agurayda iti sangaribu a tawen sakbay nga agungarda.

Dkk 76:63, 85, 102



Nakita da Joseph ken Sidney no sadino ti papanan dagiti dakes a tao. Kaduadanto ni Satan. Saanda a mabalin ti makidenna iti Nailangitan nga Ama, ken ni Jesus wenno iti Espiritu Santo.

DkK 76:35-37



Nasuruan iti ebanghelio iti daga dagiti tao a kaduanto ni Satan. Insuro ti Espiritu Santo ida iti maipapan ken ni Jesucristo.

DkK 76:35



Ammoda a nagbiag ni Jesus. Ammoda a natay ni Jesus gapu kadayo. Ngem sinulisog ni Satan dagitoy a tao. Inallukoyna ida nga agaramid kadagiti dakes a banag. Tinungpalda ni Satan. Insardengda ti dimngeg iti Espiritu Santo. Insardengda ti namati ken ni Jesus. Nagbalinda a nadakes unay. Kadennadanto nga agnanayon ni Satan.

DkK 76:31-35



Nakakita pay iti dadduma a banag da Joseph ken Sidney iti parmatada. Imbaga ni Jesus kadakuada a saanda nga isurat amin a banag a nakitada. Masaksian dagiti nalinteg unay a Santo iti mismo a bagida dagitoy a banag. Isuronto ida ti Espiritu Santo. Nagyaman da Joseph ken Sidney iti Dios iti daytoy napintas a parmata.

DkK 76:113-119

# Ti Trabaho ni Propeta Joseph Smith

Maika-27 a Paset (Marso 1832)



Adda singin a maladaga da Joseph Smith ken ti asawana a ni Emma. Nagsakit ket natay dagiti maladaga. Adda met singin a maladaga dagiti gayyem ni Joseph, ngem natay ti ina dagitoy a singin. Inampon da Joseph ken Emma dagiti maladaga ket inaywananda ida.



Imbaga ni Jesus ken ni Joseph a basaenna ti Biblia. Binalbaliwan dagiti tao ti sumagmamano a balikas iti Biblia. Imbaga ni Jesus ken ni Joseph dagiti umno a balikas a maisurat iti Biblia. Tinulongan ni Sidney Rigdon ni Joseph a nangisurat kadagiti balikas a kayat ni Jesus iti Biblia.



Saan a naawatan ni Joseph Smith ti sumagmamano a paset ti Biblia. Nagsaludsod iti Dios. Sinungbatan amin ni Apo Jesucristo dagiti saludsod. Insurat ni Joseph dagiti sungbat tapno mabasa dagiti Santo.

DkK 77; 113



Naragsakan ni Jesus iti trabaho ni Joseph. Naindaklan a propeta ni Joseph. Ngem saan a naragsakan ni Satanas. Kayat ni Satanas a maisardeng ti trabaho ni Joseph. Kayat ni Satanas a guraen dagiti tao ni Joseph.

Maysa a rabii, napan iti pagtaengan ni Joseph ti bunggoy dagiti mangriribuk a tattao a kasta unay ti pungtotda. Dinadaelda ti ridaw ti balayna. Simrekda. Ub-ubbaen ni Joseph ti maysa kadagiti maladaga. Masakit unay ti maladaga.



Ginutad dagiti dakes a lallaki ni Joseph. Nabati nga agmaymaysa ti maladaga. Natay ti maladaga iti saan a nabayag. Kinugtaran dagiti lallaki nga inruar ni Joseph iti nalam-ek a rabii. Binekkel dagiti lallaki ni Joseph.





Sumagmamano a lallaki ti nagtarigagay a mangdangran ken ni Joseph. Kayat dagiti dadduma a lallaki a patayen isuna. Pinadasda a bukboakan ti ngiwatna iti sabidong. Pinurida ti maysa kadagiti ngipenna. Inuram ti sabidong ti bagina.




Pinigis dagiti lallaki ti kawes ni Joseph ket binuyatanda iti alkitrán. Binungonda ti bagina kadagiti dutdot. Dimket dagiti dutdot iti alkitrán.



Kalpasanna pimmanaw ti bunggoy dagiti mangrribuk. Impagarupda a matay ni Joseph. Inkarigatan ni Joseph ti timmakder. Ngem dina kabaelan. Naginana iti sumagmamano a kanito. Kalpasanna nagkaradap a simrek iti balayna.



Inikkat dagiti gagayem ni Joseph ti alkitrán a dimket iti bagina. Narigat a maikkat ti alkitrán. Nauram ken naglupsit ti kudilna. Naut-ot daytoy.



Saan nga impalubos ni Joseph Smith a pagsardengen dagiti mangrribuk ti aramidna. Domingo ti simmaruno nga aldaw. Napan ni Joseph iti simbaan. Sumagmamano kadagiti lallaki iti bunggoy a mangrribuk ti dimteng iti taripnong ti simbaan. Nasdaawda a nakakita ken ni Joseph. Nagsarita ni Joseph iti simbaan. Saan a mapagsardeng ni Satanas ti trabaho ti Propeta.

# Napan Manen ni Propeta Joseph iti Missouri

Maika-28 a Paset (Marso–Mayo 1832)



Nangted manen ni Jesus iti maysa a paltiing ken ni Joseph Smith. Kinunana a kasla annakna a babassit dagiti Santo. Agsursuroda pay laeng. Kinuna ni Jesus a nasken nga agragsakda. Nasken nga agyamanda. Isunto ti agbalin a dadauloda.

DkK 78:17–18



Kayat ni Jesus nga agsisinnaranay dagiti Santo. Kayatna nga aywananda dagiti marigrigat a tao. Kayat ni Jesus nga agtitinnulong dagiti Santo.

DkK 78:3–6, 14



Iti saan a nabayag kalpasan ti paltiing, napan manen ni Joseph iti Missouri. Maawagan ti Missouri iti daga ti Zion. Sumagmamano kadagiti gagayem ni Joseph ti kimmuyog kenkuana. Naragsakan dagiti Santo iti Zion a nakakita ken ni Joseph.



Kiniddaw ni Joseph kadagiti Santo a mapanda iti taripnong. Imbagana kadakuada ti maipapan iti paltiing. Ammo dagiti Santo a Propeta ti Dios ni Joseph.

Iti taripnong nangted ti Apo ken ni Joseph iti sabali pay a paltiing para kadagiti Santo. Maragsakan ni Jesus ta napakawanen dagiti Santo ti tunggal maysa. Kinuna ni Jesus, “Siak, nga Apo, pakawanenkayo.”

DkK 82:1



Nangted ni Jesus iti baro a bilin kadagiti Santo. Kinunana nga intednan kadakuada ti daga ti Zion. Ita nasken a pagbibingayanda ti daga. Nasken nga addaan koma ti tunggal maysa no ania ti kasapulanna. Makatulong daytoy iti Simbaan ni Jesucristo.

DkK 82:17-20



Kalpasan ti taripnong, sinarungkaran ni Joseph dagiti Santo iti adu nga ili. Naragsakan dagiti Santo a nakakita kenkuana. Maysa a naragsak a kanito daytoy ken ni Joseph. Patpatgenna dagiti Santo.

Nangted ni Jesus iti paltiing ken ni Joseph maipapan kadagiti babbai ken ubbing. Kinuna ni Jesus a nasken nga aywanan dagiti lallaki dagiti assawada. Nasken nga aywanan dagiti nagannak dagiti annakda.

DkK 83:2, 4



Nasken nga aywanan dagiti Santo dagiti babbai nga awanan assawa. Nasken nga aywanan dagiti Santo dagiti ubbing nga awanan iti amma wenno inna.

Kinuna ni Jesus a nasken nga agurnong dagiti Santo iti taraon iti pagidulinan. Nasken nga ikkan ti obispo iti taraon dagiti mabisin a tao manipud iti pagidulinan.

DkK 83:6

DkK 83:6



Nagsubli da Joseph Smith ken Obispo Whitney iti Kirtland. Nagluganda iti karison.

Maysa nga aldaw, adda nagbutngan dagiti kabalio. Napartak ti panagtarayda.



Timmapuak ni Joseph manipud iti karison. Saan a nasugatan. Timmapuak iti karison ni Obispo Whitney. Nablo ti luppona.



Nagtalinaed da Joseph Smith ken Obispo Whitney iti maysa a pagdagusan. Uppat a lawas a naginana ni Obispo Whitney. Kinadua ni Joseph bayat ti panaglaing ti luppona.



Adda nagsabidong iti tararon ni Joseph iti nagdagusanda. Nagsakit iti kasta unay.



Kiniddaw ni Joseph ken ni Obispo Whitney a bendisionanna. Inaramat ni Obispo Whitney ti bileg ti kinasaserdote a mangbendision ken ni Joseph. Nalaingan ni Joseph.



Nagyaman ni Joseph iti Dios iti pannakapaimbagna. Iti kamaudiananna, nakapagbaniaga manen da Joseph Smith ken Obispo Whitney. Nagawidda kadagiti kaamaanda.

# Ti Paltiing Maipapan iti Kinasaserdote

Maika-29 a Paset (Septiembre 1832)



Adu a lallaki iti Simbaan ti napan kadagiti mision. Idi nagawidda, napanda kinita ni Joseph Smith Ili Kirtland.

DkK 84: Pakauna




Insalaysay dagiti lallaki ken ni Joseph ti maipapan iti misiononda. Binuniaganda ti adu a tao. Naragsakanda maipapan iti panagmisiononda. Naragsakan met ni Propeta Joseph.

DkK 84: Pakauna



Addaan amin dagitoy a misionario iti kinasaserdote. Bileg ti Dios ti kinasaserdote. Adu pay ti kayat a maammuan dagiti misionario maipapan iti kinasaserdote.





Nangted ni Jesus iti maysa a paltiing ken ni Joseph para kadakuada. Imbaga ni Jesus ken ni Joseph ti maipapan iti sumagmamano a lallaki nga addaan iti Kinasaserdote a Melchizedek. Adda kinasaserdote ni Adan. Isu ti immuna a lalaki a nagbiag ditoy daga.

DkK 84: Pakauna,16

Adda amin kinasaserdote dagiti propeta iti Daan a Tulag. Maibilang iti sumagmamano a propeta da Enoc, Noe, Moises, Melchizedek, ken Abraham. Inted ni Melchizedek ti kinasaserdote ken ni Abraham.

DkK 84:6-15



Kinuna ni Jesus a dagiti lallaki nga addaan iti kinasaserdote ti mangidaulo iti Simbaanna. Mabalinda ti mangbuniag ken mangted iti sagut ti Espiritu Santo. Mabalinda ti mangbendision iti sakramento. Mabalinda ti mangbendision kadagiti masakit a tao. Makatulong amin dagitoy kadagiti Santo nga agsagana a mangkita iti Dios.

DkK 84:19-22



Imbaga ni Jesus ken ni Joseph a nasken nga agbalin a nalinteg dagiti lallaki. Iti kasta maaddaanda iti kinasaserdote. Agaramid ti Dios iti maysa a katulagan kadakuada. Ti katulagan ket maysa a kari. Ikari ti Dios a paraburanna dagiti lallaki nga addaan iti kinasaserdote. Ikari dagiti lallaki nga aramatenda ti bileg ti kinasaserdote a tumulong iti sabali a tao. Makapagbalin dagiti lallaki nga addaan iti kinasaserdote a naisangsangayan nga annak ti Dios. Maysa nga aldaw, ibinglayto ti Nailangitan nga Ama kadakuada dagiti amin nga adda kenkuana.

DkK 84:33–39



Imbaga ni Jesus ken ni Joseph no kasano nga aramaten dagiti lallaki iti Simbaan ti kinasaserdote. Maaramat laeng dagiti nalinteg a lallaki ti kinasaserdote. Nasken a saan nga aramaten iti kaano man dagiti lallaki ti kinasaserdote tapno pagpangas wenno pagtangsit. Saan nga ikkan ti Dios iti bileg ti kinasaserdote dagiti lallaki a natangsit.

DkK 121:36–37



Nasken nga aramaten dagiti lallaki ti kinasaserdote nga addaan ayat ken panangngaasi. Nasken a dumngegda iti Espiritu Santo. Iti kasta agnanayonto nga adda kadakuada ti bileg ti kinasaserdote. Kaduaento nga agnanayon ida ti Espiritu Santo.

DkK 121:41–43, 45–46



Imbaga ni Jesus ken ni Joseph Smith a nasken nga ad-adu koma dagiti lallaki a mapan iti mision. Nasken nga ikasabada ti ebanghelio iti amin a paset ti lubong. Nasken nga isuroda a ti Dios ti mangukomto iti amin a tao. Nasken nga isuroda nga agbabawi dagiti tao. Nasken a buniaganda dagiti tao ket itedda kadakuada ti Espiritu Santo.

DkK 84:62–64



Kinuna ni Jesus a maparaburan dagiti misionario no agtrabahoda a sipapasnek. Tulonganto ida dagiti anghel. Ited ti Nailangitan nga Ama dagiti banag a kasapulanda.

DkK 84:80–88



Naggibus ti paltiing. Naragsakan ni Joseph ken dagiti misionario iti pannakaammoda iti ad-adu pay maipapan iti kinasaserdote. Kayatda nga aramaten ti bileg ti kinasaserdote iti rumbeng a wagas. Kayatda nga isuro dagiti dadduma maipapan iti Simbaan.

# Ti Paltiing Maipapan iti Gubat

Maika-30 a Paset (25 Disiembre 1832)



Adu dagiti tao a nabuniagan iti Simbaan ni Jesucristo. Pinaragsak ida ti ebanghelio. Ngem mariribukan dagiti Santo kadagiti banag a mapaspasamak iti sabali a pagilian.



Naladingit a banag dagiti mapaspasamak kadagiti adu a lugar iti lubong. Adda dagiti ginggined. Masaksakit dagiti tao. Adu a tao ti matmatay.



Naladingit pay a banag ti mapaspasamak iti Estados Unidos. Sumagmamano a tao ti saan a mayat a pasakup iti Estados Unidos. Kayatda ti maaddaan iti kabukbukodanda a dadaulo.



Iti aldaw ti Paskua, 1832, inikkan ni Jesus ni Joseph Smith iti maysa a paltiing. Maipapan iti gubat ti paltiing.

DkK 87



Kinuna ni Jesus nga addanto gubat iti Estados Unidos. Agririnnangetto dagiti tao iti Estados Unidos.

DkK 87:1-3



Iti di mabayag, addanto gubat kadagiti dadduma a pagilian. Addanto panagrarangget iti amin a paset ti lubong. Kinuna ni Jesus a nasken nga agbalin a nalinteg dagiti Santo. Nasken nga agsaganada para iti panagsublinanto manen ditoy daga.

DkK 87:3-8



Nagladingit ni Joseph a nakaammo nga addanto gubgubat. Ammona a nasken nga agtungpal dagiti tao kadagiti bilin ti Dios. Iti kasta saandanto nga agrarangget ken maaddaan iti gubat.

# Ti Nainsiriban a Balikas

Maika-31 a Paset (Pebrero 1833)



Nangirugi ni Joseph Smith iti pagadalan para kadagiti lallaki iti Simbaan. Naawagan daytoy iti Pagadalan dagiti Propeta.



Adda ti pagadalan iti maysa a siled iti paglakuan ni Newel Whitney iti Kirtland, Ohio. Insuro ni Joseph kadagiti lallaki ti maipapan iti Simbaan. Insurona ida maipapan iti kinasaserdote ken maipapan kadagiti nasantuan a kasuratan.



Adu kadagiti lallaki ti nakasuako wenna nakasigarilio. Napunno ti siled iti asuk. Sumagmamano pay kadagiti lallaki ti nagmuskada. Narugit ti datar (gapu iti muskada ken tuprada). Nasken a madalusan ti siled no nakaawiden dagiti lallaki.

Nasken nga agdalus idi ni Emma nga asawa ni Joseph iti siled kalpasan ti tunggal taripnong. Pinampanunot ni Joseph no nasken nga agsigarilio wenna agmuskada dagiti lallaki.



Nagkakarag ni Joseph ket dinamagna iti Dios no ania ti rumbeng. Nangted ni Jesus ken ni Joseph iti maysa a paltiing. Naawagan daytoy iti Nainsiriban a Balikas. Kinuna ni Jesus a sumagmamano a tao ti agaramid kadagiti dakes a banag. Kayatda nga agaramid dagiti dadduma a tao kadagiti banag a saan a nasayaat para iti bagida. Iti Nainsiriban a

Balikas, imbaga ni Jesus kadagiti Santo maipapan kadagiti banag a nasayaat para iti bagida. Imbagana maipapan kadagiti banag a dakes para iti bagida. Maparaburan dagiti Santo no tungpalenda ti Nainsiriban a Balikas.

DkK 89:1, 4



Imbaga ni Jesus a saan a nasayaat ti alkohol para iti tao. Nasken a saanda nga uminum kadagiti mainum nga adda alkoholna. Nasken a maaramat laeng ti alkohol iti ruar ti bagi. DkK 89:5-7



Kinuna ni Jesus a nasken a saan nga agaramat dagiti tao iti tabako. Nasken a saanda nga agsigarilio, agtabako, wenno agsuako. Nasken a saanda nga agmuskada. Kinuna ni Jesus, "Saan a para iti bagi ti tabako ken saan a nasayaat para iti tao." DkK 89:8



Kinuna ni Jesus a nasken a saan nga uminum dagiti Santo kadagiti napudot a mainum. Napudot a mainum ti tsaa ken kape. Saan a nasayaat dagitoy para iti bagi. DkK 89:9



Kinuna ni Jesus nga adu dagiti mula ken ayup a nasayaat a taraon para kadagiti tao. Nasken nga agyaman dagiti tao iti Nailangitan nga Ama iti nasayaat a taraon. DkK 89:11-12





Kinuna ni Jesus a nasken a saan a kaaduen dagiti tao ti agsida iti karne. Agsida laeng dagiti tao iti karne no nalamiis ti panawen. Agsidada laeng iti karne no awan ti umdas a taraon.  
DkK 89:12-13

Kinuna ti Apo a nasayaat amin dagiti bukbukel nga agpaay iti bagitayo. Sumagmamano kadagiti bukbukel ti trigo, bagas, mais, ken *oat meal*. Nasayaat unay ti trigo para kadayo. Nasayaat amin dagiti prutas ken nateng para kadagiti tao.  
DkK 89:14-17



Kinuna ni Jesus a nasken a tungpalen dagiti Santo ti Nainsiriban a Balikas. Iti kasta paraburanto ti Dios ida. Maaddaandanto iti nasalun-at a bagi. Agbalinda a masirib. Adu dagiti banag a masursuroda. Mabendisionandanto no manganda kadagiti umno a taraon.

DkK 89:18-21


# Ti Simbaan ni Jesucristo iti Kirtland

Maika-32 a Paset (Marso–Hunio 1833)



Ni Joseph Smith ti propeta ti Simbaan ni Jesucristo. Kinuna ti Apo ken ni Joseph a nasken nga adda lallaki a tumulong kenkuana. Isudanto dagiti mamagbagana. Nasken a da Sidney Rigdon ken Frederick G. Williams dagiti mamagbagana. Ni Joseph ken dagiti mamagbagana ti Umuna a Panguluen ti Simbaan.

D&K 81:1; 90:6



Ita, ti sibibiag a propeta ti dadaulo ti Simbaan. Isu ken dagiti mamagbagana ti maawagan iti Umuna a Panguluen.



Naordenan ni Joseph Smith ken dagiti mamagbagana iti maysa a taripnong iti Kirtland, Ohio. Maysa a sagrado a taripnong daytoy. Nakiranud iti sakramento ti amin a tao nga adda iti taripnong.

Sumagmamano a lawas kalpasanna, inrugi ni Joseph Smith ti umuna nga istaka ti Simbaan. Ti istaka ket buklen ti adu a kameng ti Simbaan nga agnaaed nga agaassideg. Kameng amin dagiti Santo iti Kirtland ti umuna nga istaka. Ita, adun ti istaka ti Simbaan.



Kalpasanna, kinuna ni Jesus a nasken nga agpatakder dagiti Santo iti ad-adu pay a pasdek ti Simbaan. Nasken a mangipatakderda iti templo iti Kirtland. Kasapulanda ti mangipatakder iti lugar a pagtrabahuan ti Umuna a Pangulu. Kasapulan met ti Simbaan ti imprenta a pagimalditan.

DkK 94; 95



Tinungpal dagiti Santo ti Apo. Inrugida a binangon ti Templo iti Kirtland. Narigat a trabaho ti panagbangon iti templo. Masapul a tumulong amin dagiti Santo.



Adu pay a tao ti nagkameng iti Simbaan. Imbaga ni Jesus ken ni Joseph nga agpili iti adu pay a dadaulo para kadagiti Santo. Kinunana a ti koma ama ni Joseph ti agbalin a Patriarka ti Simbaan. Ti Patriarka ti mangted iti bendision kadagiti Santo. Adda kenkuana ti Kinasaserdote a Melchizedek.



Imbaga ni Jesus ken ni Joseph a mangpili iti sangapulo-ket-dua a lallaki nga agbalin a kameng ti nangato a konseho. Isuda dagiti lallaki nga addaan iti Kinasaserdote a Melchizedek. Tulonganda dagiti Santo a mangammo no ania ti umisu ken no ania ti maikaniwas.

# Ti Paltiing Maipapan ken ni Jesucristo

Maika-33 a Paset (Mayo 1833)



Kinasao ni Jesus ken ni Propeta Joseph Smith iti maysa nga aldaw. Imbagana ken ni Joseph Smith ti maipapan kenkuana. Kinuna ni Jesus a makita dagiti tao ti rupana ket mailasinda. Umuna, masapul nga isardengdan ti agaramid kadagiti dakes a banag. Nasken nga agkararagda ken tungpalenda dagiti bilin ti Dios. Iti kasta dumtengto ti aldaw a makitada ni Jesus.

DkK 93:1



Kinuna ni Jesus nga isu ti silaw ti lubong. Ipakita kadayo ti silaw ti umno a dalan a suroten. Ni Jesus ti silaw ti lubong gapu ta ipakitana kadayo ti umno a dalan ti panagbiag.

DkK 93:2



Nagnaed ni Jesus iti sidong ti Nalangitan nga Ama sakbay a naaramid ti daga. Inaramid ni Jesus ti daga. Inaramidna ti amin a banag nga adda iti rabaw ti daga.

DkK 93:7-10



Ni Jesus ket saan a kas iti Nailangitan nga Amana idi damo. Dina ammo dagiti banag nga ammo ti Amana. Awan kenkuana ti amin a bileg ken gloria nga adda iti Amana. Inkarigatanna a sipapasnek ti nagbalin a kas iti Amana. Kalpasanna nagbalin a kas iti Dios, ti Ama. Adda bileg ken gloria ni Jesus.

DkK 93:12–17



Kinuna ni Jesus a nasken a tungpalentayo dagiti bilin ti Dios. Iti kasta maammuantayonto ti kinapudno. Maammuantayonto ti amin a banag. Iti kasta makapagbalintayto a kas iti Dios, ti Ama. Maaddaantayo iti bileg ken gloria.

DkK 93:20, 27–28



Kinuna ni Jesus a saan a kayat ni Satanas nga agbalin dagiti tao a kas iti Dios. Saanna a kayat a maammuanda ti kinapudno. Imbaga ni Jesus ken ni Joseph nga isurona ti kaamaanna iti kinapudno.

DkK 93:39, 47–48



Kinuna ni Jesus a nasken nga isuro da Sidney Rigdon ken Frederick G. Williams dagiti kaamaanda tapno agtungpalda kadagiti bilin ti Dios. Iti kasta saan a malapdan ni Satanas ti kaamaanda a mangammo iti kinapudno.

DkK 93:40–44

# Binallaagan ti Dios Dagiti tao iti Zion

Maika-34 a Paset (Hulio–Agosto 1833)



Imbilin ti Dios iti ad-adu pay a Santo a mapanda iti Jackson County, Missouri. Adu dagiti tao a napan nagnaed sadiay. Nagipatakderda iti balay, pagtagilakuan, ken pagimalditan.



Saan a kinayat ni Satanas nga agindeg dagiti Santo it Jackson County. Dina kinayat a bangonenda ti ciudad ti Zion. Kinayatna nga agbalin a natangsit kadakuada dagiti sabali a tao. Kinayat ni Satanas a papanawen dagiti dakes a tao dagiti Santo iti Jackson County. Inaramid dagiti dakes a tao ti kayat ni Satanas a mapasamak. Pinadasda a papanawen dagiti Santo.



Naguummong ti bunggoy dagiti makapungtot a mangrribuk. Nangipatulod ti bunggoy dagiti mangrribuk kadagiti sumagmamano a lallaki a makipagkita kadagiti dadaulo ti Simbaan. Imbilin dagitoy a lallaki kadagiti Santo a nasken a pumanawda iti Jackson County. Ngem ammo dagiti dadaulo ti Simbaan a kayat ti Dios a mangbangonda iti ciudad ti Zion iti Jackson County. Imbagada kadagiti bunggoy ti mangrribuk a saan a makapanaw dagiti Santo.



Nagsubli dagiti dakes a lallaki iti yan ti bunggoy dagiti mangrribuk. Nagpungtot unay ti bunggoy dagiti mangrribuk. Sinerrekda ti pagimalditan dagiti Santo. Dinadaelda daytoy. Saanen a makaimaldit dagiti Santo kadagiti libro wenno pagiwarnak.



Natiliw ti bunggoy dagiti mangrribuk da Obispo Partridge ken Brother Allen ket linabusanda ida. Inikkanda iti napudot nga alkitran ken dutdot ti bagida. Nasarakan pay ti bunggoy dagiti mangrribuk dagiti dadduma a Santo ket minalmaloda ida.



Kalpasan ti tallo nga aldaw, nagpasiar iti ili dagiti dakes a lallaki. Pinaltoganda dagiti pasdek. Iniriaganda iti agkakadakes a banag dagiti Santo. Imbagada a malmaluenda ti asino man a matiliwda. Pinadasda a sinapul dagiti dadaulo ti Simbaan. Inlemmengan dagiti dadaulo ti Simbaan ti bunggoy dagiti mangrribuk.





Ni Oliver Cowdery ti maysa kadagiti dadaulo. Pimmanaw iti Jackson County. Napanna kinita ni Joseph iti Kirtland.

Imbaga ni Oliver ken ni Joseph ti inaramid dagiti dakes a lallaki iti Zion. Kayat a maammuan dagiti Santo iti Jackson County no ania ti nasken nga aramidenda.



Imbaga ni Joseph ken ni Oliver ti maipapan iti sumagmamano a paltiing nga inted ni Jesus kenkuana. Kinuna ti Apo a nasken a mangbangon dagiti Santo iti templo iti Zion. Nasken nga agbayad dagiti Santo iti apagkapullo. Ti apagkapullo a kuarta ti pangigastoda iti templo. Imbaga ni Jesus ken ni Joseph nga agbalinto a dakkel ti Zion no la ket tungpalen dagiti Santo ti Dios. Madusanto dagiti Santo no dida agtungpal iti Dios.

DkK 97:10–12, 18, 22–26



Imbaga ni Jesus a nasken a tungpalen dagiti Santo dagiti paglinteg a pagilian. Nasken a butosan dagiti Santo dagiti nalinteg a tao nga agbalin a dadaulo ti pagilian. No dadduma agbalin a dadaulo ti pagilian dagiti dakes a tao. Daytoy ti makapaladingit kadagiti nalinteg a tao.

D&C 98:4-10

Imbilin ti Apo kadagiti Santo nga isardengdan ti agaramid kadagiti dakes a banag. Kinuna ni Jesus a nasken a saan a madanagan dagiti Santo kadagiti bunggoy dagiti mangrribuk. Masapul a dida kagura dagiti dakes a tao. Nasken a pakawanen dagiti Santo dagiti kabusorda. Makirangetda laeng no bilinen ti Dios a makirangetda. Dusaento ti Dios dagiti dakes a tao.

D&K 98:11, 14, 23-29, 33, 39-48



Iti saan a nabayag, kinuna ni Jesus nga addanto riribuk kadagiti Santo iti Zion iti apagkanito. Dida tinungpal dagiti bilin. Iti maysa nga aldaw, tulonganto ni Jesus dagiti Santo a mangbangon iti Zion. Kalpasanna bendisionanto ida ni Jesus.

D&K 100:13-17

# Pimmanaw Dagiti Santo iti Jackson County, Missouri

Maika-35 a Paset  
(Septiembre–Disiembre 1833)



Ririribuken dagiti dakes a tao dagiti Santo iti Jackson County, Missouri. Inkarigatan dagiti Santo ti dimmawat iti tulong iti gobernador ti Missouri. Napan nakipagkita da William Phelps ken Orson Hyde iti gobernador. Imbagada kenkuana ti maipapan iti bunggoy dagiti mangrribuk. Imbagada no kasano a nadadael dagiti pagtaenganda.



Saan a matulongan ida ti gobernador. Imbagana nga agpatulongda kadagiti ukom. Ngem gagayyem met dagiti ukom dagiti dakes a mangrribuk. Saanda a matulongan dagiti Santo.



Rinaut dagiti mangrribuk dagiti Santo iti uneg ti innem nga aldaw. Rinebbada dagiti pagtaenganda. Dinangranda dagiti lallaki. Sinerrekda dagiti pagtagilakuan ket inwar-itda ti amin a banag iti datar.



Pinapanaw dagiti mangrilibuk dagiti Santo kadagiti pagtaenganda. Panawen idi ti lamiis. Adu ti tao a natay gapu iti nalamiis, nabasa a panawen. Napan dagiti Santo kadagiti kabangibang nga ili ti Missouri tapno maliklikanda dagiti mangrilibuk.



Nagladngit dagiti Santo. Nadadael dagiti pagtaengan, talon, ken pagtagilakuanda. Natakaw dagiti ayupda. Saan a matulongan ti gobernador ken dagiti ukom dagiti Santo.



Ngem adda latta pammati dagiti Santo iti Dios. Ammoda pudno a Simbaan ti Simbaan ni Jesucristo. Ammoda a propeta ti Dios ni Joseph Smith.



Adda idi ni Joseph Smith iti Kirtland, Ohio. Nangted ni Jesus kenkuana iti paltiing. Imbagana no apay nga adda riribuk kadagiti Santo. Sumagmamano kadakuada ti saan a nagtungpal kadagiti bilin ti Dios.

DkK 101:2, 6-7

Kinuna ni Jesus a saan a nagtitinnulong a nagtrabaho dagiti Santo. Saanda a nagsisinnaranay. Nagpipinnadakesda. Saanda a nagkararag iti Dios no naragsakda. Dida kaano man nagyaman iti Dios. Nagkararagda laeng no kasapulanda ti tulong.

DkK 101:6-8



Kinuna ni Jesus a nasken nga agsagana dagiti Santo iti yaayna manen ditoy daga. Intono umay, addanton talna kadagiti tao. Maparaburanto dagiti Santo a nagsagaba gapu ken ni Jesus. Awanton ti bileg ni Satanas a mangsulisog kadagiti Santo. Awanton ti agladingit. Awanton ti ipapatay a kas ammo ita. Intono umay manen ni Jesus, agragsakto ti tunggal maysa.

DkK 101:22, 26-36

# Kampo ti Zion

Maika-36 a Paset (Pebrero–Hunio 1834)



Bayat ti kaadda ni Joseph Smith iti Kirtland, Ohio, nangngegna ti pannakariribuk dagiti Santo iti Missouri. Pinapanaw ida ti bunggoy dagiti mangrribuk kadagiti pagtaenganda. Inkararag dagiti Santo a tulongan koma ida ti Nailangitan nga Ama.




Nangted ni Jesus iti paltiing ken ni Joseph Smith. Kinunana a masapul a mapan ti sumagmamano a lallaki iti Simbaan iti Missouri a tumulong kadagiti Santo. Ni Joseph Smith ti agbalin a dadauloda. Nasken a mangitugotda iti kuarta a paggatang iti daga. Kayat ti Apo a lima gasut a lallaki ti mapan.

DkK 103:21–23, 31–32



Nagtungpal ni Joseph iti Apo. Imbagana kadagiti Santo a nasken a lima gasut a lallaki ti mapan iti daga ti Zion iti Missouri. Kiniddawna a mapan dagiti lallaki iti Kirtland. Sangagasut laeng a lallaki ti napan. Saan a tinungpal dagiti dadduma a lallaki ti Apo.



Naawagan dagiti sangagasut a lallaki iti Kampos ti Zion. Nagrugida iti daga ti Zion. Sumagmamano kadagiti lallaki ti nagna. Naglugan iti karison dagiti dadduma. Maymaysa ti kampo iti rabii. Iti dalanda, sangagasut pay a lallaki ti simmurot kadakuada.



Nagdaliasat dagiti lallaki iti sangaribu a milia. Atiddog ken narigat ti dalan. Awan ti umdas a nasayaat a taraon dagiti lallaki.



Sumagmamano kadagiti lallaki ti nagkuna a narigat unay ti panagdaliasatda. Saanda a kayat ti taraon. Kinunada a saan a nasayaat a dadaulo ni Joseph Smith. Imbaga ni Joseph kadagitoy a lallaki nga agbabawida. No dida agbabawi, agsakit ket matayda.



Sumagmamano kadagiti lallaki ti nalinteg. Tinulonganda ni Joseph Smith. Tinungpalda dagiti bilin ti Dios. Impakitada no kasano ti panangipategda iti Simbaan ni Jesucristo. Kanayonto a malaglagip ni Joseph Smith no kasano ti panangtulongda kenkuana.



Iti kamaudiananna, nakadanon met laeng dagiti lallaki iti Kampo ti Zion iti Missouri. Nagkampoda iti igid ti karayan.



Ammo ti bunggoy dagiti mangriribuk nga adda dagiti lallaki sadiay. Iti rabii napan ti bunggoy dagiti mangriribuk iti asideg ti kampo. Kayatda a patayen dagiti lallaki a kameng ti Kampo ti Zion.



Nangibaon ti Dios iti nakaam-amak a bagyo. Rinungrungdo ti napigsa nga angin dagiti kayo. Nagtinnag dagiti dadakkel a tinukel ti niebe manipud iti langit. Nakimat dagiti kayo. Linayus ti danum ti karayan ti daga. Maysa kadagiti lallaki iti bunggoy dagiti mangriribuk ti pinatay ti kimat. Nasugatan dagiti dadduma a lallaki ti bunggoy dagiti mangriribuk.





Nagbuteng dagiti lallaki iti bunggoy dagiti mangriribuk. Ammoda a tultulongan ti Dios dagiti lallaki a kameng ti Kampo ti Zion. Nagtataray ti bunggoy dagiti mangriribuk. Dida nadangran dagiti lallaki a kameng ti Kampo ti Zion. Saan a dinangran ti bagyo dagiti lallaki a kameng ti Kampo ti Zion.



Kalpasan ti dua nga aldaw, nangted ti Apo iti paltiing ken ni Joseph Smith. Kinuna ti Apo a mabalin dagiti lallaki a kameng ti Kampo ti Zion ti agtalinaed iti Missouri wenna agsublida iti Kirtland.

DkK 105:20–21



Kinuna ni Jesus a sumagmamano kadagiti lallaki ti saan a nagtungpal kenkuana. Saan a maragsakan kadakuada. Ngem sumagmamano met kadagiti lallaki ti nagtungpal. Naragsakan ti Apo kadakuada. Kinunana a paraburanna dagitoy iti ad-adu pay a bileg.

DkK 105:2–4, 18–19



Kalpasan ti sumagmamano nga aldaw, adu a lallaki a kameng ti Kampo ti Zion ti nagsakit. Sangapulo-ket-uppat kadakuada ti natay. Imbaga idi ni Joseph kadakuada a mataydanto no saanda nga agbabawi.



Nakipagkita ni Joseph Smith kadagiti Santo iti Missouri. Nangpili kadagiti lallaki ti agkameng iti nangato a konseho. Kalpasanna nagsubli ni Joseph ken dagiti gagayyemna iti Kirtland.



Saan a tinulongan dagiti lallaki a kameng ti Kampo ti Zion dagiti Santo iti Missouri. Saan a makatulong dagiti lallaki agsipud ta saanda a tinungpal ti Dios. Kinuna ti Dios a dagiti laeng nalinteg a tao ti mabalina a mangbangon iti Zion.

DkK 105:2-10

# Dagiti Dadaulo ti Kinasaserdote

Maika-37 a Paset (Pebrero 1835)



Adda napateg a taripnong ni Joseph Smith iti Kirtland, Ohio. Indawatna kadagiti lallaki a kameng ti Kampo ti Zion a mapanda. Imbaga ni Joseph kadagiti lallaki a kayat ni Jesus a tumulong dagiti sangapulo-ket-dua nga Apostol a mangidaulo iti Simbaaanna.



Imbaga ti Apo a mangpili da Oliver Cowdery, David Whitmer, ken Martin Harris kadagiti Apostol. Iti dayta a taripnong binendisionan ti Umuna a Panguluen ti Simbaan da Oliver, David, ken Martin. Kalpasanna nagkararagda a sangkamaysa. Nangpilida iti sangapulo-ket-dua a nasayaat a lallaki.

DkK 18:37



Naordenan dagiti lallaki. Isuda dagiti Sangapulo-ket-dua nga Apostol.



Napateg unay a tao dagiti Apostol iti Simbaan. Ammoda a ni Jesus ti Mangisalakantayo. Isuroda ti ebanghelio iti amin a paset ti lubong.

DkK 107:23–24



Kalpasan ti sumagmamano nga aldaw, napili pay dagiti dadduma a lallaki nga agbalin a dadaulo ti Simbaan. Maawaganda iti Umuna a Korum ti Pitupulo. Tumulong ti Umuna a Korum ti Pitupulo kadagiti Apostol. Isuda dagiti dadaulo ti aramid a panagmisionario iti Simbaan.

DkK 107:25, 34



Maysa nga aldaw, adda iti maysa a taripnong dagiti Sangapulo-ket-dua nga Apostol. Agsagsaganada a mapan kadagiti mision. Ikarkarigatanda ti agbalin a nalinteg. Kayatda ti agpatulong iti Nailangitan nga Ama.



Kiniddaw dagiti Apostol ken ni Joseph Smith a mangikararag iti paltiing a tumulong kadakuada kadagiti misionda. Nangted ni Jesus ken ni Joseph ken kadagiti Apostol iti naindaklan a paltiing. Imbagana kadakuada ti maipapan iti kinasaserdote.



Ti kinasaserdote isu ti bileg ti Dios. Daytoy ti kaindaklanan a bileg iti daga. Ited ti Dios ti kinasaserdote kadagiti nalinteg a lallaki. Aramaten dagiti lallaki ti kinasaserdote iti panangaramidda iti trabaho ti Dios.



Adda dua a kinasaserdote iti Simbaan. Maysa ti Kinasaserdote a Melchizedek. Adda Kinasaserdote a Melchizedek dagiti dadaulo ti Simbaan. Dadaulo ti Presidente ti Simbaan ken dagiti dua a mamagbagana, dagiti Sangapulo-ket-dua nga Apostol, ken ti Umuna a Korum ti Pitupulo.

DkK 107:1, 22-26

Ti Presidente ti Simbaan isu ti propeta ti Dios, Ibagana kadagiti tao ti kayat ni Jesus nga aramidenda. Adda lallaki a katulongan ti propeta. Isuda dagiti mamagbagana. Ti propeta ken dagiti mamagbagana ti Umuna a Panguluen ti Simbaan.

DkK 107:22



Addaan iti Kinasaserdote a Melchizedek dagiti dadduma pay a lallaki iti Simbaan. Maawaganda iti nangato a saserdote, pitupulo, ken elder. Mabalin dagiti nangato a saserdote ti agbalin a patriarka, presidente ti istaka, kameng ti nangato a konseho, ken obispo.

DkK 107:5, 7, 9–10, 17, 25, 39

Sumagmamano kadagiti lallaki ti napili nga agbalin a pitupulo.  
DkK 107:96–97



Mapili met nga elder dagiti dadduma a lallaki. Mapan dagiti elder iti mision.

DkK 107:7; 133:8

Makabendision amin a lallaki nga addaan iti Kinasaserdote a Melchizedek kadagiti tao. Maitedda kadagiti tao ti Espiritu Santo.

DkK 20:43; 107:18



Ti Kinasaserdote nga Aaron ti sabali pay a kinasaserdote. Addaan iti Kinasaserdote nga Aaron dagiti saserdote, maestro, ken diakono. Makabuniag dagiti saserdote iti tao. Bendisionanda ti sakramento. Tulonganda dagiti elder.

DkK 20:46-52



Tumulong dagiti maestro a mangisagana iti sakramento. Mapanda mangisuro iti pagtaengan. Tulonganda dagiti kameng ti Simbaan nga agbiag a nasayaat.

DkK 20:53-57



Dagiti diakono ti agibunong iti sakramento. Tulonganda ti obispo. Agkolektada kadagiti daton iti panagayuno.



Kinuna ni Jesus a nasken a masursuro amin dagiti lallaki nga addaan iti kinasaserdote no ania ti kayat ti Dios nga aramidenda. Masapul nga agrabahoda a nasayaat. Iti kasta bendisionan ida ti Nailangitan nga Ama.

DkK 107:99

# Ti Perlas a Kapatgan

Maika-38 a Paset



Maysa a libro ti Perlas a Kapatgan. Tinulongan ti Dios dagiti propeta a nangisurat iti Perlas a Kapatgan. Maysa daytoy kadagiti nasantuan a kasuratantayo. Adda uppat a beneg iti Perlas a Kapatgan. Dagitoy ti Libro ni Moises, Libro ni Abraham, dagiti sinurat ni Joseph Smith, ken ti Pagannurotan ti Pammati.




## Ti Libro ni Moises

Paltiing a naited ken ni Joseph Smith ti adda iti umuna a paset ti Perlas a Kapatgan. Maawagan daytoy iti Libro ni Moises. Maysa a propeta ti Dios ni Moises. Nagbiag daytoy iti nabayagen a panawen.

Isalaysay ti Libro ni Moises no ania ti kinuna ti Dios ken ni Moises iti nangato a bantay. Nakita ni Moises ti Dios ket nakisao kenkuana. Kinuna ti Dios nga adda naisangsangayan a trabaho nga aramiden ni Moises.





Impakita ti Dios ken ni Moises ti lubong. Nakita ni Moises dagiti amin a mapasamakto iti lubong. Nakitana amin dagiti annak ti Dios nga agbiagto iti lubong.

Moises 1:8




Pinanawan ti Dios ni Moises. Dimteng ni Satanás. Imbagana ken ni Moises nga agrukbab kenkuana. Saan a kayat ni Moises ti agrukbab ken ni Satanás. Kinuna ni Moises, “Anaknak ti Dios.” Indawat ni Moises iti Dios a tulonganna daytoy. Kalpasanna imbagana a pumanaw ni Satanás. Napalalo ti pungtot ni Satanás gapu ta saan a sumurot ni Moises kenkuana. Pinanawan ni Satanás ni Moises.

Moises 1:9, 12–22



Napno ni Moises iti Espiritu Santo. Dimteng ti Dios ket kinasaritana manen ken ni Moises. Kinuna ti Dios nga anak ti Dios ni Jesucristo a Mangisalakan. Imbaga ti Dios nga adu dagiti lubong. Inaramid dagitoy ni Jesus. Adunto pay ti aramidenna a lubong. Adunto latta dagiti lubong. Agindegto kadagitoy dagiti annak ti Dios.

Moises 1:24–25, 29–33, 38



Nasursuro ni Moises ti maipapan kadagiti aramid ti Dios. Agrabaho ti Dios a makatulong kadagiti tao tapno makapagnaeddanto nga agnanayon kenkuana. Agrabaho isuna a mangtulong kadagiti tao nga agbalin a kas kenkuana. Isalaysay pay ti Libro ni Moises ti maipapan ken ni propeta Enoc ken ti siudad ti Zion.

Moises 1:39; 2–8



### Ti Libro ni Abraham

Ti Libro ni Abraham ti maikadua a paset ti Perlas a Kapatgan. Iti maysa nga aldaw idi Hulio 1835, maysa a lalaki nga agnagan iti Mr. Chandler ti dimteng iti Kirtland. Ipakpakita ni Mr. Chandler kadagiti tao ti sumagmamano a napreserba a bangkay [mummies] a naggapu iti Egipto. No matay dagiti tao iti Egipto, mabungon ti bagida iti lupot. Maawagan dagiti bangkay iti *mummies*.



Sumagmamano a nalukot a nakadadaanen a papel ti naikuyog kadagiti napreserba a bangkay. Sumagmamano a karkarna a sinurat ti adda kadagiti papel. Agsapsapul ni Mr. Chandler iti maysa a tao a makabasa iti sinurat. Nangngegna a kabaelan ni Joseph Smith nga iparatus ti sinurat.




Kinita ni Joseph ti naisurat iti papel. Mabasana dagiti naisurat. Imbagana ken ni Mr. Chandler no ania ti kayatna a sawen. Sumagmamano kadagiti Santo ti gimmatang kadagiti nalukot a papel ken ni Mr. Chandler.



Impatarus ni Joseph ti naisurat iti papel. Da Oliver Cowdery ken William Phelps ti nagisurat kadagiti impatarus ni Joseph.



Gapuanan ti maysa a naindaklan a propeta a ni Abraham dagiti sinurat. Nagindeg ni Abraham iti nabayagen a panawen iti Egipto. Kinasao ni Jesus ken ni Abraham.



Imbaga ni Jesus ken ni Abraham ti maipapan iti biagtayo sakbay nga immaytayo ditoy daga. Kinuna ni Jesus a pinarsuana ti daga. Inaramidna ti init, bulan, ken dagiti bituen. Inaramidna dagiti mula, ayup, ken tao.

Abraham 3-4



Insurat ni Abraham ti maipapan iti ebanghelio ni Jesucristo. Makatulong kadayo ti Libro ni Abraham nga umawat iti maipapan kadagiti propeta ken ti kinasaserdote.

Abraham 1:31



**Dagiti Sinurat ni Joseph Smith**

Sinurat ni Joseph Smith ti maikatlo a paset ti Perlas a Kapatgan. Iti Joseph Smith—Pakasaritaan, insalaysay ni Joseph ti maipapan iti umuna a parmatana. Insalaysayna no kasano a naalana dagiti bali-tok a pinanid. Insalaysay pay ni Joseph no kasano nga inted dagiti anghel ti kinasaserdote kenkuana ken ni Oliver Cowdery. Iti Joseph Smith—Mateo, inatur ni Joseph ti dadduma a paset ti Biblia.



Ti Pagannurotan ti Pammati ti maikapad a paset ti Perlas a Kapatgan. Maysa nga aldaw, maysa a lalaki ti napan nakipagkita ken ni Joseph Smith. Agsursurat ti lalaki iti maysa a libro. Kayatna nga adda maisurat a paset ti librona a maipapan iti Simbaan. Kiniddawna nga isalaysay ni Joseph Smith no kasano a nangrugi ti Simbaan.



Insurat ni Joseph Smith ti maipapan iti punganay ti Simbaan. Insalaysayna ti pammati dagiti tao ti Simbaan. Tinulongan ti Dios ni Joseph Smith no ania ti isuratna. Nakaisurat ni Joseph iti sangapulo-ket-tallo a napapateg a banag. Inawaganna dagitoy iti Pagannurotan ti Pammati.



Naimaldit ti Pagannurotan ti Pammati iti pagiwarnak ti Simbaan idi Marso 1, 1842. Nabasa dagiti Santo ti Pagannurotan ti Pammati. Namatida kadagiti insurat ni Joseph.

# TI PAGANNUROTAN TI PAMMATI

**M**amatikami iti Dios, ti Agnanayon nga Ama, ken ti Anakna a ni Jesucristo, ken ti Espiritu Santo.

Mamatikami a madusanto dagiti tao gapu kadagiti bukodda a basol a saan a gapu iti nagbasolan ni Adan.

Mamatikami a babaen ti Pannubbot ni Cristo, maisalakan amin a sangkataw-an, babaen ti panagtungpal kadagiti paglintegan ken ordinansa ti Ebanghelio.

Mamatikami a dagiti umuna a pagbatayan ken ordinansa ti Ebanghelio: umuna, Pammati ken Apo a Jesucristo; maikadua, Panagbabawi; maikatlo, Panagbuniag babaen ti pannakairarem iti danum para iti pannakaugas dagiti basol; maikapat, Pannakaipatay dagiti dakulap para iti sagut ti Espiritu Santo.

Mamatikami a nasken nga awagan ti Dios ti tao babaen iti padto, ken babaen ti panangipatay kadagiti dakulap dagiti naikkan iti turay a mangikasaba iti Ebanghelio ken mangannong kadagiti ordinansa.

Mamatikami iti timpuyog a kapada ti Nagkauna a Simbaan a buklen dagiti apostol, propeta, pastor, maestro, mangaskasaba, ken dadduma pay.

Mamatikami iti sagut ti pagsasao, padto, paltiing, parmata, panagagas, panagipatarus ti pagsasao, ken dadduma pay.

Mamatikami a sao ti Dios ti Biblia no husto la ketdi ti pannakaipatarusna; mamatikami met a sao ti Dios ti Libro ni Mormon.

Mamatikami iti amin nga impalgak ti Dios, amin nga ipalpalgakna, ken mamatikami nga adu pay ti ipalgakna a naindaklan ken napateg a banag maipapan iti Pagarian ti Dios.

Mamatikami iti makita a panaguummong ti Israel ken ti pannakaisubli ti kasisigud ti Sangapulo a Tribu; a mabangonto ti Zion (ti Baro a Jerusalem) iti kontinente ti America; nga agturayto a mismo ni Cristo iti daga; a mapabaronto ti daga ken awatennanto ti kangayedan a pannakaitan-okna.

Itandudomi ti karbengan nga agrukbab iti Mannakabalin a Dios babaen ti panangibagnos ti konsensiami, ken ipalugodmi iti amin a tao ti umasping a karbengan, bay-anmi nga agrukbabda iti wagas no kasano, sadino, ken no ania pay.

Mamatikami nga agtungpalkami kadagiti ari, presidente, mangituray, mahistrado, iti panagtungpal, panagdayaw, ken panangkanunog iti paglintegan.

Mamatikami iti kinalinteg, kinapudno, kinadalus ti dayaw, kinamanang-ngaasi, kinasaguday ken iti panagaramid iti naimbag iti amin a tao; ngarud, masaomi a sursurotenmi ti pannursuro ni Pablo—Mamatikami iti amin a banag, mangnamnamakami iti amin a banag, adun a banag ti inibturmi, ken mangnamnamakami a kabaelanmi pay nga ibturan ti amin a banag. No adda nadalus, makaay-ayo, wenna addaan iti nasayaat a pakasaritaan wenna pakaidayawan, tun-oyanmi dagitoy a banag.

Joseph Smith

# Naidaton ti Templo ti Kirtland

Maika-39 a Paset (Enero–Marso 1836)



Imbilin ti Apo kadagiti Santo a mangipatakderda iti templo  
iti Kirtland. Nagtrabaho a sipapasnek dagiti Santo tapno  
maipatakderda ti Templo ti Kirtland. Nalpasda ti  
sumagmamano kadagiti kuarto.



Kalpasanna nagtataripnong dagiti Santo iti umuna a gundaway iti templo.  
Iti dayta a taripnong binendisionan ti ama ni Joseph Smith dagiti dadaulo  
ti Simbaan. Ti ama ni Joseph ti Patriarka ti Simbaan.



Kalpasanna naaddaan ni Joseph iti nakaskasdaaw a parmata. Nakitana ti celestial a pagarian iti langit. Iti celestial a pagarian ti pagnaedan ti Dios. Nakita ni Joseph no kasano ti kinapintas ti celestial a pagarian. Nakitana ti Nailangitan nga Ama ken ni Jesus. Nakita ni Joseph ni Alvin a kabsatna a natayen.

DkK 137:1-5



Naammuan ni Joseph maipapan kadagiti ubbing a matay sakbay nga agtawenda iti walo. Imbaga ni Jesus a mapandanto iti celestial a pagarian.

DkK 137:10




Kinuna ni Jesus nga adu dagiti tao a saan a makaammo iti ebanghelio idi addada pay la a biag ditoy daga.

DkK 137:7-9

Agindegto iti daga dagiti dadduma a tao ngem didanto masursuro ti maipapan iti ebanghelio.

DkK 137:7-9



Sumagmamano kadagitoy a tao ti mamati koma iti ebanghelio no naammuanda daytoy. Makapan dagitoy a tao iti celestial a pagarian.

DkK 137:7-9





Iti kamaudiananna, nalpas ti Templo ti Kirtland. Panawenen tapno maidaton ti templo. Kaipapananna a maitedton ti templo iti Apo. Maaramatto laeng daytoy para iti aramid ti Apo. Naaddaan iti naisangsangayan a taripnong dagiti Santo tapno maidaton ti templo.

Adu a Santo ti immay iti taripnong. Napalalo ti ragsakda a maaddaan iti templo. Nagkanta ken nagkararag dagiti Santo iti Nailangitan nga Ama. Nagkarida nga aramidenda no ania ti imbaga ti Propeta ken dagiti dadduma a dadaulo nga aramidenda.



Binasa ni Joseph Smith ti maysa a kararag a pangidaton iti templo. Kalpasanna maysan a sagrado a pasdek ti templo. Daytoy ti balay ti Apo. Adda dagiti anghel iti Templo ti Kirtland iti dayta nga aldaw. Adda ti Espiritu Santo kadagiti Santo. Maysa a naisangsangayan dayta nga aldaw.

# Dagiti Parmata iti Templo ti Kirtland

Maika-40 a Paset (Abril 1836)



Maysa a malen ti Domingo, adda taripnong dagiti Santo iti Templo ti Kirtland. Binendisionan dagiti Apostol ti sakramento. Imbungong ni Joseph Smith ken dagiti dua a mamagbagana ti sakramento kadagiti Santo.

DkK 110: Pakauna



Kalpasanna napan da Joseph Smith ken Oliver Cowdery iti maysa a lugar iti templo nga is-isuda laeng. Nagparintumeng ken nagkararagda. Kalpasan ti panagkararagda, maysa a nakaskasdaaw a banag ti napasamak. Nakitada ti Apo a Jesucristo. Kasla dumardarang nga apuy dagiti matana. Kasla niebe ti kinapuraw ti buokna. Naranraniag ngem iti init ti rupana.

DkK 110: Pakauna, 1–3



Adu ti nakaskasdaaw a banag nga imbaga ni Jesus kada Joseph ken Oliver. Kinunana nga isu ti Mangisalakanda. Natay gapu kadakuada. Nagungar isuna. Kinuna ni Jesus a nasken a maragsakan unay dagiti tao a nangipatakder iti templo. Kinuna ni Jesus a naragsakan iti templo. Daytoy ti nasantuan a balayna. Kinuna ni Jesus nga umayto iti templo iti mamin-adu a gundaway. Makisaonto kadagiti Santo. Ngem no saan nga aramiden dagiti Santo a nasantuan ti templo, saanto nga umay.

DkK 110:4-8



Kalpasanna nakita da Joseph ken Oliver dagiti anghel iti Templo ti Kirtland. Immuna a nakitada ni Moises. Maysa a propeta ni Moises a nagbiag iti nabayagen a panawen. Indauluanna dagiti Israelita a pimmanaw iti Egipto. Adda iti Daan a Tulag ken iti Perlas a Kapatgan ti pakasaritaan ni Moises. Nangted ni Moises iti naisangsangayan a bileg ti kinasaserdote kada Joseph ken Oliver. Iti kasta matulonganda a maummong a sangkamaysa dagiti Israelita manipud kadagiti amin a paset ti lubong.

DkK 110:11



Kalpasanna nakita da Joseph ken Oliver ni Elias. Inyeg ni Elias ti bileg ti kinasaserdote ni Abraham iti Simbaan ni Jesucristo. Nagbiag ni Abraham iti nabayagen a panawen. Binendisionan ti Dios ni Abraham. Intedna ken ni Abraham ti naisangsangayan a bileg ti kinasaserdote. Addanto a kanayon ti kinasaserdote iti kaamaan ni Abraham. Maibilang a kaamaan ni Abraham dagiti nalinteg a kameng ti Simbaan.

DkK 84:33–34; 110:12; Abraham 2:8–11; Genesis 12:2–3; 13:16



Kalpasanna nakita da Joseph ken Oliver ni Elias. Maysa a propeta ni Elias a nagbiag iti nabayagen a panawen. Imbaga ni Elias a maammuan dagiti tao maipapan kadagiti kapuonanda. Nasken nga agrabaho dagiti tao iti templo nga agpaay kadagiti kapuonanda. Nangted ni Elias iti naisangsangayan a bileg ti kinasaserdote kada Joseph ken Oliver. Matulongan ti bileg ti kinasaserdote dagiti nalinteg a kaamaan. Mabalin a mapaglantipda iti tunggal maysa. Kalpasanna makapagbiagdanto nga agdedenna iti agnanayon.

DkK 2:2; 110:13–16; 1 Ar-ari 17–2 Ar-ari 2; Malakias 4:5–6

# Riribuk iti Kirtland

Maika-41 a Paset (1837)



Naragsak dagiti Santo iti Kirtland, Ohio. Binendisionan ida ti Apo.



Sumagmamano nga elder ti pimmanaw iti Kirtland. Napanda insuro ti ebanghelio kadagiti tao. Adu ti tao a dimngeg kadagiti elder ket nagkamengda iti Simbaan.



Kalpasanna nangrugi ti riribuk iti Kirtland. Adda bangko dagiti Santo. Indulinda dagiti kuartada iti bangko.



Sumagmamano kadagiti Santo ti nagtarigagay a makagun-od iti adu a kuarta. Maysa a lallaki a nagtrabaho iti bangko ti saan a mapagtalkan. Nagtakaw daytoy iti sumagmamano a kuarta.



Imbaga ni Joseph Smith kadagiti dadduma a lallaki nga aywananda a nasayaat ti kuarta. Ngem saan a tinungpal dagiti lallaki ni Joseph. Nasken a maserraan ti bangko. Nagpukaw amin ti kuarta. Saanen a mapasubli dagiti Santo ti kuartada.



Adu kadagiti Santo ti nakaunget. Kinunada a basol ni Joseph Smith ti pannakaserra ti bangko. Sumagmamano kadagiti kasingedan a gagayem ni Joseph ti namadpadakes kenkuana. Sumagmamano kadakuada ti nagtarigagay a mangpatay ken ni Joseph.



Sumagmamano kadagiti dadaulo ti Simbaan ti nakaunget. Saanda a kinayat ti agbalin a kameng ti Simbaan. Nagbalinda a kabusor ti Simbaan. Nagbalinda a dakes. Nagladingit unay ni Joseph Smith.



Impatpateg dagiti dadduma a dadaulo ti Simbaan ni Joseph ken tinulonganda daytoy. Ammoda a pudno ti Simbaan ni Jesucristo. Maysa ni Brigham Young kadagiti nalinteg a dadaulo. Imbaga ni Brigham kadagiti Santo nga ammona a propeta ti Dios ni Joseph.



Nakaunget dagiti kabusor ti Simbaan ken ni Brigham Young. Nasken a pumanaw iti Kirtland tapno saanda a madangran isuna.



Adu dagiti riribuk nga inaramid dagiti kabusor ti Simbaan iti Kirtland. Napanda iti templo ket nagaramidda kadagiti dakes a banag.



Saanen a sagrado ti templo. Saanen a mabalin a Balay ti Apo. Nagladingit ni Joseph gapu kadagiti dakes a banag nga ar-aramiden dagiti tao. Naladingitan iti kaadu unay ti riribuk.

# Far West, Missouri

Maika-42 a Paset (Enero–Hulio 1838)



Saan nga agbabawi dagiti dakes a tao iti Kirtland. Kayatda a patayen ni Joseph Smith. Nasken a pumanaw ni Joseph iti Kirtland. Panawen idi ti lamiis ket nakalamlam-ek unay. Sinurot dagiti kabusor ni Joseph. Adda imuko ken paltogda a pangpatay kenkuana.



Nasken nga aglemmeng ni Joseph. Sinalakniban daytoy ti Apo tapno saan a masarakan dagiti kabusorna. Maysa a rabii, naturog ni Joseph iti maysa a balay a nagturogan met dagiti kabusorna. Saanda nga ammo nga adda isuna sadiay.



Iti sabali pay a gundaway, nalabsan ni Joseph dagiti kabusorna iti kalsada. Kimmitada kenkuana. Saanda a nailasin.





Ginasut a milia ti dinaliasat ni Joseph. Napan iti Far West, Missouri. Naragsakan dagiti Santo iti Missouri a nakakita kenkuana.



Sumagmamano kadagiti dadaulo iti Missouri ti saan nga agtungtungpal kadagiti bilin ti Dios. Saanda nga agbabawi. Kinagurada ni Joseph. Kayatda ti bumaknang.



Nagladingit ni Joseph. Sigud a gagayyemna idi dagitoy a lallaki. Naikkat da Oliver Cowdery, David Whitmer, ken dadduma pay a tao a kas kameng ti Simbaan. Saandan a kameng iti Simbaan ni Jesucristo.



Sabali a lallaki ti napili a dadaulo ti Simbaan iti Far West.



Maysa nga aldaw napan ni Joseph Smith iti maysa a lugar nga asideg iti Far West. Imbaga ni Jesus a maawagan daytoy a lugar iti Adam-ondi-Ahman. Maysa daytoy a naisangsangayan a lugar. Nakisao ni Jesus ken ni Adan idia ket binendisionanna daytoy. Binendisionan ni Adan dagiti annakna iti Adam-ondi-Ahman. Addanto aldaw a da Jesus ken Adan ken dadduma pay a nalinteg a tao ti agkikitanto manen sadiay.

DkK 116

# Ninaganan ni Jesucristo ti Simbaanna

Maika-43 a Paset (Abril 1838)



Adda ni Joseph Smith iti Far West, Missouri. Maysa nga aldaw inikkan isuna ni Jesus iti napateg a paltiing. Imbaga ni Jesus ken ni Joseph ti nagan ti pudno a Simbaan.



Napanaganan ti pudno a Simbaan iti *Ti Simbaan ni Jesucristo dagiti Santo iti Ud-udina nga Aldaw* agsipud ta ni Jesus ti dadaulo daytoy. Ti Simbaan ket Simbaanna. Daytoy ti kakaisuna a pudno a Simbaan. Dagiti Santo iti Ud-udina nga Aldaw ket isuda dagiti Santo a sibibiag ita. Dagiti ud-udina nga aldaw ket isuda dagiti maudi nga aldaw sakbay nga agsubli ni Jesus ditoy daga. Dagiti Santo ket isuda dagiti nalinteg a tao a mamati ken ni Jesucristo. Isuda dagiti kameng ti pudno a Simbaanna.

DkK 1:30; 115:4

# APAGKAPULLO

Maika-44 a Paset (Hulio 1838)



Adda dagiti Santo iti Far West, Missouri. Imbaga ti Apo ken ni Joseph Smith a nasken nga agbayad dagiti tao iti apagkapullo. Nagkararag ni Joseph iti Nailangitan nga Ama. Dinamagna no mano ti apagkapullo a nasken a bayadan dagiti Santo. Adda impaltiing ti Apo kenkuana. Kinuna ti Apo a nasken nga agbayad dagiti Santo iti maysa nga apagkapullo.


DkK 64:23; 119: Pakauna




No makateggedda iti sangapulo a pisos nasken nga itedda ti pisos a kas apagkapullo. No makateggedda iti sangagasut a pisos nasken nga itedda ti sangapulo a pisos.



Makapagbayad dagiti Santo iti apagkapulloda iti sabali a wagas. Binayadan dagiti Santo ti apagkapulloda iti naapitda kadagiti mulada. Intedda ti maysa nga apagkasangapulo ti bukbukel ken pagayda. Intedda ti apagkasangapulo dagiti manok ken dadduma pay a tarakenda nga ayup. Binayadanda ti apagkapullo dagiti gatas ken natnateng.



Maaramat ti kuarta nga apagkapullo a pangtulong kadagiti kameng ti Simbaan. Makatulong ti apagkapullo a panggatang iti taraon ken pagan-anay para kadagiti agkasapulan a tao.



Maaramat ti apagkapullo a pangpatakder kadagiti templo ken pangtulong iti aramid ti misionario. Maaramat pay a pangtulong kadagiti tao a mangipaay amin iti panawenda nga agrabaho para iti Apo.



Itedtayo ti apagkpullotayo iti obispo. Ited ti obispo daytoy kadagiti dadaulo ti Simbaan. Isuda ti mangikeddeng no kasano a maaramat ti apagkapullo.

DKK:120



Mangted ti Nailangitan nga Ama kadagiti naisangsangayan a bendision kadagiti Santo nga agbayad iti apagkapullo. Saan a maaddaan iti amin dagitoy a bendision dagiti Santo a saan nga agbayad iti apagkapullo. Kuna ti Biblia a dagiti Santo a saan nga agbayad iti apagkapullo ket taktakawanda ti Dios.

Malakias 3:8-10

# Dagiti Bunggoy a Mangriribuk iti Missouri

Maika-45 a Paset (1833)



Sumagmamano kadagiti Santo ti agnanaed idi iti Far West, Missouri. Nagnaed ni Joseph Smith sadiay. Naragsakan dagiti tao. Nagipatakderda kadagiti napipintas a pagtaengan ken pagadalan.



Ngem saan unay a nagpaut ti talna dagiti Santo. Riniribuk ida dagiti dakes a tao. Nagipadamagda iti inuulbod maipapan kadagiti Santo. Pinadpadakesda dagiti dadaulo ti Simbaan.



Naguummong ti bunggoy dagiti mangriribuk a nangplano kadagiti wagas a pangdangranda kadagiti Santo.



Adu a dakes a banag ti inaramid dagiti mangribuk.  
Pinaruarda dagiti Santo manipud kadagiti pagtaenganda.



Pinuoranda dagiti pagtaenganda ket dinadaelda dagiti talonda.



Kinabilda dagiti lallaki ket impupokda iti pagbaludan ti  
sumagmamano kadakuada.



Dinangran dagiti bunggoy a mangribuk dagiti babbai ket  
pinatayda ti sumagmamano kadakuada.



Ni Mr. Boggs ti gobernador ti Missouri. Adu ti pamadpadakes nga impulong ti bunggoy dagiti mangriribuk kenkuana maipapan kadagiti Santo.



Binilin ni Gobernador Boggs ti sumagmamano a soldado a mangpatay kadagiti Santo no saanda a pumanaw iti Missouri. Naragsakan ti bunggoy dagiti mangriribuk. Adu pay dagiti dakes a banag nga inar-aramidda. Saan a linapdan ida ti gobernador.



Sumagmamano a Santo ti nagnaed iti maysa nga ili a managanan iti Haun's Mill. Maysa nga aldaw sumagmamano kadakuada ti agtartrabaho iti talon. Agtartrabaho kadagiti pagtaenganda dagiti dadduma. Simmangpet dagiti mangriribuk ket rinautda ida.




Sumagmamano kadagiti Santo ti nagtaray a napan iti maysa a pasdek a naaramid iti tabla. Pinaltogan ti bunggoy dagiti mangriribuk ti baet dagiti diding.





Pinatay ti bunggoy dagiti mangririkbuk dagiti Santo nga aglemlemeng. Sumagmamano nga ubbing ti napaltogan ken napapatay.



Kalpasanna tinakawan dagiti mangririkbuk dagiti pagtaengan ken karison dagiti Santo. Pinapatayda ti kaaduan kadagiti lallaki. Nabati nga is-isuda dagiti babbai ken ubbing.



Iti saan a mabayag, tiniliw ti sumagmamano a soldado ni Joseph Smith ken dadduma a dadaulo ti Simbaan. Nabilin dagiti soldado a paltoganda ni Joseph Smith ken dagiti gagayemna.



Ngem saan a nagtungpal ti dadaulo dagiti soldado. Saanna a pinaltogan ni Joseph ken dagiti dadduma. Kinunana a pammapatay daytoy.




Imbalud dagiti soldado ni Joseph ken dagiti gagayemna. Kinawaran ida dagiti soldado. Nalamiis ti uneg ti pagbaludan. Nasken a maturog da Joseph ken dagiti gagayemna iti nalamiis a datar.

Dakes a lallaki dagiti agbambantay. Nagsapata ken nagisalaysayda kadagiti pamadpadakes nga estoria. Imbagada no kasano a tinakawan ken pinapatayda dagiti Santo. Imbagada no kasano ti panangdangranda kadagiti babbai ken ubbing. Nagpatnag a nagkakatawa ken naglilinnastogda.



Kinagura ni Joseph dagiti sasaoda. Saanna a kinayaten ti dumngeg. Timmakder ket binilinna ida nga agsardeng iti nagan ni Jesucristo. Kinunana, "Agsardengkayo! No saan, siak wenno dakayo ti matay iti daytoy met la a kanito." Nagbuteng dagiti agbambantay. Imbagada ken Joseph a ladingitenda. Siuulimekda a nagtugaw iti maysa a suli.



Maysa ni Brigham Young kadagiti Apostol. Kiniddawna kadagiti Santo a dumar-ayda iti taripnong bayat ti kaadda ni Joseph iti pagbaludan. Imbaga ni Brigham Young kadakuada a nasken a pumanawda iti Missouri. Kaaduanna kadagiti Santo ti marigrigat. Awan ti karison wenno kabalioda. Kinuna dagiti lallaki nga adda iti taripnong a tulonganda nga umakar dagiti marigrigat a Santo.

Pimmanaw dagiti Santo iti Missouri. Panawen ti lamiis ket nakalamlam-ek. Pinadas a dinangran ti bunggoy dagiti mangriribuk ida. Tinakaw ti bunggoy dagiti mangriribuk dagiti kabalio ken baka dagiti Santo.



Napan dagiti Santo iti Quincy, Illinois. Naasi kadakuada dagiti tao iti Quincy.

Naragsakan ni Gobernador Boggs ken dagiti gagayyemna ta pimmanawen dagiti Santo. Dagiti laengen adda iti pagbaludan ti nabati a Santo iti Missouri.

# Ni Joseph iti Pagbaludan ti Liberty

Maika-46 a Paset (Marso 1839)



Adu nga aldaw a naibalud da Joseph Smith ken dagiti gagayyemna. Sada nayakar iti sabali a pagbaludan. Masarakan daytoy iti Liberty, Missouri.



Nalamiis ken narugit ti Pagbaludan ti Liberty. Nagsagaba ti kasta unay ni Joseph ken dagiti gagayyemna. No dadduma mapungoda iti kadena. Nasken a maturogda iti datar.



Saan a naimas ti kanenda. No dadduma adda sabidong daytoy a gapu ti pagsakitanda.



Nagladingit ni Joseph. Nabayagdan kadagiti gayyemna a nakapupok iti pagbaludan. Saan nga ammo ni Joseph no makaruada pay. Madanagan isuna maipapan iti Simbaan.



Nagkararag ni Joseph iti Nailangitan nga Ama. Dinamagna no kasano ti kapaut ti panagsagabana ken dagiti Santo. Kiniddawna iti Nailangitan nga Ama a tulonganna koma ida. Kiniddaw ni Joseph iti Nailangitan nga Ama a dusaenna koma dagiti kabusorda.

DkK 121:1-6




Imbaga ni Jesus ken ni Joseph a mabiit laengen a kanito ti panagsagabana. Imbagana ken ni Joseph nga agbalin a natured. Iti kasta bendisionanto ti Dios isuna. Kinuna ni Jesus a mabiit laengen a panawen a makadennanton ni Joseph dagiti gagayemna. Inay-ayat dagiti gagayemna ni Joseph ket maragsakandanto a makakita kenkuana.

DkK 121:7-9



Ammo ni Jesus no ania ti inaramid dagiti dakes a tao. Imbagana ken ni Joseph no kasano a dusaennanto ida. Saanto a kaano man maaddaan iti kinasaserdote dagiti a dakes a tao. Saanto a kaano man maaddaan dagiti annakda iti kinasaserdote. Agsagaba ken matayto dagiti dakes a tao.

DkK 121:15, 21



Imbaga ni Jesus ken ni Joseph nga adunto ti nasayaat a banag a mapasamak kadagiti Santo. Awan makalapped iti Dios iti panagparaburna kadakuada. Ibaganto ti Espiritu Santo dagiti nakaskasdaaw a banag maipapan iti bileg ti Dios. Masursurodanto ti maipapan iti langit ken daga.

DkK 121:26-33



Kinuna ni Jesus a nasken a saan nga agbuteng ni Joseph no kasapulanna ti agsagaba. Nasken a di mariribukan ni Joseph no adda dagiti pannubokna. Kinuna ni Jesus a para iti bukodtayo a pagsayaatan dagiti pannubok. Tulongannatayo a makasursuro dagiti pannubok. Ad-adu pay ti sinagaba ni Jesus ngem iti asino man.

DkK 122:7-9

# Dimmawat ni Joseph Smith iti Tulong iti Presidente

Maika-47 a Paset  
(Marso–Nobiembre 1839)



Nagsurat ni Joseph Smith kadagiti Santo bayat ti kaaddana iti Pagbaludan ti Liberty. Imbagana kadakuada nga isuratda dagiti dakes a banag nga inaramid ti bunggoy dagiti mangriribuk kadakuada. Nasken nga ipatulodda dagiti insuratda kadagiti dadaulo ti pagilian.

DkK 123:1, 4, 6



Imbaga ni Joseph kadagiti Santo nga isuratda ti nagan dagiti dakes a tao a nangdangran kadakuada. Nasken nga ibagada no kasano a nadadael dagiti pagtaengan ken talonda.

DkK 123:1–3



Maysa nga aldaw sumagmamano nga agbambantay ti nangyakar ken ni Joseph ken dagiti uppat a gagayemna iti sabali a pagbaludan. Gimmatang da Joseph ken dagiti gagayemna iti dua a kabalio manipud kadagiti agbambantay. Nangtedda kadakuada iti lupot a kas bayad ti maysa a kabalio. Inkarida a maud-udi ti bayad ti maysa a kabalio.

Maysa a rabii, uppat kadagiti agbambantay ti nabartek ket nakaturrog. Sabali nga agbambantay ti timmulong ken ni Joseph ken dagiti gagayemna nga aglibas.




Nagsisinnublat a pinagsakayan da Joseph ken dagiti gagayemna ti kabalio. Napanda iti Quincy, Illinois. Sangapulo nga aldaw a nagdaliasatda sakbay a nakadanonda sadiay.

Nasarakan ni Joseph ken dagiti gagayemna dagiti kaamaanda. Naragsakanda a makadenna manen ida.





Kayat dagiti Santo ti mangbirok iti lugar iti Illinois a pangbangonanda iti maysa a ciudad. Gimmatangda iti sumagmamano a daga iti asideg ti Karayan Mississippi. Nabasa ken napitak ti daga. Immakar da Joseph ken dagiti Santo sadiay. Sipapasnekda a nagtrabaho a nangpamaga iti daga. Nagipatakderda kadagiti pagtaengan ken nagitukitda kadagiti mula. Nangipatakderda iti maysa napintas a ciudad. Ninagananda ti ciudad iti Nauvoo. Kayat a sawen ti Nauvoo ket napintas a lugar.



Idi agangay, napan nakipagkita ni Joseph Smith iti presidente ti Estados Unidos. Imbaga ni Joseph iti presidente ti maipapan kadagiti bunggoy a mangriribuk iti Missouri. Imbagana no kasano ti panangpuor dagiti dakes a tao iti pagtaengan dagiti Santo ken panangtakawda kadagiti tarakenda nga ayup.

Kinuna ni Joseph a sumagmamano kadagiti Santo ti napapatay. Naibalud dagiti dadduma a Santo. Impakitana iti presidente no ania ti insurat dagiti Santo. Kinuna ni Joseph a saan a tulongan dagiti dadaulo iti Missouri dagiti Santo. Kiniddawna iti presidente a tulonganna koma dagiti Santo ket dusaenna dagiti kabusorda.



Kinuna ti presidente nga ammona a nagsagaba dagiti Santo. Ngem awan ti maaramidna a tulong kadakuada. No tulonganna dagiti Santo, agunget dagiti tao iti Missouri.


Nagladingit ni Joseph agsipud ta saan a matulongan ti presidente dagiti Santo. Ti laeng Nailangitan nga Ama ti makatulong kadakuada.

# Dagiti Misionario Kadagiti Sabali a Lugar

Maika-48 a Paset  
(Hunio 1837–Oktubre 1841)



Kayat ti Apo a makasursuro iti ebanghelio dagiti tao kadagiti sabali a pagilian. Imbagana ken ni Joseph Smith a nasken nga agmision ti sumagmamano kadagiti Santo iti Inglatera. Napili ni Elder Heber C. Kimball ken tallo a sabali pay a lalaki a mapan. Nagluganda iti bapor a napan iti Inglatera.



Naam-ammoda ti maysa a lalaki a dadaulo ti sabali a simbaan. Pinalubosan ti lalaki dagiti misionario a mangasaba iti simbaanna. Adu kadagiti tao iti namati kadagiti misionario. Tinarigagayanda ti mabuniagan. Daytoy ti nagpungtotan ti dadaulo. Kinunana a saanen a makaikasaba pay dagiti misionario iti simbaanna.



Nangasaba dagiti misionario iti pagtaengan dagiti tao. Adu kadagiti tattao ti nagkameng iti Ti Simbaan ni Jesucristo dagiti Santo iti Ud-udina nga Aldaw.



Iti saan a nabayag nagmision dagiti sabali a lallaki iti Inglatera. Sumagmamano kadakuada ti Apostol. Kinasarita ni Joseph ida sakbay a napanda. Imbagana kadakuada no ania ti nasken nga isuroda kadagiti tao.



Imbaga ni Joseph kadagiti Apostol a tungpalenda ti amin a bilin ti Dios. Imbagana kadakuada ti maipapan iti kinasaserdote. Kinunana a ti laeng pudno a Simbaan ni Jesucristo ti addaan iti kinasaserdote.



Sisasagana dagiti lallaki a mapan iti misionda. Awan a pulos ti kuartada. Adu kadakuada ti masakit. Sumagmamano kadagiti assawa ken annakda ti masakit. Ngem ammo dagitoy a lallaki a tulongan ida ti Nailangitan nga Ama ket paraburanna dagiti kaamaanda.



Napan dagiti misionario iti Inglatera. Nangasabada iti adu nga ili. Rinibu kadagiti nasayaat a tattao ti namati iti ebanghelio. Nagkamengda iti Simbaan ni Jesucristo. Binendisionan ti Nailangitan nga Ama dagiti misionario. Nakasublida a sitatalged kadagiti pagtaenganda kalpasan ti misionda.



Maysa ni Orson Hyde kadagiti Sangapulo-ket-dua nga Apostol. Kinuna ni Joseph Smith nga adda naisangsangayan a trabaho ni Orson para kadagiti Judio. Napan ni Orson iti daga a Palestina. Idi Oktubre 24, 1841, nangisao iti kararag a pangidatonna iti daga ti Palestina.

Dinawatna iti Nailangitan nga Ama a bendisionanna ti daga. Inkararagna nga adda koma danum tapno dumakkel dagiti mula. Inkararagna a makapan koma amin dagiti annak ni Abraham tapno agnaed iti Palestina. Makaipatakderda koma kadagiti balay ken makapagmulada sadiay.



Binendisionan ti Dios ti daga a Palestina. Ita, maawagan daytoy iti Israel. Idi 1979, nagkararag ni Presidente Spencer W. Kimball a pangidaton iti minuyongan iti Israel. Maawagan daytoy iti The Orson Hyde Memorial Garden.

# Dagiti Santo iti Nauvoo

Maika-49 a Paset (Enero–Hulio 1841)



Agnanaed ni Joseph Smith ken dagiti adu a Santo iti Nauvoo, Illinois. Inikkan ni Jesus ni Joseph iti sumagmamano a napapateg a paltiing. Kinuna ni Jesus a maragsakan kadagiti naaramid a trabaho ni Joseph. Kinuna ni Jesus a nasken a makasabaan koma ti amin nga ari ken dadaulo iti lubong maipapan iti ebanghelio.

DkK 124:1–8



Kinuna ni Jesus a nasken mangipatakder dagiti Santo iti templo iti Nauvoo. Kayatna a mangted dagiti Santo iti balitok ken pirak para iti templo. Nasken a mangitugotda iti adu a kita ti napipintas a kayo a pangpatakder iti templo.

DkK 124:26–27



Imbaga ni Jesus a mapanto iti templo. Mangtedto kadagiti paltiing maipapan iti Simbaan ken kinasaserdotena.

DkK 124:27, 40



Imbaga ni Jesus ken ni Joseph a kasapulan dagiti Santo ti mabuniagan para kadagiti pimmusayen a tao. Imbagana a nasken a mangaramidda koma iti puente a pagbuniagan iti templo. Mabalín a mabuniaganda para kadagiti natay iti puente.

DkK 124:29–37



Kinuna ni Jesus a patpatgenna ti lalaki a kabsat ni Joseph a ni Hyrum. Ni Hyrum Smith ti agbalinto a Patriarka ti Simbaan. Mangtedto iti naisangsangayan a bendision kadagiti Santo.

DkK 124:91–92



Maysa nga aldaw, nangted ti Apo ken ni Joseph iti maysa a paltiing maipapan ken ni Brigham Young. Kinuna ni Jesus a patpatgenna ni Brigham Young. Ammona a nagtrabaho a sipapasnek ni Brigham Young para iti Simbaan. Namin-adu nga immadayo iti pagtaengan gapu kadagiti adu a mision. Napanawanna ti kaamaanna iti adu a panawen.

DkK 126:1–2



Kinuna ti Apo a nasken nga agtalinaed ni Brigham Young iti sidong ti kaamaanna. Naisangsangayan koma ti panangtaripatonan kadakuada.

DkK 126:3

# Dagiti Immuna nga Endowment

Maika-50 a Paset (Mayo 1842)




Inkari Jesus ken ni Joseph Smith nga ipaayannanto dagiti tao iti naisangsangayan a bendision. Maawagan daytoy a bendision iti endowment. Maited ti endowment iti templo. Dagiti laeng babbai ken lallaki nga agtungtungpal kadagiti bilin ti Dios ti mabalin a maaddaan iti endowment.

DkK 105:12, 18, 33; 110:9; 124:40–41



Idi agangay, nakitaripnong ni Joseph Smith kadagiti lallaki ken dagiti assawada. Insuro ni Joseph kadakuada dagiti banag nga aramidenda iti templo. Kalpasanna naited ti endowment kadakuada amin.



Ita, makapan iti templo dagiti tao a managtungpal kadagiti bilin ti Dios. Maaddaanda iti naisangsangayan a bendision ti endowment. Makasursuroda kadagiti banag a nasken a maammuanda tapno makasublida iti langit. Agaramidda iti katulagan iti Dios. Agaramid met ti Dios iti katulagan kadakuada.



# Ti Gimong ti Kaasi

Maika-51 a Paset (Marso 1842)



Patpatakderen idi dagiti kameng ti Simbaan ti templo ti Nauvoo. Rutroten dagiti bado dagiti lallaki. Kayat dagiti babbai a tulongan ida. Maysa a babai ti nagkuna nga idaitanna iti bado dagiti lallaki. Ngem awan met ti kuarta nga igatangna iti lupot.



Kinuna ni Sarah M. Kimball nga ikkana dagiti babbai iti sumagmamano a lupot. Kiniddaw ni Sister Kimball a tumulong dagiti dadduma a babbai. Adda taripnong dagiti babbai iti pagtaengan ni Sister Kimball. Inkeddengda ti mangbukel iti gimong dagiti babbai iti Simbaan.




Kiniddaw dagiti babbai ken ni Eliza R. Snow a mangisurat iti sumagmamano nga alagaden para iti gimong. Impanna ken ni Joseph Smith dagiti alagaden. Kinuna ni Joseph Smith a napintas unay dagiti alagaden. Ngem kinunana nga adda nasaysayaat a plano ti Apo para kadagiti babbai.



Kiniddaw ni Joseph Smith kadagiti babbai a dumar-ay iti taripnong iti 17 ti Marso 1842. Kinunana a tumulong dagiti dadaulo ti kinasaserdote kadagiti babbai iti gimongda. Adda sangapulo-ket-walo a babbai iti taripnong. Napili ni Emma Smith a dadaulo dagiti babbai. Inawaganda ti gimongda iti Gimong ti Kaasi.



Imbaga ni Joseph Smith kadagiti babbai a tumulongda kadagiti tao a masakit wenna nakurapay. Nasken nga ipaayanda koma dagiti tao iti ania man a tulong a kasapulanda. Tumulong ti obispo kadagiti babbai a mangammo no ania ti aramidenda.



Nagtataripnong dagiti babbai tapno masursuroda dagiti banag a nasken a maammuanda. Naragsakanda unay ta makatulongda kadagiti kameng ti Simbaan.



Nagaramid dagiti babbai kadagiti banag a para iti templo. Nagdaitda kadagiti bado para kadagiti lallaki a mangipatpatakder iti templo.



Mangted dagiti babbai iti taraon dagiti tao a makasapul iti daytoy. Inaywananda dagiti tao a masakit. Adu dagiti banag nga inaramidda a makatulong kadagiti Santo.



Makapan dagiti babbai ti Simbaan iti Gimong ti Kaasi. Tulonganda dagiti tao. Sursuruenda ti maipapan iti ebanghelio. Sursuruenda ti maipapan kadagiti tao iti dadduma a pagilian. Sursuruenda ti maipapan kadagiti nasayaat a libro, musika, ken arte. Sursuruenda no kasano ti mangpasayaat kadagiti bukodda a pagtaengan.



# Riribuk iti Nauvoo

Maika-52 a Paset (Mayo–Agosto 1842)



Adu a tattao ti napan nagnaed iti Nauvoo. Nangipatakderda iti napintas a ciudad. Inrugida a pinatakder ti templo. Kayat dagiti Santo iti Nauvoo a maaddaan iti mayor para iti ciudad.



Pinili dagiti Santo ni John C. Bennett tapno agbalin a mayor iti Nauvoo. Nasayaat a mayor daytoy idi damona. Ngem nangrugi a nagaramid kadagiti dakes a banag. Dina kayat ni Joseph Smith.



Kayat dagiti tao iti Nauvoo a maaddaanda iti naisangsangayan a panagtitipon. Kayatda nga agmartsa dagiti soldado iti parada.




Ni John Bennett ti dadaulo dagiti soldado. Inkeddengna nga adda dangadang dagiti soldado. Saan nga agpaypayso a dangadang daytoy. Pagaragsakan laeng daytoy.




Kiniddaw ti Mr. Bennett nga idauluan ni Joseph Smith dagiti soldado iti dangadang. Ammo ni Joseph Smith ti saan a panangayat kenkuana ni John Bennett. Napanunotna a kayat isuna a patayen ni Mr. Bennett. Imbaga ti Apo ken ni Joseph a nasken a saan a mapan iti dangadang.



Nakaunget ni John Bennett. Dina kinayat ti agbalin a mayor iti Nauvoo. Pinili dagiti tao ni Joseph Smith nga agbalin a mayor.



Saan a kinayat ni John Bennett ken sumagmamano a lallaki ti agbalin a kameng ti Simbaan. Adu ti pammadpadakesda maipapan ken ni Propeta Joseph Smith.



Kinasao ni Joseph Smith dagiti sumagammano a lallaki a kameng ti Simbaan. Imbagana nga umad-adu ti riribuk kadagiti Santo. Iti maysa nga aldaw panawandanto ti Nauvoo. Mapandanto iti Rocky Mountains. Mangipatakdero dagiti Santo iti siudad sadiay. Tungpalendanto ti Dios ket agbalindanto a natikber a tattao.



# Ti Dios ken Dagiti Anghel

Maika-53 a Paset (Pebrero–Abril 1843)



Maysa nga aldaw, maysa a lalaki ti napan nakipagkita ken ni Joseph Smith. Kinuna ti lalaki a nakakita isuna iti anghel. Imbagana ken ni Joseph Smith no kasano nga agkawes ti anghel. Kinuna ni Joseph Smith a nagbiddut ti lalaki. Imbagana a saan nga agkawes dagiti anghel iti wagas a kas iti kinuna ti lalaki.



Kasta unay ti pungtot ti lalaki. Imbilinna nga adda koma agtinnag nga apuy manipud iti langit tapno mapوران ti Propeta ken ti balayna. Ngem awanan ti lalaki iti bileg ti Dios. Awan apuy a nagtinnag manipud iti langit.



Nangted ni Jesus iti paltiing ken ni Joseph Smith maipapan kadagiti anghel. Imbaga ni Jesus a tao dagiti anghel a nagbiag iti daga. Natayda ken napagungarda. Adda bagida a nagtagilasag ken tulang. Ita agbiagda a kadennada ti Dios.

DkK 129:1



Kinuna ni Jesus a padpadasen ni Satanas nga allilawen dagiti tao. No dadduma pagbalinenna a panunoten dagiti tao nga isu ket maysa nga anghel. Padasenna nga allukoyen dagiti tao nga agaramid kadagiti dakes a banag. Ngem ammo dagiti nalinteg a tao no padpadasen ni Satanas ida nga allilawen.

DkK 129:8



Iti saan a nabayag, imbaga ni Joseph Smith kadagiti tao ti dadduma pay a banag maipapan iti langit. Dagiti tao a nagbiag a nalinteg ditoy daga ket agbiagdanto iti langit a kadenna ni Jesucristo. Iti langit ammodanto amin a banag a nasursuroda iti daga.

DkK 130:6-7



Imbaga ni Joseph Smith nga amin dagiti paglintegan ti Dios ket naaramid iti langit sakbay nga immaytayo ditoy daga. Adda parabur ti tunggal paglintegan. Nasken nga agtungpaltayo iti paglintegan tapno adda kadatayo ti parabur.

DkK 130:20-21



Imbaga ni Joseph Smith kadagiti Santo ti maipapan ken ni Jesucristo ken ti Nailangitan nga Ama. Kalanglanga ni Jesus ti tao. Nagbiag isuna iti daga. Natay ken nagungar. Adda bagina a nagtagilasag ken tulang.

DkK 130:22

Addaan iti bagi a nagtagilasag ken tulang ti Nailangitan nga Ama. Agnaed isuna iti napintas, agrimrimat a lugar.

DkK 130:7, 22; Abraham 3:4



Kinuna pay ni Joseph Smith a maysa nga espiritu ti Espiritu Santo. Awanan iti bagi a nagtagilasag ken tulang ti Espiritu Santo.

DkK 130:22

# Ti Paltiing Maipapan iti Panagasawa

Maika-54 a Paset (Hulio 1843)



Nagdamag ni Joseph Smith iti Apo maipapan iti panagasawa. Imbaga ni Jesus kenkuana a ti lalaki ken babai ket nasken a pagkallaysaen ti maysa a lalaki nga addaan iti kinasaserdote. Nasken nga agkallaysada iti templo. Nasken a tungpalenda dagiti bilin ti Dios. Iti kasta agkallaysadanto iti agnanayon.

DkK 132:1-29



Agnaedto iti celestial a pagarian ti langit dagiti nalinteg a tao a nagkallaysa iti agnanayon. Kukuadanto dagiti annakda nga agtungpal iti Dios. Maysadanto a kaamaan. Agbiagdanto a kadenna ti Dios. Agbalindanto a kas kenkuana.

DkK 132:1-29



Kinuna ni Jesus a no dadduma ibaga ti Dios kadagiti propetana a mabalinda ti mangasawa iti nasurok a maysa. Ngem nasken nga aramiden laeng dagiti lallaki daytoy no ibilin ti Dios kadakuada.

DkK 132:32-39

# Ad-adu Pay a Riribuk Kadagiti Santo

Maika-55 a Paset (1843–1844)



Saan a kameng ti Simbaan ti kaaduan dagiti tao iti asideg ti Nauvoo. Adu kadakuada ti saan a nangayat kadagiti Santo. Saanda a kinayat a dagiti Santo ti agbalin a dadaulo iti ciudad. Nangarnuayda iti riribuk kadagiti kameng ti Simbaan.



Naguummong a sangkamaysa dagitoy a tao kadagiti bunggoy a mangriribuk. Tinakawda dagiti ayup a taraken dagiti Santo. Pinuoranda dagiti sarusar ken balay. Pinadasda a papanawen dagiti Santo iti Nauvoo. Saan a mapagsardeng dagiti pulis ken soldado dagiti mangriribuk. Saan a tumulong ti gobernador kadagiti Santo.



Naibaga idin ni Joseph Smith kadagiti Santo iti Nauvoo a maaddaandanto iti riribuk. Pimmayso dagiti banag a kinuna ni Joseph Smith. Ammo ni Joseph a nasken a pumanawto dagiti Santo iti Nauvoo. Nasken a mapanda iti lugar nga awan ti mangringgor kadakuada.



Adda miting ni Joseph Smith kadagiti Apostol ken sumagmamano a dadduma pay a lallaki. Imbagana kadakuada a mangbirokda iti lugar a mabalin a pagnaedan dagiti Santo.



Nagsapul ni Joseph Smith kadagti mapa ti pagilian. Impakita dagiti mapa ti maysa a lugar nga addaan kadagiti nangato a bantay ken nalawa a tanap. Nagnaed dagiti Indian idiyay. Ammo ni Joseph a nasayaat a lugar daytoy a pagyanan dagiti Santo. Saan ida a madangran dagiti mangrilibuk. Namnamaen ni Joseph a makapan agnaed dagiti Santo sadiay.



Sigud a kameng ti Simbaan dagiti dadduma a tao iti Nauvoo. Ngem saandan a mamati pay iti ebanghelio. Kinagurada ni Joseph Smith. Kayatda a patayen. Nangirugida iti maysa a pagiwarnak. Nagsuratda ditoy kadagiti pamadpadakes ken ni Joseph ken dagiti Santo.



Nakapungtot dagiti dadaulo ti Nauvoo maipapan iti pagiwarnak. Sumagmamano kadakuada ti napan iti pasdek ti pagiwarnak. Pinuoranda dagiti pagiwarnak. Dinadaelda ti pagimalditan. Saanen a maimaldit pay ti pagiwarnak.

# Napapatay ti Propeta

Maika-56 a Paset (Hunio 1844)



Sumagmamano kadagiti tao ti nangpabasol ken ni Joseph Smith gapu ti riribuk iti Nauvoo. Naibalud ni Joseph. Kinuna ti ukom nga awan ti dakes nga inaramid ni Joseph Smith. Pinaruarna ni Joseph.



Kasta unay ti pungtot dagiti mangrribuk iti ukom. Kinunada a patayenda ti ukom. Nagbuteng dagiti Santo iti Nauvoo. Kiniddawda iti gobernador ti estado a tulonganna ida. Ngem dina kayat. Nangibaon kadagiti soldado a mangsapul ken ni Joseph Smith.



Ammo ni Joseph Smith nga amangan no maibalud manen. Nagbuteng ni Joseph amangan no maibalud met ni Hyrum a kabsatna. Imbaga ni Joseph ken ni Hyrum nga ipanawna ti kaamaanna ket mapanda iti sabali a ciudad. Ngem saan a kayat a panawan ni Hyrum ni Joseph.





Kinuna ni Joseph Smith a nasken a pumanawda ken ni Hyrum iti Nauvoo. No aramidenda saan a dangran dagiti mangriribuk dagiti Santo. Isu a bimmallasiw da Joseph ken Hyrum iti karayan.



Sumagmamano kadagiti tao ti nagkuna a pumanaw ni Joseph Smith agsipud ta mabuteng. Nangibaon ni Emma nga asawa ni Joseph iti sumagmamano a gagayyem tapno dawatenda ti panagsublina. Impagarup ni Joseph Smith a mapatay no agsubli iti Nauvoo. Ngem inaramidna ti kayat dagiti gagayyemna nga aramidenna.



Nagsubli da Joseph ken Hyrum iti Nauvoo. Natiliwda. Impan dagiti soldado ida a kaduada da Willard Richards ken John Taylor iti maysa nga ili a maawagan iti Carthage. Impupokda ida iti Pagbaludan ti Carthage.



27 ti Hunio, 1844 ti sumaruno nga aldaw. Sumagmamano kadagiti gagayyem ni Joseph Smith ti simmarungkar kenkuana iti pagbaludan. Binasada dagiti nasantuan a kasuratan. Kinanta ni John Taylor ti maysa kadagiti paggugusto ni Joseph a kanta a maipapan ken ni Jesus.



Kellaat a nakanggegda iti ringgor iti ruar. Palpaltogan idi ti bunggoy dagiti mangriribuk ti pagbaludan. Nasurok a sangagasut a lallaki ti dagup ti bunggoy dagiti mangriribuk. Pinintaanda dagiti rupada tapno awan ti makailasin kadakuada.



Sumagmamano kadagiti bunggoy dagiti mangriribuk ti nagtaray a nanglabas iti agbambantay ket induronda a linukatan ti ridaw ti pagbaludan. Nagtarayda nga immuli. Pinaltoganda ti uneg ti siled. Pinaltoganda ni John Taylor, ngem saanda a napatay. Pinatayda ni Hyrum. Nakita ni Joseph a natayen ni Hyrum. Kinunana, "O, patpatgek a kabsatko a Hyrum!"




Nagtaray ni Joseph Smith a nagturong iti tawa. Pinaltogan ti bunggoy dagiti mangrribuk isuna. Nayebkasna, “ O Apo, Diosko.” Natnag iti ruar ti tawa. Natayen ti propeta ti Dios.



Naipan ti bangkay da Joseph Smith ken ti kabsatna a ni Hyrum iti Nauvoo. Kasta unay ti panagladingit dagiti Santo. Natayen ti dadaulo ken propetada. Intedna ti biagna gapu iti ebanghelio ni Jesucristo.

DkK 135



Adu ti napateg nga inaramid ni Propeta Joseph Smith. Impatarusna ti Libro ni Mormon. Inrugina ti pudno a Simbaan ni Jesucristo. Nangibaon kadagiti misionario a mangisuro iti ebanghelio kadagiti sabali a pagilian. Pinatakderna ti maysa a ciudad a mabalin a pagnaedan dagiti Santo. Inayat ti Dios ni Joseph Smith. Inayat isuna dagiti Santo. Ad-adu dagiti naaramid ni Joseph Smith a makatulong kadayo ngem ti naaramidan ti asino man a tao malaksid ken ni Joseph Smith a panangtulong kadayo ngem iti asino man a tao, malaksid ken ni Jesucristo.

DkK 135:3

# Ti Baro a Dadaulo ti Simbaan

Maika-57 a Paset (Hulio–Agosto 1844)



Natayen ni Propeta Joseph Smith. Awananen ti Presidente ti Simbaan. Saan nga ammo dagiti Santo no asino ti nasken nga agbalin a dadauloda.



Kaaduan kadagiti Apostol ti adda iti adayo a mision.



Ni Sidney Rigdon ti mamagbaga ni Joseph Smith. Ngem dina tinungpal ti Apo. Pimmanawen manipud iti Nauvoo.

DkK 124:108–109




Nanggeg ni Sidney Rigdon ti pannakatay ti Propeta. Nagsubli iti Nauvoo. Kayatna ti agbalin a dadaulo ti Simbaan.

Nagsubli da Brigham Young ken dagiti dadduma nga Apostol manipud iti misionda. Ni Brigham Young ti dadaulo dagiti Apostol. Kinunana a dagiti pay laeng Apostol ti mangidaulo iti Simbaan agingga a mapili ti baro a Presidente.

DkK 107:24



Adda taripong dagiti kameng ti Simbaan. Nagsao ni Sidney Rigdon kadakuada. Kinunana nga isu ti nasken nga agbalin a dadaulo ti Simbaan.



Kalpasanna nagsao ni Brigham Young. Kinunana a dagiti Apostol ti nasken a mangidaulo iti Simbaan. Adda ti Espiritu Santo kenkuana. Kaarngi ti timek ni Joseph Smith ti timek ni Brigham Young. Iti sumagmamano a minuto, naglanga a kas ken ni Joseph Smith. Ammo dagiti tao a pinili ti Dios dagiti Apostol a mangidaulo iti Simbaan. Nakaunget ni Sidney Rigdon. Nagsubli iti pagtaenganna. Nangirugi iti bukodna a simbaan. Saanen a kameng ti Ti Simbaan ni Jesucristo dagiti Santo iti Ud-udina nga Aldaw.

# Pimmanaw Dagiti Immuna a Santo iti Nauvoo

Maika-58 a Paset  
(Septiembre 1845–Pebrero 1846)



Kalpasan ti ipapatay ni Joseph Smith, impagarup ti bunggoy dagiti mangriribuk nga aggibusen ti Simbaan. Dida ammo a mangpili manen ti Apo iti baro a dadaulo. Kayat ti bunggoy dagiti mangriribuk a dadaelen ti Simbaan. Pinadpadakes dagiti pagiwarnak dagiti Santo. Impadamagda nga agtatakaw ken mammapatay iti tao dagiti Santo.



Saan a tulongan ti Gobernador ti estado dagiti Santo. Kinunana a kagura dagiti bunggoy a mangriribuk ida. Imbagana nga umakar dagiti Santo iti Laud. Kinuna ni Brigham Young a mapan dagiti Santo iti Laud. Ngem kasapulanda ti panawen nga agsagana. Kasapulanda ti kuarta a panggatang iti kanen ken lupotda. Nasken nga agaramidda idi iti karison ken gumatangda iti baka. Nasken nga ilakoda dagiti balayda.





Saan a kayat ti bunggoy dagiti mangriritubuk nga ikkan iti panawen dagiti Santo nga agsagana. Saan a kayat a gatangen dagiti tao ti pagtaengan dagiti Santo. Sumagmamano kadagiti Santo ti pinapanaw dagiti mangriritubuk kadagiti pagtaenganda. Nagtakawda kadagiti banag nga adda iti uneg dagiti balayda. Kalpasanna pinuoranda dagiti balay.



Sipapasnek a nagtrabaho dagiti Santo tapno makapagsaganada a pumanaw iti Nauvoo. Nagpukanda kadagiti kayo ket inaramidda a karison. Nanggatangda kadagiti ayup. Nagurnongda iti taraon. Kayat dagiti Santo a maileppasda ti templo sakbay a pumanawda.



Nangted dagiti Santo iti kuarta a pangbangon iti templo. Nagtrabahoda iti templo. Nalpasda ti kaaduan kadagiti kuarto. Indatonda ti tunggal siled tunggal malpasda daytoy. Inaramatda ti mayasa a kuarto a pagbuniagan iti tao para kadagiti natay. Adda komperensiada iti templo a para amin kadagiti kameng ti Simbaan.



Dimteng ti panawen ti lamiis. Kasta unay ti lamiisna. Adu a Santo ti pinapanaw ti bunggoy dagiti mangriritubuk kadagiti pagtaenganda. Inkarga amin dagiti Santo dagiti gargaretda iti uneg dagiti karisonda. Induronda dagiti karison nga inlugar kadagiti balsa. Binallasiwda ti Karayan Mississippi.



Gapu iti napalalo a lamiis nagbalin a yelo ti karayan. Pinataray da Brigham Young ken sumagmamano kadagiti Santo dagiti karisonda iti rabaw dagiti yelo ket napanda iti ballasiw ti karayan.



Nagkampo dagiti Santo iti igid ti karayan. Sumagmamano kadagiti tao ti awan umdas a kawesda. Kasta unay ti lamminda. Sumagmamano pay kadakuada ti awan umanay a taraonda. Nangibinglay iti dadduma dagiti Santo nga aduan iti taraon ken kawes. Nagtalinaed dagiti Santo iti igid ti karayan iti uneg ti sumagmamano nga aldaw. Kalpasanna immakarda a nagkampo iti sabali a disso. Nangpili ni Brigham Young kadagiti dadaulo. Tinulongan dagiti dadaulo dagiti tao nga agsagana nga agdaliasat a mapan kadagiti bantay iti Laud.


# Nalpas ti Templo ti Nauvoo

Maika-59 a Paset  
(Oktubre 1845–Septiembre 1846)



Sumagmamano kadagiti Santo ti saan a pimmanaw iti Nauvoo. Imbaga ti Apo kadagiti Santo a mangipatakderda iti templo iti Nauvoo. Kayatda a tungpalen isuna. Nagtrabaho a sipapasnek iti templo dagiti tao a nabati iti Nauvoo.

DkK 124:31



Adu ti nagsakit kadagiti Santo. Kaaduan kadakuada ti marigrigat. Ammoda a nasken a makapanawda iti Nauvoo iti kabiitan a panawen. Ngem kayatda nga ileppas pay ti templo.



Iti kamaudiananna, nalpas met laeng ti templo. Nagmalmalem ken nagpatpatnag a nagtrabaho dagiti Santo iti templo. Naikkanda iti endowment. Naragsakanda unay iti kaadda ti templo.



Iti kamaudiananna, nasken a pumanawen dagiti nabati a Santo iti Nauvoo. Inkargada amin dagiti gargaretda iti uneg dagiti karisonda. Binallasiwda ti Karayan Mississippi nga agturong iti sabali a disso.



Tinaliawda ti ballasiw ti karayan ket nakitada ti Nauvoo. Nakitada ti templo iti rabaw ti turod. Naladingitanda a nangpanaw iti Nauvoo. Ngem naragsakanda ta naileppasda ti templo ti Apo.



Nagtalinaed dagiti Santo iti igid ti karayan iti uneg ti sumagmamano nga aldaw. Awan umdas a taraon a kanenda. Tinulongan ida ti Apo. Nangipatulod kadagiti babassit a billit a maawagan iti pugo. Pinarti dagiti Santo dagiti pugo ket sindada dagitoy.



Nangipatulod ni Brigham Young iti sumagmamano a lallaki a tumulong kadagiti Santo. Intugot ida dagiti lallaki iti lugar a nagkampuan dagiti dadduma a Santo.

# Intuloy Dagiti Nagkauna a Kameng ti Simbaan ti Nagdaliasat


Maika-60 a Paset  
(Marso 1846–Hunio 1846)




Iti umuna a panawen ti panagsusulbod, inrugi manen dagiti Santo ti nagdaliasat. Napalalo pay laeng ti lamiis. Sumagmamano kadagiti tao ti nagsakit ket natay.



Narusanger unay dagiti kalsada. Nasken nga agdaliasat a siiinnayad dagiti tao. Patag ti daga ken adda sumagmamano a babassit a turod. Naabbongan ti daga kadagiti nangato a ruot. Maawagan daytoy a kita ti daga iti tanap. Nagnaed dagiti Indian kadagiti tanap. Awan dagiti ciudad wenno pagtatalonan.



Nangipatulod ni Brigham Young kadagiti lallaki nga agsapul kadagiti nasayaat a lugar a pagkampuam dagiti tao. Nagpukanda kadagiti kayo ket nagaramidda kadagiti balay a tabla. Rinangtayanda dagiti babassit a karayan. Pinalakada daytoy para iti panagdaliasat dagiti tao. Naawagan iti nagkauna a kameng dagiti Santo a nagdaliasat a napan iti Laud.



Nakadanon dagiti nagkauna a kameng iti nalawa a karayan. Maawagan ti lugar a nagsardenganda iti Council Bluffs. Timmipon kadakuada dagiti dadduma a Santo. Nagipatakderda iti kampo iti asideg. Nagtalinaed dita dagiti nagkauna a kameng agingga iti panawen ti kalgaw.



# Ti Batalion ti Mormon

Maika-61 a Paset  
(Hunio 1846–Hulio 1847)



Adda dagiti Santo iti Council Bluffs. Maysa a kapitan ti Armada ti Estados Unidos ti napan nangkita ken ni Brigham Young. Kapitan Allen ti naganna.



Imbaga ni Kapitan Allen a kasapulan ti presidente ti Estados Unidos ti 500 a lallaki a tumipon iti buyot. Kinuna ni Brigham Young nga agtungpal dagiti Santo iti kayat ti presidente a maaramid.



Nakisarita ni Kapitan Allen kadagiti lallaki ket lima gasut kadakuada ti timmipon iti armada. Naawaganda iti Batalion ti Mormon. No dadduma maawagan dagiti kameng ti Simbaan iti Mormon gapu ta mamatida iti Libro ni Mormon.



Imbaga ni Brigham Young a dagitoyto a lallaki ti kalaingan a soldado iti buyot. Nasken nga ikuyogda ti Biblia ken ti Libro ni Mormon. Nasken a naurnos, nadalus, ken nadayawda. Nasken a dida agsapata wenno agay-ayam iti baraha. Imbaga ni Brigham Young kadagiti lallaki a tungpalenda dagiti bilin ti Dios. Iti kasta, nasken a saandanto a pumatay iti asino man.



Simmurot ti Batalion ti Mormon ken ni Kapitan Allen. Nagladingit dagiti Santo a nangpalubos kadakuada. Kasapulana dagiti Santo dagiti amin a lallaki a tumulong kadakuada a mapan iti Laud. Dida kayat a pumanaw dagiti lallaki a mapan makiranget. Ngem ammoda a mabayadan dagiti soldado. Makatulong ti kuarta kadagiti Santo.



Nagpaabagatan ti Batalion ti Mormon. Sumagmamano kadagiti kaamaan dagiti soldado ti kimmuyog iti Batalion ti Mormon. Narigat unay ti panagdaliasat dagiti tao. Awan ressat ti pannagnada.



Narusanger unay dagiti kalsada. No dadduma mailumlom dagiti karison iti nauneg a kadaratan. Awan mainum a danum. Awan dagiti kayo a mapaglinongan tapno makapaginana dagiti lallaki. Sumagmamano a tattao ti nagsakit. Dagiti laeng masakit a tao ti makalugan iti karison.



Inkeddeng ni Kapitan Allen nga agbati iti Colorado dagiti masakit a soldado ken babbai ken ubbing. Nagyanda iti maysa nga ili a maawagan iti Pueblo. Nabayadan dagiti masakit a soldado iti kaaddada iti buyot. Sumagmamano kadagiti masakit a soldado ti nagipatulod iti kuarta kadagiti kaamaanda iti Council Bluffs. Nagipatulodda iti kuarta para kadagiti marigrigat a tao iti Nauvoo ken para kadagiti misionario.



Nagtuloy ti pannagna dagiti soldado iti Batalion. No dadduma dida ammo no sadino ti papananda. Nasken nga agkalida iti nauneg iti kadaratan tapno makasarakda laeng iti danum. Saan nasayaat ti raman ti danum. Awan umdas a kanen dagiti soldado. Awan kayo tapno makaaramidda koma iti apuy. Nagpuor dagiti lallaki kadagiti ruot.



Nakasabat dagiti soldado kadagiti Indian ken dadduma a tao nga adda kanenda. Awan kuarta dagiti soldado a paggangang iti kanenda. Inted dagiti soldado ti sumagmamano kadagiti kawesda kadagiti Indian. Inikkan dagiti Indian iti kanen dagiti soldado.



Nagdaliasat ti Batalion ti Mormon iti laud. Nakadanonda kadagiti sumagmamano a narangkis unay a bantay. Nasken a singdanan dagiti lallaki dagiti karisona ket ginuyodda nga insang-at dagitoy iti bantay. Sada impababa dagiti karison iti sabali a bangir.



Maysa nga aldaw, nakakita dagiti soldado iti sumagmamano a toro. Dinarup dagiti toro dagiti soldado. Nakiranget dagiti soldado kadagiti toro. Iti kamaudiananna, napapanawda dagiti toro. Maysa a lalaki ti nasugatan. Nabayag a panawen a saan a nakapagna.



Iti kamaudiananna, nakadanon ti Batalion ti Mormon iti Taaw Pacifico. Enero 29, 1847 idi. Kasta unay ti bannog dagiti soldado. Pigispigisen dagiti kawesda. Naragsakanda ta naggibus met laengen ti atiddog a panagdaliasatda.



Nabayadan dagiti soldado iti kaaddada iti buyot. Saanen a nasken ti kaaddada iti buyot. Mabalindan ti agawid kadagiti pagtaenganda iti sidong dagiti kaamaanda.



Sumagmamano kadagiti lallaki ti nagtalinaed iti California. Kaaduanna kadakuada ti napan iti Rocky Mountains tapno makikaduada kadagiti Santo a simmangpet sadiay manipud iti Council Bluffs.



# Napan Dagiti Nagkauna a Kameng iti Tanap ti Salt Lake


Maika-62 a Paset  
(Hunio 1846–Hulio 1847)



Adda pay la dagiti nagkauna a kameng iti Council Bluffs. Kasapulanda ti adu a napigsa a lallaki a tumulong kadakuada iti panagdaliasatda. Kaaduan kadagiti agtutubo a lallaki ti simmurot iti Batalion ti Mormon. Isu nga inkeddeng dagiti nagkauna a kameng a dida pay mapan iti Rocky Mountains agingga ti panawen ti panagsusulbod.



Binay-an dagiti Indian dagiti Santo a maaddaan iti sumagmamano a daga iti ballasiw ti karayan. Idiay ti nangipasdekan dagiti Santo iti maysa nga ili a ninagananda iti Winter Quarters. Nagaramidda kadagiti kalsada ken nagipatakderda kadagiti balbalay. Sumagmamano kadagiti balay ti naaramid iti tabla. Adda dagiti dadduma a balay iti rukib iti igid dagiti turod. Nagmula dagiti nagkauna a kameng kadagiti bukbukel.



Biningbingay ni Brigham Young ti siudad iti purpurok. Nangpili kadagiti lallaki nga agbalin nga obispo. Sumagmamano nga Indian ti nangrilibuk kadagiti nagkauna a kameng. Inaladan dagiti nagkauna a kameng ti aglawlaw ti siudad tapno saanen a makastrek dagiti Indian a nangrilibuk.



Bayat ti kaadda dagiti nagkauna a kameng iti Winter Quarters, adda paltiing ken ni Brigham Young. Imbaga ti Apo kenkuana no kasano nga agsagana dagiti tao iti ipapanawda. Imbagana ken ni Brigham Young no ania ti nasken nga aramiden dagiti tao bayat ti panagdaliasatda.



Kinuna ti Apo a nasken a mabingaybingay dagiti tao iti babassit a grupo. Tunggal grupo adda koma dadaulona. Nasken a tungpalen dagiti tao ti dadauloda. Nasken nga agtitinnulongda. Nasken nga aywananda dagiti kaamaan nga awanan iti ina wenno ama.

DkK 136:1-8



Tunggal grupo nasken nga adda bukodna a karison ken taraon. Tunggal grupo nasken nga adda taona a makaammo a mangtarimaan iti karison, agipatakder kadagiti balay, agmula kadagiti bukukel, ken agaramid kadagiti rangtay.

DkK 136:7



Adda pay dagiti dadduma a banag nga imbaga ti Apo a nasken nga aramiden dagiti Santo. Nasken a tungpalenda dagiti bilinna. Nasken a tungpalenda dagiti karida iti tungpal maysa. Nasken a dida agpipinnadakes iti tunggal maysa. Nasken nga agbalinda a napudno. Nasken nga isublida dagiti banag a nabulodda wenno nasarakanda.


DkK 136:23-27





Kayat ti Apo nga agragsak dagiti nagkauna a kameng. Imbagana kadakuada nga agkakanta ken agsalada a sangkamaysa. Nasken a saanda nga agbuteng. Tulongannanto ida. Imbagana kadakuada nga addanto dagiti parikutda. Ngem dagiti parikutda ti mamagbalinto kadakuada a nasaysayaat a tao. Maparaburandanto.

DkK 136:28-31



Inaramid ni Brigham Young ti imbilin ti Apo nga aramidenna. Biningayna dagiti tao iti tunggal grupo. Tunggal grupo adda amin dagiti kasapulanna a mangipasdek iti maysa a ciudad kadagiti bantay.



Adda komperensia dagiti Santo. Kalpasanna nangpili ni Brigham Young iti grupo nga umuna a pumanaw. Adda 143 a lallaki, tallo a babbai, ken dua nga ubbing. Iti kabigatanna, pimmanaw ti umuna a grupo iti Winter Quarters.



Adda trabaho ti tunggal maysa iti dalanda. Inaywanan dagiti babbai dagiti ubbing. Naglutoda iti kanenda. Adda paltog dagiti lallaki a pangsalaknibda kadagiti tao ken ayup.



Nagmalmalem a nagdaliasat dagiti nagkauna a kameng. Nagkampoda iti rabii. Inyurnosda a nagtimbukel dagiti karisonda. Agyan dagiti tao ken ayup iti uneg ti timbukel. Agaramidda ditoy iti apuy a paglutuanda kadagiti kanenda.



Nagakanta ken nagsasalada. Maysa kadagiti kantada ti "Umaykayo, Umaykayo, Dakayo a Sasanto." Limmag-an ti rikna dagiti tao.



Maysa a lalaki ti nagtangguyob a mangipakaammo kadakuada nga orasen ti pannaturogda. Nagkararag dagiti nagkauna a kameng ket naturogda.



Atiddog ti dinaliasat dagiti nagkauna a kameng iti ballasiw dagiti tanap. Uppat a bulan a nagdaldaliasatda. Adu dagiti tao a nasabatda iti dalan. Sumagmamano kadagiti tao ti managpalab-og. Imbagada ken ni Brigham Young a di mapaman iti Rocky Mountains. Kinunada nga awan ti agtubo a bukel sadiay.

Imbaga dagiti dadduma a tao ken ni Brigham Young nga ipanna dagiti Santo iti California. Ngem kinuna ni Brigham Young nga impakita kenkuana ti Apo no sadino ti nasken a papanan dagiti Santo. Tungpalenna ti Apo.



Iti kamaudiananna, nakadanon dagiti nagkauna a kameng iti kabambantayan. Narigat ti agdaliasat idia.

Nagsakit ni Brigham Young. Dina kabaelan ti napartak a panagdaliasat. Nangpili kadagiti sumagmamano a lallaki a mapan nga umuna. Imbagana a mapanda iti Great Salt Lake Valley. Nasken nga irugidan ti agitukit kadagiti bukel.



Innala dagiti lallaki dagiti karisonda kadagiti tuktok ti bantay. Bimmabada a nagturong iti tanap. Nagkampoda iti igid ti maysa a karayan.

Nagkararagda iti Apo. Indawatda a bendisionanna dagiti itukitda a bukel. Intukit dagiti lallaki dagiti bukel.



Iti simmaruno nga aldaw, napan ni Brigham Young a kaduana dagiti nagkauna a kameng iti tanap. Kimmita ni Brigham Young iti tanap manipud iti karisonna. Ammona a daytoy ti lugar a kayat ti Apo a pagnaedan dagiti Santo. Kinuna ni Brigham Young, "Daytoy ti umisu a lugar. Ipagnayon." Impagna nga impababa dagiti Santo dagiti karisonda nga agturong iti tanap. 24 ti Hulio 1847 idi.

# Dagiti Santo iti Rocky Mountains

Maika-63 a Paset (Hulio 1847)



Inrugi dagiti nagkauna a kameng ti nangaramid iti maysa a ciudad iti Great Salt Lake Valley. Ninagananda ti ciudad iti Ciudad ti Salt Lake. Nagpili ni Brigham Young iti lugar a pakaipatakderan ti templo.



Biningaybingay ni Brigham Young ti ciudad. Tunggal kaamaan adda dagana a pagbalayan ken pagtalonan. Nagipatakder dagiti nagkauna a kameng kadagiti balay a naaramid iti tabla. Nagitukitda kadagiti bukbukel. Nagtrabahoda a sipapasnek. Insuro ni Brigham Young dagiti Santo a nasken nga agrabaho ti tunggal maysa para iti kasapulanna.



Biningaybingay ni Brigham Young ti ciudad ti lima a purok. Rinugian dagiti tao ti nagipatakder kadagiti simbaan. Adu pay dagiti nagkauna a kameng ti napan iti tanap. Iti saan a nabayag, addan sangapulo-ket-siam a purok.




Nangirugi dagiti nagkauna a kameng iti eskuela. Adda iti maymaysa a pasdek ti eskuela a pagklasean ken pagtataripnongan ti Simbaan. Iti saan a nabayag, nangrugi ti Pagadalan iti Domingo.



Nangibaon ni Brigham Young kadagiti misionario iti sabali a lugar iti ballasiw ti taaw. Kadagiti dadduma a lugar, sumagmamano laeng a tao ti nagkameng iti Simbaan.



Kadagiti sabali a lugar, adu a tao ti namati kadagiti misionario. Nagkamengda iti Simbaan. Adu kadakuada ti nagtarigagay a makipagnaed kadagiti Santo iti Great Salt Lake Valley. Binallasiwda ti taaw babaen ti bapor.



Sumagmamano kadagiti tao ti bimmallasiw kadagiti kapatagan babaen dagiti naabbongan a karison. Ngem sumagmamano kadagiti tao ti awan kuartana nga igatang iti karison. Nagaramidda iti babassit a karison a dua ti pilidna. Maawagan dagitoy iti karison a guyguyoden ti ima. Inkarga amin dagiti nagkauna a kameng dagiti gargaretda iti uneg ti karison. Induron ken ginuyodda dagiti karison nga imballasiw iti kapatagan. Narigat unay a trabaho ti agguyod kadagiti karison. Sumagmamano kadagiti tao ti nagsakit ken natay.



Maysa a masirib a dadaulo ni Brigham Young. Nangipatulod kadagiti lallaki ken kaamaanda kadagiti sabali a lugar iti Laud. Sumagmamano a Santo ti nagaramid kadagiti ili iti California. Nagaramid dagiti dadduma a Santo kadagiti ili iti Idaho, Arizona, ken Wyoming. Sumagmamano kadagiti tao ti nagladingit a pimmanaw kadagiti pagtaenganda. Ngem tinungpalda ni Brigham Young.

Adu ti parikut dagiti Santo. No dadduma, saan nga agtubo dagiti mulada. Yagus ti layus dagiti bangkagda. No dadduma takawen dagiti Indian dagiti gargaret dagiti Santo wenno saan patayenda ida.



Imbaga ni Brigham Young kadagiti Santo nga agbalinda a nasayaat kadagiti Indian. Nangted dagiti Santo iti taraon kadagiti Indian. Adu kadagiti Indian ti nakigayem kadagiti Santo.

Inrugi dagiti Santo ti nagaramid kadagiti templo iti Laud. Idi tawen ti 1853, inrugida nga inaramid ti templo iti Ciudad ti Salt Lake. Nagtrabahoda iti uppat-a-pulo a tawen tapno maaramid ti templo. Nakaaramid pay dagiti Santo iti tallo a templo sakbay a nalpas ti Templo ti Salt Lake. Inaramidda ti Templo ti St. George, ti Templo ti Logan, ken ti Templo ti Manti.







# Ti Simbaan ni Jesucristo Ita


Maika-64 a Paset




Adu a tawenen ti napalabas manipud idi nairugi ti Simbaan iti Fayette, Nueva York. Dakkel nga amang ti dinur-asan ti Simbaan kadagidiay a tawen. Idi tawen ti 1830, innem a tao ti nangirugi iti Simbaan, idinto a nagbuya dagiti dadduma.



Napan dagiti misionario iti adu a pagilian tapno isuroda ti ebanghelio. Dimngeg dagiti tao kadagiti misionario. Namatida iti ebanghelio ket nagkamengda iti Simbaan. Ita minilionen a kameng ti Simbaan ti agnanaed iti amin a suli ti lubong. Agsasaoda iti adu a pagsasao. Naragsakda nga agbalin a kameng ti Simbaan.



Idi 6 ti Abril 1980, nagkasangay ti Simbaan. Sangagasut-ket-limapulo a tawennan. Adda naisangsangayan a komperensia ti Simbaan iti dayta a panagkasangayna. Adda dua a taripnong a naggiddan. Naangay ti maysa a taripnong iti Fayette, Nueva York. Adda ni Propeta Spencer W. Kimball iti maysa a balay a nabangon a kalanglanga iti pagtaengan ni Peter Whitmer.



Naangay ti sabali a taripnong iti tabernakulo iti Siudad ti Salt Lake. Rinibu a tattao ti adda iti taripnong. Nagsarita ni Presidente Kimball kadagiti Santo iti telebision. Indatonna ti balay ni Peter Whitmer. Naragsakan unay dagiti amin a kameng ti Simbaan a nakakita ken nakanggeg iti propeta. Nagasat unay dagiti kameng ti Simbaan. Nasken nga agyamantayo agsipud ta kamengtayo ti Ti Simbaan ni Jesucristo dagiti Santo iti Ud-udina nga Aldaw. Addaantayo iti propeta a mangibagnos kadatayo.

# Dagiti Balikas nga Ammuen

**agasan** Ti kayat a sawen ti agasan isu ti panangpalaing kadagiti masakit. Binendisionan ni Newel Whitney ni Joseph Smith. Naagasan ni Joseph Smith.

**agbabawi** No makaaramidtayo iti biddut nasken nga agbabawitayo. No makaaramidtayo iti biddut nasken nga agladingittayo ken ditayon uliten daytoy.

**agbambantay** Binantayan dagiti agbambantay dagiti lallaki iti pagbaludan tapno dida makapaglibas.

**agimalmaldit** Ti agimalmaldit ket maysa a tao nga agimaldit iti libro.

**agkararag** Ti agkararag kaipapananna ti makisao iti Nailangitan nga Ama. Nagkararag ni Joseph Smith iti Nailangitan nga Ama. Nakisao ni Joseph Smith iti Nailangitan nga Ama.

**agnanayon** Awan patinggana ti agnanayon. Makapagnaedtayo iti sidong ti Nailangitan nga Ama iti agnanayon no tungpalentayo dagiti bilinna.

**agpili** Palugodannatayo ti Dios nga agpili tapno agbalin a nasayaat wenna dakes. Agpilitayo kadagiti tao nga agbalin a dadaulo. Pinili ti Dios ni Brigham Young a mangidaulo kadagiti Santo.

**agsagaba** Agsagabatayo no madangran ti bagitayo. Nagsagaba ni Joseph Smith ken dagiti gagayemna iti pagbaludan.

**agtakaw** Ti agtakaw kaipapananna ti mangala iti maysa a banag a dimo kukua. Tinakaw dagiti mangrribuk dagiti ayup a taraken dagiti Santo. Innala dagiti mangrribuk dagiti ayup.

**agtungpal** Ti agtungpal kaipapananna ti agaramid iti naibaga nga aramidentayo. Nasken nga agtungpaltayo kadagiti bilin ti Dios.

**aguummong** Ti aguummong kaipapananna ti agtitipon a sangkamaysa iti maysa a lugar. Imbaga ni Joseph Smith kadagiti Santo nga aguummongda iti Missouri.

**alkitran** Napigket ken nangisit ti alkitran.

**alkohol** Adda alkohol ti serbesa ken arak. Saan a nasayaat nga inumentayo ti adda alkoholna.

**Aldaw a Panaginana** Ti Aldaw a Panaginana ti aldaw a mapantayo iti Simbaan. Nasken a saantayo nga agrabaho iti Aldaw a Panaginana. Ti Domingo ti Aldaw a Panaginana.




**anghel** Ti anghel ket maysa kadagiti katulongan ti Dios. Nakisao ni Anghel Moroni ken ni Joseph Smith.

**apagkapullo** Ti apagkapullo ti kuarta nga itedtayo iti Dios.

**Apostol** Ti Apostol ti dadaulo iti Simbaan ni Jesucristo. Imbaga ni Jesus ken ni Joseph Smith a kasapulanna ti sangapulo-ket-dua nga Apostol.

**ayuno** Ti ayuno ket saan a panangipauneg iti taraon wenna danum. Nagayuno dagiti tao iti tallo nga aldaw.



**baka** Ayup dagiti baka.

**bantay** Pinataray dagiti nagkauna a kameng dagiti karisonda iti bantay.

**bilin** Tungpalen dagiti nasayaat a tao dagiti bilin ti Dios. Aramidén dagiti nasayaat a tattao ti kayat ti Dios nga aramidenda.

**binallasiw** Binallasiw dagiti immuna a kameng ti karayan Mississippi. Binallasiw dagiti immuna a kameng ti sabali a bangir ti karayan.

**binekkel** Binekkel dagiti lallaki ni Joseph Smith.

**bingay** Bingay ti dadaulo ti daga. Inikkan ti dadaulo ti maysa a paset ti daga ti tunggal kaamaan.

**binulod** Binulod ti lalaki ti kabalio ti gayyemna. Dinamag ti lalaki iti gayyemna no mabalinna nga aramaten ti kabalio.

**bukbukel** Nagmula dagiti immuna a kameng iti bukbukel. Nagmulada iti mais, patatas, trigo, ken dadduma pay.

**buloden** No bulodentayo ti maysa a banag, dawententayo ti pammalubos ti akinkukua no mabalintayo nga aramaten daytoy.

**dadaelen** Ti dadaelen kaipapananna ti panangwara, panangburak, panangpuor, wenna panangpatay. Dinadael ti bunggoy dagiti mangriribuk iti templo.

**dadaulo** Ti propeta ti dadaulo ti Simbaan.

**dakes** Ti dakes isu ti maikaniwas. Maysa a dakes nga espiritu ni Satanas.

**dakes nga espiritu** Saan a nasayaat nga espiritu dagiti dakes nga espiritu. Sumurot dagiti dakes nga espiritu ken ni Satanas.

**diakono** Agbalin a diakono dagiti ubbing nga agtawen iti sangapulo-ket-dua. Mabalín dagiti diakono nga ibunong ti sakramento.

**disipulo** Ti disipulo ket maysa a tao a mangsursurot ken ni Jesus ken agkagumaan nga agbalin a kas kenkuana.

**ebanghelio** Ti ebanghelio ti insuro ni Jesus nga aramidentayo. Mamati dagiti Santo iti ebanghelio ni Jesucristo.

**elder** Dagiti elder ti lallaki nga addaan iti kinasaserdote.

**endowment** Ti endowment ti naisangsangayan a kari wenna sagut manipud iti Dios.

**espiritu** Awanan iti bagi a nagtagilasag ken tulang ti espiritu.

**governador** Ti governador ti dadaulo ti estado.

**idaton** No mangidaton itayo iti maysa a banag, bendisionanyo daytoy tapno maaramat kadagiti aramid ti Dios. Indaton dagiti Santo ti templo.

**idaulo** Idaulo ti tao, kayatna a sawen, ti panangipakita wenna panangibaga iti aramidenda.

**imparatus** Imparatus ni Joseph Smith ti Libro ni Mormon iti pagsasao nga Ingles.

**inkali** Inkali ni Mormon dagiti balitok a pinanid. Impanna dagiti pinanid iti maysa nga abut iti uneg ti daga. Ginaburanna dagitoy iti daga.

**inkeddeng** Saan a masinunuo da Emma ken Joseph no mapanda iti Pennsylvania wenna agtalinaedda iti Nueva York. Inkeddengda a mapanda iti Pennsylvania.

**inordenan** Ti inordenan kaipapananna ti panangted iti kinasaserdote. Inordenan ni Joseph Smith ti lalaki. Inted ni Joseph Smith ti kinasaserdote iti lalaki.

**isalakan** Natay ni Jesus tapno isalakannatayo. Natay ni Jesus tapno makapagsublitayo a makipagnaed iti sidong ti Nailangitan nga Ama.

**kabusor** Ti kabusor isu ti gumura iti sabali a tao. Pinadas dagiti kabusor ni Joseph Smith ti mangpatay kenkuana.

**kameng** Kameng ti simbaan dagiti tao. Nabuniagan dagiti tao ket naibilangda iti Simbaan.

**kapitan** Maysa sa dadaulo ti kapitan. Ni Kapitan Allen ti dadaulo dagiti soldado.

**kapuonan** Dagiti kapuonantayo dagiti tattao iti kaamaanitayo a nagbiag kasakbayantayo.

**kararag** Insawang dagiti immuna a kameng dagiti kararagda sakbay a naturogda. Nagkararag dagiti immuna a kameng sakbay a naturogda.



**karsel** Naipan dagiti lallaki iti karsel. Naipupok dagiti lallaki tapno saanda a makalibas.

**katulagan** Maysa a kari ti katulagan. Agkaritayo iti Dios nga adda maaramidantayo. Agaramidantayo iti katulagan iti Dios.

**kinapudno** Insuro ni Jesus kadagiti tao ti kinapudno. Insuro ni Jesus kadagiti tao no ania ti rumbeng.

**kinasaserdote** Ti kinasaserdote ti bileg ti Dios.

**komperensia** Dakkel a taripnong ti komperensia. Adu a kameng ti Simbaan ti mapan iti komperensia.

**mamagbaga** Dagiti mamagbaga ti tumulong iti dadaulo. Ti Propeta ti Simbaan ket addaan iti mamagbaga.

**mamati** Ti mamati kaipapananna ti panangpanunot a pudno ti maysa a banag. Adu dagiti tao ti mamati iti ebanghelio ni Jesucristo.

**mangibinglay** Ti mangibinglay kaipapananna ti panangted iti paset ti adda kadatayo iti maysa a tao.

**matgedan** Kayat a sawen ti matgedan isu ti maala babaen ti panagtrabaho. Nagtrabaho para iti mannalon dagiti lallaki. Nangedda iti kuarta.

**mision** Napan ti Apostol iti mision. Napan imbaga ti Apostol kadagiti tao ti maipapan iti ebanghelio ni Jesucristo.

**misionario** Misionario ti tao a mapan iti mision.

**nabuniagan** Mabunigantayo no kumappengtayo iti Simbaan. Mairaremtayo iti danum sa lumung-aw.

**nadangkes** Nagaramid ti lalaki iti nadangkes a bambanag. Nagaramid ti lalaki iti dakes a bambanag.

**nagkameng** Nagkameng dagiti tao iti Simbaan. Nabuniagan ket nagbalin a kameng ti Simbaan dagiti tao.

**nagkallaysa** Nagkallaysa da Joseph ken Emma. Agassawa da Joseph ken Emma.


**nagpasindayag** Nagpasindayag dagiti agbambantay iti pagbaludan maipapan kadagiti inaramidda. Naragsakanda maipapan iti daytoy.

**nagsapata** Nagsapata dagiti agbambantay iti pagbaludan. Nagsao iti dakes dagiti soldado iti pagbaludan.

**nagtaraken** Nagtaraken da Joseph ken Emma Smith iti singin a maladaga. Imbilang da Joseph ken Emma dagiti singin a kas paset ti kaamaanda.

**nagungar** Nagungar ni Jesucristo. Natay isuna. Nagbiag manen isuna. Agungarto amin a tao kalpasan ti ipapatayda.

**naikkat** Naikkat dagiti kameng ti Simbaan a nagaramid iti dakes a banag. Saandan a kameng ti Simbaan.



**nailansa iti krus** Nailansa iti krus ni Jesus. Napapatay ni Jesus. Inlansada iti krus ket nagtalinaed sadiay agingga a natay.

**naimaldit** Naimaldit iti papel dagiti balikas iti daytoy a libro.

**nalinteg** Agaramid iti umno dagiti nalinteg a tao. Agtungpalda kadagiti bilin ti Dios.

**nangasaba** Nangasaba ni Joseph Smith kadagiti tao. Nakisao ni Joseph Smith kadagiti tao ket imbagana kadakuada ti maipapan iti ebanghelio.

**napintas** No napintas ti maysa a banag magustuantayo a kitaen. Napintas ti minuyongan. Napintas ti templo.

**napudno** Saan nga agul-ulbod dagiti napudno a tao. Saan nga agala dagiti napudno a tao kadagiti banag a dida kukua.

**nasantuan a kasuratan** Libro dagiti nasantuan a kasuratan a mangibaga kadatayo iti maipapan iti Dios. Ti Biblia, Libro ni Mormon, Doktrina ken Katulagan, ken ti Perlas a Kapatgan dagiti libro ti nasantuan a kasuratan iti Simbaan.

**obispo** Maysa a dadaulo iti Simbaan ti obispo. Dadaulo ti maysa a purok ti obispo.

**pagarian** Ti pagarian iti langit ti pagnaedan ti Dios.

**pagbaludan** Ti pagbaludan ket lugar a pakaipanan ken pakaipupokan dagiti tao. Ti pagbaludan ket kas iti karsel.

**pagbuniagan** Adda pagbuniagan iti simbaan ken iti templo. Mabuniagan dagiti tao iti pagbuniagan.

**pagsasao** Dagiti balikas nga isurat wenna pakisaotayo iti sabali a tao ket maawagan iti pagsasao.

**pammaneknek** Ti pammaneknek ket panagrikna a pudno ti ebanghelio. Adda pammaneknek ti lalaki a pudno ti ebanghelio.

**pammati** Ti pannakaadda iti pammati isu ti panangnamnama kadagiti banag a di makita ngem pudno. Adda pammatitayo ken ni Jesucristo. Mamatitayo kenkuana ken agtungpaltayo kenkuana.

**panagkallaysa** Ti panagkallaysa isu ti panagasawa.

**panaglibas** Ti panaglibas kaipapananna ti ipapanaw manipud iti maysa a tao wenna banag. Inkarigatan dagiti lallaki iti pagbaludan ti naglibas. Nakapaglibas ni Joseph Smith manipud iti bunggoy dagiti mangrribuk.

**panagrukbab** Panagayat ken panagtungpal ti kayat a sawen ti panagrukbab. Kayat ni Satanas a pagrukbaben ni Moises kenkuana. Kayat ni Satanas nga ayaten ken tungpalen ni Moises isuna.


**panangpakawan** Kayat a sawen ti panangpakawan ti pananglipat kadagiti dakes a banag nga inaramid ti maysa a tao. Pakawanennatayo ti Dios no pagladingitanyo dagiti dakes a banag a naaramiditayo ken ditay kaano man aramiden manen dagitoy.

**pangulu** Ti pangulu ti Simbaan isu ti Presidente ken dagiti mamagbagana.

**parmata** Ti parmata ket banag nga ipakita ti Dios kadayo. Nakita ni Joseph Smith ti Nailangitan nga Ama ken ni Jesucristo iti parmata.

**pasdek** Dakkel a pasdek ti templo.

**patriarka** Ti patriarka ti agit-ited iti naisangsangayan a bendision kadagiti tao. Patriarka ti ama ni Joseph Smith.



**penned** Nagaramid dagiti Santo iti penned iti karayan. Manglapped ti penned iti danum.

**pinabaso** Pinabaso dagiti tao ni Joseph Smith gapu kadagiti riribuk. Kinuna dagiti tao a ni Joseph Smith ti nangparnuay iti riribuk.

**pinarsua** Pinarsua ni Jesucristo ti daga. Inaramid ni Jesucristo ti daga.

**pinatakder** Pinatakder dagiti nagkauna a kameng ti simbaan dagiti balayda a naaramid iti troso.

**presidente** Dadaulo ti maysa a presidente. Ti presidente ti Simbaan ti dadaulo.

**propeta** Ti propeta ti mangibaga kadagiti tao no ania ti kayat ti Dios nga aramidenda. Maysa a propeta ni Joseph Smith.



**pugo** Billit dagiti pugo.

**rangtay** Binallasiw dagiti immuna a kameng ti Simbaan ti karayan babaen ti rangtay.

**rinaut** Rinaut ti bunggoy dagiti mangrribuk dagiti Santo. Rinugian ti bunggoy dagiti mangrribuk a linabanan dagiti Santo.


**riribuk** Ti riribuk ket maysa a dakes a banag a mapasamak kadayo. Adu ti riribuk dagiti Santo iti Nauvoo.

**sabidong** Makapatay iti tao ti sabidong no kanen wenna inumen daytoy. Pinadas ti bunggoy dagiti mangrribuk a painumen ni Joseph Smith iti sabidong.

**sagrado** Sagrado a pasdek ti templo. Agpaay ti templo iti Dios.

**sagut** Dagiti sagut isu dagiti banag a maited iti tao. Mangted ti Espiritu Santo iti sagut kadagiti nalinteg a tao.





**sakramento** Awatentayo ti sakramento a panglagip ken ni Jesus. Awatentayo ti tinapay ken danum a panglaglagip ken ni Jesus.

**saksi** Nakita dagiti saksi dagiti balitok a pinanid. Imbagada a pudno dagiti balitok a pinanid.

**saluad** Adda paltog dagiti lallaki a pangsaluad kadagiti tao. Adda paltog dagiti lallaki a pangsalaknib kadagiti tao. Sinaluadan ti Dios ni Joseph Smith. Sinalakniban ti Apo ni Joseph Smith.

**santo** Ti Santo ket maysa a kameng ti Simbaan ni Jesucristo.

**sapata** Ti sapata kaipapananna ti panagsao iti dakes.

**saserdote** Addaan iti kinasaserdote dagiti saserdote. Dagiti saserdote ket lallaki a tumultulong iti simbaan.


**soldado** makiranget dagiti soldado iti buyot.

**sugat** Paset ti bagi a nasaktan wenno naiwa ti sugat.

**sulisogen** Pinadasnakami a sulisogen ni Satanas. Pinadasnakami a pagaramiden ni Satanas iti banag a dakes.

**taaw** Ti taaw ket maysa a dakkell unay a paset ti danum a naapgad.

**tabako** Agtabako ken agmuskada ti sumagmamano a tao. Saan a nasayaat para kadayo ti tabako.



**tangguyob** Naaramid ti sara a tangguyob.

**templo** Balay ti Dios ti templo.

**tiniliw** Tiniliw dagiti soldado ni Joseph Smith ket saandan a pinalusposan daytoy.

# Dagiti Luglugar nga Ammuen

**Adam-on-di-Ahman** Adda ti Adam-on-di-Ahman iti estado ti Missouri. Sinarungkaran sadiay ni Jesus ni Adan iti nabayagen a panawen.

**America** America ti daga a nagnaedan dagiti tao iti Libro ni Mormon iti nabayagen a panawen.

**Arizona** Adda ti estado ti Arizona iti akinlaud a paset ti Estados Unidos. Nangipatulod ni Brigham Young kadagiti Santo a mangbangon kadagiti ili iti Arizona.

**California** Masarakan ti California ti akinlaud a paset ti Estados Unidos. Nangipatulod ni Brigham Young kadagiti Santo a mangbangon kadagiti ili iti California.

**Carthage** Ti Carthage ti ili iti estado ti Illinois. Napatay da Joseph ken Hyrum Smith iti pagbaludan iti Carthage.

**Celestial a pagarian ti langit** Ti celestial a pagarian ti langit ti pagnaedan ti Nailangitan nga Ama ken ni Jesus. Agnaedto dagiti nalinteg a Santo idia kalpasan ti panagungarda.

**Colorado** Maysa nga estado ti Colorado iti akinlaud a paset ti Estados Unidos.

**Council Bluffs** Maysa nga ili ti Council Bluffs iti tanap ti Estados Unidos.

**daga** Maysa a lugar ti daga pagnanaedantayo ita. Inaramid ni Jesus ti daga.

**Egipto** Ti Egipto ti daga a nagnaedan da Abraham ken Moises iti nabayagen a panawen.

**Estados Unidos** Maysa a pagilian ti Estados Unidos iti Akin-amanan nga America. Nangrugi ti Simbaan ni Jesucristo Dagiti Santo iti Ud-udina nga Aldaw iti Estados Unidos.

**Far West** Maysa nga ili ti Far West iti estado ti Missouri. Nagnaed dagiti Santo iti Far West iti nabiiit a panawen.

**Fayette** Maysa nga ili ti Fayette iti estado ti Nueva York. Inrugi ni Joseph Smith ti Simbaan iti Fayette.

**Great Salt Lake Valley** Adda ti Great Salt Lake Valley iti akinlaud a paset ti Estados Unidos.

**Harmony** Maysa nga ili ti Harmony iti Pennsylvania a nagnaedan ni Joseph Smith.

**Haun's Mill** Maysa nga ili ti Haun's Mill iti estado ti Missouri. Adu a Santo ti pinatay ti bunggoy dagiti mangrilibuk iti Haun's Mill.

**Idaho** Adda ti Idaho iti akinkaud a paset ti Estados Unidos. Nangibaon ni Brigham Young kadagiti Santo a mangbangon kadagiti ili iti Idaho.

**Illinois** Maysa nga estado ti Illinois iti Estados Unidos. Ili iti Illinois ti Nauvoo ken Carthage.

**Independence** Maysa a ciudad ti Independence iti Jackson County, Missouri. Kinuna ni Jesus a mabangonto ti ciudad ti Zion iti asideg ti Independence.

**Israel** Ti Israel ti lugar a pagnaedan ti adu a Judio.

**Jackson County** Adda iti estado ti Missouri ti Jackson County. Pinapanaw ti bunggoy dagiti mangrilibuk dagiti Santo iti Jackson County.

**Jerusalem** Maysa a ciudad iti Israel ti Jerusalem. Mapanto ni Jesus iti Jerusalem iti panagsublina ditoy daga.

**Karayan Mississippi** Asideg ti Karayan Mississippi iti ciudad ti Nauvoo. Binallasiw dagiti Santo ti Karayan Mississippi idi pimmanawda iti Nauvoo.

**Kirtland** Maysa nga ili iti estado ti Ohio ti Kirtland. Nangbangon dagiti Santo iti templo iti Kirtland.

**langit** Ti langit ti lugar a pagnaedan ti Nailangitan nga Ama ken ni Jesus. Nagnaedantayo iti langit sakbay nga immaytayo ditoy daga.

**Liberty** Maysa nga ili iti Missouri ti Liberty. Naipan ni Joseph Smith iti Pagbaludan ti Liberty.

**Minuyongan ti Getsemani** Asideg iti Jerusalem ti Minuyongan ti Getsemani. Nagsagaba ken nagling-et iti dara ni Jesucristo gapu kadatayo iti Minuyongan ti Getsemani.

**Missouri** Maysa nga estado ti Missouri iti Estados Unidos. Maysa a ciudad ti Independence iti Missouri.

**Nauvoo** Maysa a ciudad ti Nauvoo iti estado ti Illinois. Nagnaed dagiti Santo iti Nauvoo ket nagaramidda iti templo ditoy.

**Nueva York** Maysa ti Nueva York kadagiti estado ti Estados Unidos. Adda ti Turod Cumorah ti Nueva York. Adda ti Fayette iti Nueva York.

**Ohio** Maysa nga estado ti Ohio iti Estados Unidos. Maysa nga ili ti Kirtland iti Ohio.

**Palestina** Ti Palestina ti daga a nagnaedan dagiti Israelita.

**Palmyra** Ili Palmyra iti Nueva York ti timman-ayan ni Joseph Smith.

**Pennsylvania** Maysa nga estado ti Pennsylvania iti Estados Unidos. Nagnaed ti kaamaan ni Emma Smith iti Pennsylvania.

**Pueblo** Maysa a ciudad ti Pueblo iti estado ti Colorado. Imbati dagiti lallaki iti Batalion a Mormon dagiti kaamaanda iti Pueblo.

**Quincy** Maysa nga ili ti Quincy iti estado ti Illinois.

**Rocky Mountains** Adda ti Rocky Mountains iti akinlaud a paset ti Estados Unidos. Binallasiw dagiti nagkauna a kameng ti Rocky Mountains ket napanda iti Great Salt Lake Valley.

**Siudad ti Salt Lake** Inaramid dagiti nagkauna a kameng ti Siudad ti Salt Lake. Makita ti Salt Lake iti Great Salt Lake Valley.

**Taaw Pacifico** Adda iti akinlaud a paset ti Estados Unidos ti Taaw Pacifico. Nagmartsa dagiti kameng ti Batalion ti Mormon a nagturong iti Taaw Pacifico.

**Telestial a pagarian ti langit** Dagiti tao a saan a nasayaat iti daga agnaeddanto iti telestial a pagarian ti langit kalpasan ti panagungarda.

**Terrestrial a pagarian iti langit** Dagiti tao a nasayaat ngem saanda a tinungpal dagiti amin a bilin ti Dios iti daga agnaeddanto iti terrestrial a pagarian ti langit kalpasan ti panagungarda.

**Turod Cumorah** Asideg ti Turod Cumorah iti balay ni Joseph Smith iti estado ti Nueva York. Naikali dagiti balitok a pinanid iti Turod Cumorah.

**Utah** Maysa nga estado iti Estados Unidos ti Utah. Masarakan ti Siudad ti Salt Lake iti Utah.

**Vermont** Maysa nga estado iti Estados Unidos ti Vermont. Nayanak ni Joseph Smith iti Vermont.

**Winter Quarters** Maysa nga ili ti Winter Quarters iti kapatagan ti Estados Unidos.

**Wyoming** Maysa nga estado ti Wyoming iti akinlaud a paset ti Estados Unidos. Nangibaon ni Brigham Young kadagiti Santo iti Wyoming tapno agipatakderda kadagiti ili.

**Zion** Maysa a siudad ti Zion nga inaramid ni Enoc. Iti masanguanan addanto tumpuar a sabali a siudad a managan iti Zion. Masarakanto daytoy iti Jackson County, Missouri.

# Dagiti Tattao nga Ammuen

**Abraham** Maysa a propeta ni Abraham a nagbiag iti nabayagen a panawen. Adda iti Daan a Tulag ken iti Perlas a Kapatgan ti pakasaritaan ni Abraham.

**Apo** No dadduma awagantayo ni Jesus iti Apo.

**Bennett, John C.** Maysa a mayor iti Nauvoo ni John C. Bennett. Dina kinayat ni Joseph Smith.

**Brother Allen** Maysa a kameng ti simbaan a naikkan iti alkitran ken dutdot idia Missouri.

**Copley, Leman** Maysa a kameng ti Simbaan iti Kirtland, Ohio, a madi a mangibingay iti dagana kadagiti kameng.

**Cowdery, Oliver** Tinulongan ni Oliver Cowdery ni Joseph Smith a nangipatarus kadagiti balitok a pinanid. Adu dagiti inaramidna a nakatulog iti Simbaan ni Jesucristo.

**Dios** Dios amin ti Nailangitan nga Ama, ni Jesucristo, ken ti Espiritu Santo. Addaanda amin ti naikdalan a bileg.

**Elias** Inted ni Elias ti naisangsangayan a bileg ti kinasaserdote kada Joseph Smith ken Oliver Cowdery iti Templo ti Kirtland.

**Elias a Propeta** Maysa a propeta ni Elias a nagbiag iti nabayagen a panawen. Nangted iti naisangsangayan a bileg ti kinasaserdote kada Joseph Smith ken Oliver Cowdery iti Templo ti Kirtland.

**Enoc** Maysa a propeta ni Enoc a nagbiag iti nabayagen a panawen. Impatakterna ti ciudad ti Zion. Adda ti pakasaritaan ni Enoc iti Perlas a Kapatgan.

**Espiritu Santo** Adda espiritu a bagi ti Espiritu Santo. Tulonganna ti Nailangitan nga Ama ken ni Jesus. Adda bilegna a mangted kadagiti Santo iti naisangsangayan a sagut. Tulonganna ida a mangammo no ania ti rumbeng.

**Gobernador Boggs** Ni Gobernador Boggs ti gobernador iti Missouri. Dina tinulongan dagiti Santo.

**Harris, Martin** Tinulongan ni Martin Harris ni Joseph Smith a nangipatarus kadagiti balitok a pinanid. Napukawna ti sumagmamano a panid ti Libro ni Mormon.

**Hyde, Orson** Maysa nga Apostol ni Orson Hyde. Indatonna ti daga ti Palestina para kadagiti annak ni Abraham tapno adda lugar a pagnaedanda.

**Indian** Agnaed iti amin a paset ti Estados Unidos dagiti Indian. No dadduma, maawagan iti Lamanite dagiti Indian.

**Israelita** Dagiti Israelita dagiti tao a nagnaed iti Palestina iti nabayagen a panawen.

**Jesucristo** Ni Jesucristo ti Mannubbottayo. Isu ti Anak ti Nailangitan nga Ama. No dadduma awagantayo ni Jesus iti Apo.

**Juan** Ni Juan ti maysa kadagiti sangapuLo-ket-dua a disipulo ni Jesus. Inted da Pedro, Santiago, ken Juan ti Kinasaserdote a Melchizedek kada Joseph Smith ken Oliver Cowdery.

**Juan Bautista** Nagbiag ni Juan Bautista idi nagbiag ni Jesus ditoy daga. Ni Juan Bautista ti nangted iti Kinasaserdote nga Aaron kada Joseph Smith ken Oliver Cowdery.

**Kapitan Allen** Maysa a kapitan iti Buyot ti Estados Unidos. Indawatna kadagiti lallaki a kameng ti Simbaan a makitiponda iti Batalion ti Mormon.

**Kimball, Heber C.** Maysa nga Apostol ni Heber C. Kimball. Napan nagmision iti Inglatera.

**Kimball, Spender W.** Ni Spencer W. Kimball ti maikasangapulo-ket-dua a Presidente ti Simbaan. Maysa nga Apostol ken Propeta isuna.

**Knight, Newel** Nagsakit ni Newel Knight idi padasen ni Satanas a lapdan isuna nga agkararag. Tinulongan ni Joseph Smith ni Newel Knight.

**Lamanite** Maawagan dagiti Indian iti Lamanite iti Libro ni Mormon.

**Melchizedek** Maysa a propeta ni Melchizedek a nagbiag iti nabayagen a panawen. Adda kenkuana ti kinasaserdote.

**Moises** Maysa a propeta ni Moises a nagbiag iti nabayagen a panawen. Indauluanna dagiti Israelita a pimmanaw iti Egipto. Nangted iti naisangsangayan a bileg ti kinasaserdote kada Joseph Smith ken Oliver Cowdery iti Templo ti Kirtland.

**Mormon** No dadduma maawagan iti Mormon dagiti kameng ti Simbaan agsipud ta mamatida iti Libro ni Mormon.

**Moroni** Maysa a propeta ni Moroni a nagnaed iti America iti nabayagen a panawen. Inkalina dagiti balitok a pinanid iti Turod Cumorah.

**Mr. Chandler** Naglako iti sumagmamano a rollo ti kadaan a papeles ni Mr. Chandler kadagiti Santo iti Kirtland. Adda kadagiti rollo dagiti sinurat ni Abraham.

**Mr. Hale** Ni Mr. Hale ti ama ni Emma Smith.

**Nagkauna a Kameng** Dagitoy dagiti Santo a napan kadagiti ballasiw dagiti kapatagan a nagturong iti Rocky Mountains.

**Nailangitan nga Ama** Ti Nailangitan nga Ama ti ama ti espiritu a bagitayo. Agkararagtayo iti Nailangitan nga Ama. No dadduma, awagantayo ti Dios iti Nailangitan nga Ama.

**Noe** Maysa a propeta ni Noe a nagbiag iti nabayagen a panawen. Addaan iti kinasaserdote ni Noe.

**Page, Hiram** Imbaga ni Hiram Page nga adda batona a nangted kenkuana iti paltiing a para ti Simbaan.

**Partridge, Edward** Ni Edward Partridge ti immuna nga obispo ti Simbaan.

**Pedro** Maysa ni Pedro kadagiti Sangapulo-ket-dua nga Apostol ni Jesus. Inted da Pedro, Santiago, ken Juan ti Kinasaserdote a Melchizedek kada Joseph Smith ken Oliver Cowdery.

**Phelps, William W.** Ni William W. Phelps ti timmulong iti pannakairugi dagiti eskuela iti Jackson County, Missouri.

**Pratt, Parley P.** Napan ni Parley P. Pratt iti mision a mangisuro kadagiti Lamanite.

**Richards, Willard** Gayyem ni Joseph Smith ni Willard Richards. Nagkaduada ken ni Joseph iti Pagbaludan ti Carthage.

**Rigdon, Sidney** Maysa ni Sidney Rigdon kadagiti mamagbaga ni Joseph Smith.

**Santiago** Maysa ni Santiago kadagiti Sangapulo-ket-dua nga Apostol ni Jesus. Inted da Pedro, Santiago, ken Juan ti Kinasaserdote a Melchizedek kada Joseph Smith ken Oliver Cowdery.

**Satanas** Maysa a sairo ni Satanas. Kayat ni Satanas a pagsardengen dagiti aramid ti Nailangitan nga Ama ditoy daga. Kayatna a dadaelen ti Simbaan ni Jesucristo.

**Sister Vilata Kimball** Ni Sister Kimball ti asawa ni Heber C. Kimball. Maysa isuna a kameng ti immuna a Gimong ti Kaasi.

**Smith, Alvin** Ni Alvin Smith ti inauna a kabsat a lalaki ni Joseph. Natay daytoy. Nakita ni Joseph ti parmata maipapan ken ni Alvin iti celestial a pagarian iti langit.

**Smith, Emma** Ni Emma Smith ti asawa ni Joseph Smith. Isu ti immuna a dadaulo ti Gimong ti Kaasi. Nangaramid iti libro dagiti kanta para iti Simbaan.

**Smith, Hyrum** Ni Hyrum Smith ti inauna a kabsat a lalaki ni Joseph Smith. Napapatay ni Hyrum iti Pagbaludan ti Carthage a kaduana ni Joseph.

**Smith, Joseph** Ni Joseph Smith ti immuna a propeta ken presidente ti Ti Simbaan ni Jesucristo dagiti Santo iti Uld-udina nga Aldaw. Inted ni Jesus ken ni Joseph Smith dagiti paltiing nga adda iti Doktrina ken Katulagan. Napatay ni Joseph iti Pagbaludan ti Carthage.

**Smith, Joseph Sr.** Ni Joseph Smith, Sr. ti ama ni Joseph Smith.

**Smith, Lucy** Ni Lucy Smith ti ina ni Joseph Smith.

**Smith, Samuel** Ni Samuel Smith ti inaudi a kabsat ni Joseph Smith. Isu ti immuna a misionario ti Simbaan.

**Snow, Eliza R.** Kameng ni Eliza R. Snow ti immuna a Gimong ti Kaasi.

**Taylor, John** Gayyem ni Joseph Smith ni John Taylor. Kaduana ni Joseph iti Pagbaludan ti Carthage. Iti saan a nabayag, nagbalin isuna a Presidente ti Simbaan.

**Whitmer, David** Maysa a saksi ni David Whitmer a nakakita kadagiti balitok a pinanid. Timmulong iti pannakairugi ti Simbaan idi 6 ti Abril 1830.

**Whitmer, Peter** Timmulong ni Peter Whitmer iti pannakairugi ti Simbaan idi 6 ti Abril 1830.

**Whitney, Newel** Ni Newell Whitney ti maikadua nga obispo ti Simbaan.

**Williams, Frederick G.** Maysa ni Frederick G. Williams kadagiti mamagbaga ni Joseph Smith.

**Young, Brigham** Maysa ni Brigham Young kadagiti Sangapulo-ket-dua nga Apostol. Isu ti dadaulo dagiti nagkauna a kameng ti Simbaan. Isu ti propeta ti Simbaan kalpasan ni Joseph Smith.

**Young, Phineas** Kabsat ni Brigham Young ni Phineas Young.



*Ti Sagrado a Kakaywan*



*Ti Turod Cumorah*



*Ti Karayan Susquehanna (rinetrato ni Jed A. Clark)*



*Ti Templo ti Kirtland*



*"Iseserrek iti Nauwoo," ni C.C.A. Christensen (BYU Art Museum Collection)*



*Maysa a Pagtaengan iti Nauwoo*



*Iti Nauwoo (rinetrato ni Jed A. Clark)*



*Ti Pagtaengan ni Brigham Young, Nauwoo*



*Ti Pagtaengan ni Orson Hyde, Nauwoo (rinetrato ni Jed A. Clark)*



*Ti Pagbaludan ti Carthage, Carthage, Illinois*



*Ti Templo ti Salt Lake ken dagiti Kuartel ti Simbaan, Ciudad ti Salt Lake*







*Joseph Smith, 1830 - 1844*



*Brigham Young, 1847 - 1877*



*John Taylor, 1880 - 1887*



*Wilford Woodruff, 1889 - 1898*



*Lorenzo Snow, 1898 - 1901*



*Joseph F. Smith, 1901 - 1918*



*Herber J. Grant, 1918 - 1945*



*George Albert Smith, 1945 - 1951*



*David O. McKay, 1951 - 1970*



*Joseph Fielding Smith, 1970 - 1972*



*Harold B. Lee, 1972 - 1973*



*Spencer W. Kimball, 1973 - 1985*



*Ezra Taft Benson, 1985 - 1994*



*Howard W. Hunter, 1994 - 1995*



*Gordon B. Hinckley, 1995 -*